

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

5

ОДА-КОРА (МАЙ)

2013

ТАЙӖ НОМЕРЫН:

Елена АФАНАСЬЕВА. Лов пыр визувтысь ю.	
Кывбуръяс	3
Алексей МИШАРИН. Кор лэбзьӖ коляоз. Повесьт	8

ЧЕЛЯДЬЛЫ

Вячеслав БАБИН. Вых кывбуръяс	31
Александр ШЕБЫРЕВ. Рӧмпӧштан. Висьт	35
Алексей ПОПОВ. Выхш шыпас. Ӗти юкӧна пьеса	61
Татьяна КИРПИЧЕНКО. Мыжаяс. Висьт	71
Альбина СЕЛИВАНОВА. Лисапета. Висьт	75
Александр ПАНЮКОВ. Н.С.Попова йылысь гижӧма нин кык книга	78

6 +

Обложка вылын снимокыс Любовь Павловалӧн.

© «Войвыв кодзув» («Северная звезда»), 2013 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



АУ РК «ИЗДАТЕЛЬСКИЙ ДОМ КОМИ»



ДИРЕКТОР: БЫКОВСКАЯ Н.Н.



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Ответственный
секретарь

КИЧИГИН И.Н.

ПОЛУТРУДОВ А.В.

УЛЯШЕВ О.И.

ЛИМЕРОВА В.А.

ТИМИН В.В.

УЛЬЯНОВ А.В.



Елена АФАНАСЬЕВА



Лов пыр визувтысь ю

Медводдза кывбур

Медводзын лэбысь
лэбачыс уси.
Воис, но кулі.

Мукöдыс надзён локтісны киаи.
Ловъяöсь.
Ловъяöсь.

Медводдза кывбур —
медводзын лэбысь —
киö эз сетчы.

Кыв

Кыв —
Чöвлун...
Мыйта мöвп сійö вермö чужтыны.

Кутшöм джуджыд овлö чöвлун юкмöсыс...
Но кывйыд сыын вермас и не чужны.

Кыв —
Нимкыв.

Лыддян сійöс ваö.
Юан-юан,
И быттö визувлөн везйысь мынан —
Сідзи личавлö лолыд.

Но мыйтаысь шуом кывйыд
Аслыд жö
Октылö
Лэч.

Кыв —
Туйбок турун вылын лысва.
Либö синва,
Кытчö йиджöма кодлөнкö шог,
А гашкö, и радлун.
Öтмында — шогыс и радлуныс...

Эзысь войтъяслы колö сöдзöдчыны лов пыр...
Ловлы колö сöдзöдчыны эзысь войтъяс пыр,
Мед чужны выльысь.
Лоны кывйөн.

Но лысвасö кö пыркнитас төвру?..

Кыв —
Ю.
Нэм бöрся нэм ми гумлалам вежа васö.
Но мöвпыштлам-ö, мый
И тайö юыс вермас косьмыны,
Бырö кö сыын коланлуныс?

Бу берег дорö талун ме вужйöдi и ассьым пу.
Мед нэриник вужъяснас сийö йитчас пöльяслөн
пуяскöд...

Тэ колан менам пулы,
Лов пыр визувтысь ю.

Берба

Берба чальястö пыртасны гортаныс йöзыс.
Керка пытшкöсныс югзяс.
Асъя шондiыс малыштас росъяссö югöрнас — радейтысь
киён.

Помтöмөн овлö чöвлуныс тувсовъя асылö, сэсся
Чивкнитас пыста, жугöдас лөнъсö —
Воссылас лолыдлы юкмöс качлыны эстчань.

Шондiыс рытъя нин.
Инмöдчис югöрнас бербаöдз,
Мычамлис* чаллыс.
Шондiыс вешйис.
Радейтчöм тайö
Кык здук и вöли.

* Мычаммыны (уд.) — гөрдаммыны.

Путшкымдін — менам чужöмті
визувтысь синва

Сад

Палэй баблөн керка дорас сад.
Пышйивлі ме сэтчö ставысь гусьон.
Висьтасьны быд пулы вöлі рад.
Кызд пуясыс — менам еджыд юсьяс —

Лэбöмаöсь... öні керка дор
Кольöма став төв нырыслы эрдö.
Кызди сöмын юсьяссö ог кор:
— Локтöй, зарни тусьон кийсь верда!

Пуястöгыс гöльмис баблөн йөр.
Керкаыс тшöтш лои натög кутш кодь.
Некор оз нин локны юсьяс бөр
Сэтчö, көні Вуö усьö Путшкым*.

Пыжъяс

Кытчö нö пыжъяссö нуин тэ, Вашкаö?..
Ытваыд лолі да, став пыжсö кылöдис?
И менам Сашкöлысь, и менам Ванялысь...
Мыйта пыж вöлі сулалö тані, Путшкымдін берегас...
Көнöсь нö öні?
Бöрсö оз бергöдчы ни öти на пиысь.
Некор нин ог сöвлы вокъяслы пыжаныс.
Сашкöыд некор оз заведит моторсö.
Лöнь öні берегыс.
Лöньöма Вашкаыс.
Ставыс, мый вöлі сэк, вöлі-ö, вöлі-ö?
Тельснитö изъяслань берегдор гыыс.
Кутшöма эськö лайкнитіс пыжъяссö ва вылас öні.
Сьölöмыд морöсад лайкмунліс тшöтш эськö.
Лайкмунліс-личавліс, чöскыда-чöскыда.
Пыжъясыс абуöсь...
Олöмыс кусö?
Пыжъяс то абуöсь, дивö тай олöм.
Кызди нö пыжтöгыс коми морт? Кызди.
Кутшöм нö олöм пыжтöгыс тайö?
Лолыд оз паляв.
И сьölöмыд изйөн туплясьö берегас.

* * *

Вокъясöй менам мунöмны кыйсьыны.
А чойой на бöрся вöтчöма лэбачөн.
Лым еджыд каляөн
Кытчöкö Сöдзимлань

* Путшкым — ю, усьö Вуö (Вашкаö).

Вокъяслысь синсö гажöдны лэбöма.
Локті ме бара Путшкымдін берегö.
Пыжъясныс абуюсь.
Керканыс томана.

Изъяс моз чöv ола.
Некодкöд кыв вежны.
Юыслы висьтасьö сьölöмöй —
Чойöлы.

Виччыся мөвпъяснам вокъясöс, кывза,
Мотор шы оз-ö кыв ыліас көнкö.
Мыйта кад сулалі чöv усьöm берегас.
Вокъясöй эз локны.
Лэбач эз вуджорт.

Ву нуис кывъясöс.
Мөвпъясöй колины.
Берегдор изъяс кодъ —
Рудöсь да сьöкыдöсь.

* * *

Юыс босьтіс Илля дядьнымöс.
И Колянымöс,
И Генянымöс.
И Наташанымöс мырддис томөн-бурөн,—
лыддöдла-бöрдöда.

Лэбачөн Путшкым берегö ветлö лолöй.
Пуксьö из вылö.
Видзöдлö ваас.
Кокыштö асьсö.

Катшасина видз

Водзö туйыс — катшасина видз пыр.
Вуджам,
воас вöртор — югыд ді.
Пöль-пöчөлөн ловныс сәні олö.
Ми дзоридз ваям налы —
катшасин.
Унаысь на пондам тайö лунас
бергöдчывны мөвпнаным,
и челядь
коркö, гашкö, казътыштасны:
сэк тай,
ветлім кор ми
Митьöv сикт гу вылö...
А сідзкö, тайö гожся луныс оз вун.
И лоö миян ловлы дона пасөн.

— А кыті вуджлім юсö,
нылук, он тöд?..
— Сэн вöлі шылькнитчöма катшасина видз...

Соддзас вайис төвру

* * *

Пулön шуйгаладор вож вылас
Пуксьöма лэбач-сьöлöм.
Пулön веськыдладор вож вылас
Пуксьöма лэбач-лов.

Пуöй, зарни кыдз пуöй,
Ковмас кө бөрйыны —
Эн тэрмась.

* * *

Тöрытья шондіыс кусі.
Талунъяыс эз на чуж.
Кыдз тайöс вуджны, юсö?..
Висьтавыны ме ог куж.

* * *

Мöдлапöлас көклön ёсьджык көкöм.
Мöдлапöлас чöскыд курыд вотöс.
Мöдлапöлас вуджны тэ эн тэрмась.
Пуыс эз на быдмы пыжсö карны.

❖ ❖ ❖



Алексей МИШАРИН

Кор лэбзьö коляоз

ПОВЕСЬТ

Пыж кутöм

Таво тулысыс воис водз. Шондiыс азыма сёйис лымсö. Асыв-нас на öшинювса мылькйис рудöдöм лым улын вöли, а рытнас кольöм вося идза под тыдовтчöма. А костас вежöдöм турун чепöсйö. Тöлыс сйöс небыдика малалö.

Туйбокса юкмöс дорö куим пöч локтöмаöсь вала. Ас костаныс варовитöны.

— Вöрад уна на куйлö лымйис. Зэрышталас кö, юис ыджыда ойдас,— ва тыра ведрасö бокö вештигмоз шуис сьод чышгяна косiник нывбаба.

— Кынмавны кö асывгяснас мöдас, юыд оз ло ыджыд. Коркö йиис ичöt ва понда дыр куйлис. Думайтiм, сiсьмас берег дорас,— вочаасис мöдыс.

— Помнита, сйö воö картофелыд чунь пом кодь и быдмылис. Лёк во вöли,— шыасис коймöд старукаыс.— Но таво кыз йиис кывтiс нин.

Данила Марков, сизимöд класса велöдчысь, буретш восьлалiс на дортi, да кор кылис пöчöяслысь сёрнисö, весиг сувтыштлис юкмöс дорас. Кывзыштлис налысь сёрнисö. Сэсся ас кежсьыс думыштлис, мый сёйыштас да пес пыртöм бöрын котöртлас ю дорас. Видзöдлас, ёна-ö сйö ойдöма.

Кильчö дорын зонкаöс паныдалiс бабыс, кодi лун-мöд сайын локтiс на ордö гöститны. Öнi вöли кильчö вывсö ва корöсьөн чышкö.

— Мыссьы да сёйышт,— тшöктiс Данилаöс.— Час, пыра да пачысь шыд чугунсö кыска.

— А-а,— радпырысь кöсйысис зонка.— Сёйышта, пес пырта да ю дорö котöртла.

— Сöмын матö ю дорас эн лэччы. Вакульыс кыскыштны вермас.

— Ылөдлан, некутшөм вакуль абу. Миянлы төрыт на Марья Ивановна урок вылын висьталіс.

— Марья Ивановнаыд том на, оз төд, эм али абу. Мун пыр,— кывкөрталіс бабыс корөсьсө посводз пельөсө пуктігмоз.

Данила пукаліс пызан сайын да пöлясьөмөн панясис.

— Пöсь,— вомтырнас шуис сійö.

— Эн тэрмась, пöлыштан да буретш лоö. Пачыс бур, век на зэв öдья. Кужöма ыджыд айыд тэчны.

— А дедушыд мыйла гуляйтнысö эз лок?

— Горт оло. Он öд эновт. Кань да пон колö вердны.

— Сідзкö, тэ лэччан да волас. Либö ме ачым лэччыла гоҗся каникул дырйи.

— Волы,— шуис бабыс йöв стöкансö мыччигмоз.— Мыйкö тай Лизаыд школасыс дыр оз лок.

— Сійö öд продлёнка вылын.

— Мый нö сэтшöмыс?

— Ну и темнота-а!— вомтырнас нюжөдіс Данила.— Продлёнка сійö продлёнка и эм. Рисуйтчöны, ворсöны, локтан урокьяс кежлö дасьтысьöны.

— Ме тэд сета темнота,— пöчыс ырыштчыліс паньнас.— Плешкад кө колска, төдны кутан, кыдзи сёрнитны.

Данила вежынытчыліс, вештыштіс юрсö пöчыслөн нюжөдөм паньысь. Босьтіс стöкансö да здукөн юис йөвсö. Петіс пызан сайысь. Кватитіс тувйысь гортын новлан паськөмсö. Матыстчис стенин öшалысь рөмпöштан дорö. Сійö быд пöрийö сы водзын пасьтасьö. Рөмпöштанын тыдаліс латшкөсіник тушаа зонка. Чангыль ныра гөгрөс чужöма, русыд юрсиа. Рудовлөз синъясыс вильыша видзөдісны сы вылö. Данила мыччыліс вуджөрыслы кывсö, кышаліс паськөмсö да петаліс песла. Сэсся гөнечөн бөр лэччис кильчö содйөд. Кыліс, кыдзи пöчыс горөдіс, медым оз дыр ветлы.

Улич вылын паныдасис другыс, орчча керкаысь Вася Моторин. Кузиник тушаа, сьод юрсиа, косньод чужöма детинка. Сі-йö сöмын на локтö школаысь. Мыш сайсыс сумкасö пöрччöма да веськыд киас бовйөдлө.

— Вöлись на локтан?— чуймис Данила.

— Менö жö кольөдліс Марья Ивановнаыд кывбур велөдны. А тэ кытчö?

— Ю дорö.

— Ме тшöтш. Сöмын сумкаос гортö пырта.

Вася котөрөн пыраліс керкаö. Петігас босьтöма нянь шөрөм да азыма курччалö.

Зонкаяс орччасисны да зіля мөдөдчисны ю дорö. Юыс ылысьянь на тыдовтчис аслас отнас. Öні сійö ойдöма, лоöма паськыдөн.

— Саридз ыджда!— горөдіс Данила.

Киноясысь адззыліс саридзсö да төдіс нин, мый сійö зэв ыджыд.

Ю кузя кывтісны посни йи торьяс да быдсяма лөптыс. Весиг тыдаліс öтка пожөм пу. Увъяснас и вужнас ытваяс нетшыштöма.

— Данила, видзөд, пыж кыдалö!— индіс Васьö дзик берег дорын джынвийö вöйөм пыж вылö.— Тöлыс татчань ляскöма.

— Вай кутам,— пыр жö чукөстіс Данила.

Кватитіс берег дорысь потш да шыбитіс пыжланьё. Потш помыс тельскысис ваас. Муртса эз во пыжодзис. Зонка матоджык матыстчис ю дорё да выльысь шыбитіс потшсё. Ёні сійё судзис. Данила потшсё увань личкигмоз кыскыштіс асланныс. Пыжыс сетчис сылань. Данила нёшта матоджык матыстчис. Сувтіс дзик ва дорас, вутш вылё. Вутшкыс вежыньтчис, а кок пёлыс вильдіс да дзурсмуні ваас. Боті пытшкас ыльёбіс кодзид ваыс.

— Ы-ы,— горёдіс Данила да ырыштчис береглань.

Васьё аддзёма кузь бедь да уськодчис отсасыны. Кыкнад ружтігтырйи кыскисны пыжсё берег вылё. Бергёдісны, видзёдалісны сійёс. Пыдёсыс отилаті вёлі розьясьома. А сэссия ыджыд жугалёмыс эз тыдав. Данила пуксис пыж дорышё да пёрччис боті пёвсё. Кисьтіс пытшкёссыс васё. Пёрччыліс носкисё, пыдзыртис да бёр комасис.

— Дзоньтавыны позьё,— кётасьлём кокнас небыдика инмёдіс пыж нырё.— Вильысь дзижавны ковмас. Сёмын ме ог куж.

— Дзоньталам, а гожёмнас ю кузя катам, ком вугравны,— вочаасис Васьё.— Миян пелысыс эм. Батьёй кольём во содтёд вёлі вёчёма.

Зонкаяс кутчысисны пыжас да кыскыштісны ю дорсянныс ылөджык, эжа вылас. Видзёдалісны, кытчё эськё позяс саймовтыштны йёз син водзсыс. Сэссия берег пёлонысь бадь да кыз пу расланныс и кыскисны пыжсё. Путкыльтісны утьяс вылё. Кык друг сёрнитчисны аскисянь жё заводитны дзоньтасыны. Васьё кёсийсис вайны варсё. Сарайын пё ведраын эмышт. Батъыс кольём во дзижавлёма жё пу пыжсё, сійён и кыйсьё матысса Сьод тын. Васьё сылы отсасьёма дзижалігас.

— Ме кужа дзижавнысё. Тэ сёмын видзёд да ме моз вёч,— вышшитчигмоз ошйисис другыслы.

— А ме вая пёв пом, розьсё тупкыны. Кёрт тувйыс миян эм жё.

Зонкаяс выльысь гөгөрбок видлалісны пыжсё. Пасъялісны аддзём розьяссё. Ота-мөдсё велөдісны, кызди дёмны восьсаинсё. Горт дорё кайигчөж чери кыйём йылысь сёрнитісны.

Керкаё пырёмөн тшөтш Данила зэв өдйё пёрччысис. Вылыс паськомсё өшөдіс тувйё. Пуксис улөс вылё гачсё пёрччыны. Кётасьём гач кокыс льясьёма яй бердас. А кок лапаыс лоёма гулюлён кодь гөрд. Кёсийс нин кавшасыны паччөр вылё, но мышсянныс кыліс бабыслысь гөлөссё.

— Вёйлін али мый?

— Вильдөдіс.

— Ме жё шулі, мед ю дорас матё эн матыстчы!

— Да эг и матыстчы. Пыж лэптигөн вильді.

— Кутшём пыж?

— Кылалё вёлі да кутім. Гожёмнас чери кыйны катлам.

— Вот өд, он кывзысь да. Кай шонтысь, чери кыйысь,— небыдджыка нин шуис бабыс.

Пачыс Данилалы кажитчө. Сулаліс сійё джодж шёрын да юкис керкасё нель пельё. Сы вывсянь ставыс тыдалё. Пёрччысянін, ошалысь паськомён да джаджйын сулалысь комкотьясён. Пусян-пёжасянінын ноксысь пёчыс. Сёмын узыланіныс да залыс оз тыдав. Найёс торйөдома вежөсьясён.

Паччөр вылын куткырвидзис Васька каньыс, синсё чомрөдліс. Сійё коч кодъ еджыд, мича чужома. Здук-мөд сайын пырөма ывлаысь да, буракө, шонтысьё жö.

Данила водіс, малыштіс кысöйсö да нюжөдіс кокъяссö пач кузя. Пачсянь мышкуас шывгис шоныдыс. Буретш сэтшөм, кутшөм колö. Оз сот, а вöляысь шонтö, быттö мамлөн морös бердö топöдчöма. Данила бура помнитö мамыслысь пöсь сывъяс-сö. Öнi мам бердö топöдчылöмыс гежöда овлö. Зонка бөръя ка-дö яндысьö меліасьöмсьыс. Асьсö ыджыдөн нин лыддьö.

Сэсса кысöй кургöм улын тöдлытöг и унмовсис. Вöтасис, быттö найö Васьö другыскöд катöны ичöt ю кузя кутöм пыжнас. Васьö сынö кык лопта пелысөн, а Данила пукалö пыж бöжын да веськөдлö. Öтар-мөдар берегын бөрö кольöны шувгысь коз да пожöм пуяс, на костö гежөдика сүйсьöм кыз да пипуяс. Подулас, лунладорас, кöнсюрö, мыччысьöмаöсь гöрд гобъяс да гут кулан тшакъяс. Сьöрсөн-бöрсөн паныдасьлöны лежнöг кустъяс.

Катісны дыр, быттöкö ылөдз нин воисны. Друг веськыдладорас мыччысис некор на аддзывтöмтор, важся овмөдчанін. Стöч-джыка кö шуны, сылөн колясыс, вöвлöм баракъяслөн киссьöм стенъясыс да тьöскысь вöчлöм нитшсялöм вевтясыс. А берег дорас сулалö ичötик зонка да öвтчö кинас, быттö сувтны чук-салö.

— Веськыдладорас сын!— Данила горөдіс другыслы да ачыс тшöтш ырыштчис сынны береглань. Но быттö кодкö эз лэдз тайös вöчны, сойбордöдыс кутö да нöшта на тракйö. Данила та ылö дözмис, мый вынсьыс нетшыштчис и садьмис. Вöлөмкö, Лиза чойыс тогйö-пальöдö.

— Мый нö горзін, вöтасин?— юаліс Лиза.— Чеччы, ужнайтны корöны.

— Час, локта,— вомгорулас шуис Данила паччöрысь лэччиг-моз.

Мам-батъыс воöмаöсь удж вылысь да ставөн лöсьöдчöны ужнайтны.

— Ю ылö лэччыліс, вöйлöма,— индіс пöчыс Данила ылö.

— Ю ылö да нöшта вöйлöма?— пыр жö дözмис мамыс.— Мöдысь мед абу вöлі лэччöма!

— Вöйлi дерт, муртса öтар кокöй пыраліс ваас да, пыжсö кутігөн,— дорйысис Данила.

— Пыж?— чуймис мамыс. Сэсса бергөдчис батъыслань.— Шу мыйкö.

— Öнi ваыс ыджыд, колö видзчысьны,— медбöрын шыасис батъыс.

— Ми Васьöкöд пыж кутім, дзоньталам да гожöмнас чери кыйны кутам,— пызан сайö пуксигмоз висьталіс Данила.— А ва ылас видзчысьны мöдам, абу нин ичötöсь.

Сэсса ужнайтігөн лючки висьталіс, кызди пыжсö кутісны. Да весиг асьыс вöтсö висьталіс. Батъыс та ылö нюмдіс. Велö-дышталіс, мый колö вöчны пыж дзоньталігөн да кызди ва вылын асьтö кутны. Сійö быттö весиг ошкис зонкаясöс чери кыйны кöсйöмысь.

— Менам удж вылын книга эм, кызди асьтö ва вылын кутны,— медбöрын шуис батъыс.— Аски вая да лыддьы.

Сöмын мамыс дивитана видзöддывліс то Данила, то батыс былö.

— Бöян кö, гортö он лысыт локны!— стрöга кывкöрталіс сійö.

А пöчыс тшöтш, тыдалö, мамыс дор сувтіс. Ропкыштіс: вакуль-сыыс пö оз пов, пыж ковмöма. Весиг матыстчыліс енув пельöсö да пернапас чöвтис.

Дзоньтасьöм

Аскинас школаын, перемена дырйи, Данила мыччис Васьöлы тетрадьысь нетшыштöм лист.

— Видзöд, ме рисуйті, кутшöм пыж лоö миян. Кык пуклöса. Бöрас тэ кутан пукавны, а водзас ме. Тэ лоан рулевöйöн, а ме капитанöн.

— Ме ачым капитанала,— дöзмöмөн шуис Васьö.— Тэ весиг дзижасыны он куж, а капитанöн кöсьян лоны. Тадз абу честнö!

— Сідзкö, öчередьöн.

Васьö видзöдліс другыслы синмас. Гашкö, чайтіс, мый сійö бара мудеритö. Но нинöм эз казав да нурбыльтіс:

— А-а.

Школа бöрын кык друг сёйисны да гортса удж вöчисны. Сэсса лэччисны пыж дорö. Васьö кыскис вар тыра ведра да кык кыз сутуга пом. Питшöгас суйыштöма пакля. Данила босьтöма пöв пом да гоз-мöд пес плака. Öтар зептас сылөн кöрт тувьяс, мöдарсьыс чурвидзис мөлöt вороп.

Бадь кустьяс дорын куйліс тöрыгтя кыскöм пыжыс. Васьö пыр жö мöдіс лöсьöдны бипур. А Данила суйыштіс сэтчö сямöд да биасис. Кос пескыс мöдіс печласигтырйи, яра ломтысьны. Васьö пуктіс бипурас кыз сутуга помьяссö. Сутуга шоналігкості зонкаяс заводитісны тупкавны розьяссö, косталöминьясö сюялісны гартлöм пакля. Васьö черөн поснöдліс вар торьяссö да пукталіс пыжлөн пöв костьясö, кытчö сюялісны гартöм паклясö. Сэсса бипурысь перйис доналöм кыз сутугасö да нуöдіс поснöдлöм вар кузя. Варыс дзижмуні, сыліс да сирöдіс паклясö. Пöв костыс молясис, лои югыдсьöдөн.

— Аддзан дзижалöмсö?— юаліс сійö.

— А-а,— довкнитіс юрсö Данила да босьтіс бипурысь мöд сутугасö.— Öні ме видла, тэнад кöдзалис нин, пукты шонтыны.

Рытивбыд зонкаяс мошкоритчисны пыж дорын. Рöмдыны кутіс, но сöмын пыж джынсö удитісны дзижавны.

Мöд лунö другьяс бара мöдöдчисны ю дорö. Васьö сьöрсьыс босьтöма ассьыс Бимсö. Понйыс домын олö, да медым пö кокьяссö веськöддыштас, котралыштас берег пölöныс.

Зонкаяс тэрмасисны помавны уджсö. Ноксигас эз казавны, кызди кöкьямысöд классысь Коля Майбуров матыстчöма.

— Эй, зырымбедьяс, кодлысь пыжсö гусялінныд!— стрöга юаліс сійö.

— А тэ коді?— воча шыасис Васьö да чургöдіс пöсь сутуга помсö Колялань.

Васьö эз на вунöд, кызди вöйдөрлун Майбуровыс школа коридорын перемена дырйи сконйыштіс сійöс. Зонка сэки тöкөтö

ныр вылас эз усь. Та вёсна дась вёлі зургыны сутуга помнас.

Данила тшотш кабыръяссё чабыртис да ырыштчис.

— Мун татысь!— горөдіс сійё.— Пыжсё ми эг гусялөй, а кутім ю вывсьыс.

— Ылөдланныд!— Коля шеныштіс кинас.

Бим аддзис сылысь шенасьёмсё да уськөдчис увтны. Коля повзис сыысь, бөрынтьчыштіс. Сэсся бергөдчис да котөртис сиктлань. Бим увтчигтырйи вөтчис. А кор Коляыс бара сы вылө шеныштіс кинас, нем виччысьтөг пиньяснас кватитис пышйысьлысь гач коксё. Гач кокыс косяссис. Коля гораа чилөстис. Васё пыр жө чукөстис понсё. Бим матыстчис Васё дорө да бөжсё мөдіс легөдны. Васё малыштіс сійёс юрөдыс да небыдика шуис:

— Эз ков гачсё косявны.

— Правильнө, мед и косяліс!— дорйыштіс понсё Данила.— А то нырсё лэпталө.

Зонкаяс бара босьтчисны уджө. Колякөд зыксёмыс вочасөн вуні. Ёта-мөдлы индалісны, кыті нөшта коліс дзижавны. Налы кажитчө видзөдны, кыдзи дон сутуга помыс сывдө варсө, дзижгөмөн да тшынөн. Тшынсө төлыс пырысь-пыр нуис бокө, а сотчысь вар дукуыс коліс.

Кор эштіс дзоньтасьёмыс, другъяс лэдзлісны пыжсё ва вылө. Сюся видзөдалісны, кыткө письтас оз. Нимкодясисны, мый дзоньтасьёмыс артмис. Ваыс некыті эз мыччысь.

Та бөрын найө думыштісны мавтны сійёс краскаөн. Мед мича вөлі. Нөшта көсйисны сетны ним. Бура дыр вензисны өта-мөдыскөд. Некрыдз эз воны өти кывйө, кыдзи пыжсё нимтыны. Медбөрын Данила көрліс плешсө да шуис:

— Вай нимтам Бригантинаөн. Ме лыддьывлі пиратъяс йылысь. Сэні «Бригантинаыс» зэв өдйө шывгө вөлөм.

Васёлы тайө нимыс кажитчис жө. Та вылын веныс помасис. Лун-мөд мысти зонкаяс, кыдзи и көсйысисны, мавтісны пыжсё турунвиж краскаөн. А Данила пыж нырө отар-мөдарас ыджыда еджыд краскаөн гижис: Бригантина.

Мичмөдөм «Бригантина» куйліс утъяс вылын. Пыжыс лои дась петны ылі и маті туйө. Шывгыны ю кузя, водзсасьны ваыслөн визувлы.

Керка кыпөдны көсйөм

Данилалөн пөчыс лөсьөдчис лэччыны гортас. Тымас пө гөститны, колө град выв пуктасьяс лөсьөдны. Ёшинь увсө зырийөн небзьөдны. Тулыснад уджыс уна. Данила мамыскөд да Лизуккөд кольөдісны пөчсө автобус дорө. Кор пөчыс кутліс найөс да пуксис автобусас, зонка матыстчис ёшинь дорас да нөшта өтчид гораа көсйысис:

— Баб, виччысь, каникульяс дырйи вола гөститны!

Пөчыс кыліс да юрнас докнитис. А кор вөрзис автобусыс, Данила бергөдчис мамыс дорө:

— Лэдзлан өд карас?

— Мый батыд шуас,— вочавидзис мамыс.

Данила рытнас жө көсйысис сёрнитны батыскөд. Сылы зэв окота лэчывны пөч дорас, воыны карө. Гулайтыштыны карса

уличаяс кузя. Пыравны сэтчөс лавкаясö. Карыс сійөс кыскис сöмын регыдик кежлö. Сылы кажитчö овны аслас чужан сик-тын.

Та вöсна Данила пыдди эз пуктив мамыслыс броткöмсö. Көть и унаыс кывліс, кызди мамыс шуавліс батыслы. Дыр-ö пö нöшта тані кутам овны. Челядь быдмöны, налы колö бурджык велöдчанін. Колö пö кар бердас матöджык овмöдчыны. Сэні пö ёна торъялö олöмыс ичöt сиктын дорыс.

Батыс кывзіс, но нинöм водзö эз нуöд. А öтчид локтіс удж вылыс да пöрччысигмозыс ачыс мöдіс норасыны:

— Дзикöдз дöзми монтёрнас уджавны. Инженерö велöдчи, а кымынöд во нин би сюръя йылын öшала. Колö мунны, гашкö, карсыс бурджык удж сюрас.

— Ме важөн тэныд мойда,— пачводз дорсянь шыасис мамыс.— Ичöt сиктад кыс бурджык уджыс. Он кө мун, сюръя йылад и пöрысьман.

Данила тайö сёрнисö кывзіс, но сылы кажитчис, мый мунöмыс коркö на лоö. Гашкö, школасö удитас на помавны. Та вöсна бать-мамыслөн сёрниыс вежöрас эз пыдöдз ийдж. Нöшта öні, кор дасьтісны «Бригантина» пыжсö. Гожöмбыд позяс чери кыйны Васьö другыскöд. Бөр-водз лэччылас пöч да ыджыд ай дорö и пыр жö локтас. Чери кыйны катасны.

Öти асылö Данила котöртис Лиза чойыскöд школаö. А батыс мöдöдчис карö, бөр-водз пö ветла. Локтіс рытнас да порог дорсянь ошйысис:

— Всё, ньöби му участоксö. Кар бердыс, ыджыд айсяньыд абу ылын. Местаыс бур, кутам керка кыпöдны.

— Таво жö босьтчам,— радлыштис мамыс.— Дона-ö муыс?

— Дона, став сьöмсö видзи,— вочавидзис батыс.— Коли сöмын брус ньöбöм вылö.

— Мый вылö нö медалам тшупсьысысö?— чуймис мамыс.

— Медалам? Ог, ми асьным кыпöдам,— вашмуні батыс.— Данила да ме. Нöшта ыджыд айыд отсыштны көсийс.

Данила нинöм эз вевъяв шуны. Сійö весиг эз вермы мöвпыштны, мый кутас вöчны керка лэптигөн. Коркö эськö сиктсыс аддзыліс жö, кызди керкасö лэптисны. Но тайö вöлі керйыс. Öтияс керсö кыпöдісны, мöдъяс нитшсö пукталісны, а коймöдъяс писькöдчисны да тувъяссö сюялісны.

Батыслөн кывъяс бöрын сылы пыр жö дум вылас уси «Бригантинаыс». Зонка чушкылтчис: лэччас кө керка кыпöдны, оз сюр пыжнас ю кузя катны. Васьö öтнас кольö. Дай гожöмбыднад пыжсö вермасны гусявны. Матыстчис батыс дорö да шуис:

— Сöмын регыдик, ме дырсö ог эшты. Меным чери кыйны колö.

— Тэ жö ачид öні на вöйысин пöчыд дорö,— чуймис мамыс.

— Вöйыси регыдик кежлö. Куим лун, мися, гуляйта, и бөр локта.

— Ог тöд, дыр-ö тырмас, но куим лунсьыд, тöдöмыс, ёна дырджык,— вочавидзис Данилалы батыс.— Дай ми ог гуляйтны кутöй. Бурджык восьты компьютертö да интернетсьыд видзöдлам, кызди йöзыс стрöйтчöны.

Рытьяснас Данила батыскöд пукалісны компьютер сайын. Интернетыс корсялісны гижöдъяс да снимокъяс, кызди керкасö

кыпöдны. Арталісны, уна-ö брус, тьöс-плака ковмас. Думайтісны, босьтны нитш либö джут выlö лэптыны. Шуисны вöчны кык судтаöс, медым быдöнлөн аслас торъя жыр вöлі. Весиг Васька каныслы торъя жыр вичмöдны көсйисны.

Урокъяс бöрын Данила Васьö друтыскöд лэччывліс ю дорö. Найö быд пöрйö мерайтлісны, уна-ö чинöма ваыс. И кымын ёнджыка ямис юыс, сымын жугыльдзык лои Данила. Сылы эз вöв окота дыр кезлö мунны.

А öтчыд зонкаяс матыстчисны пыж дорас да шемöсмисны. Пыжыслөн пыдöсыс вöлі розя. Буретш сійö местаас, кытчö пöв помсö тувъявлісны да йитвежсö дзижалісны. Пыж бокун туплясис нетшыштöм пöвйис.

— Коді тайöс вöчис?!— горöдіс Данила.

— Ничего себе!— рочыштіс Васьö.

Кык друг гöгралісны пыж гөгөр да öта-мöдыслысь юасисны, коді вермис налы та ыджда пакöстьсö вöчны. Воськыда кодöскö мыждыны эз вермыны. Некод тöд выlö эз усь. Да и кысь верман веськыда шуны. Эз суны öд лёк вöчигас.

Зонкаяс шуисны выльысь дзоньтавны пыжсö. Кайлісны гортас да вайисны дзижасян утварсö. Тувъялісны пöв помсö да дзижалісны. Та бöрын көсйисисны быд лун сюсьджыка видзöдны пыж бöрся.

Ю дорö волігөн сёрнитісны керка стрöитны босьтчöм кузя. Майшасисны, дыр-ö тырмас сійöс лэптыны.

— Гашкö, оз дыр тырмы,— такöдіс другсö Васьö.— Локтан, да удитам на катлыны ю йылас.

— Ме думысь, дыр лоö. Интернетысь видзöдлі, да уна уджыс,— вочаасьліс Данила.

— Ме виччысьны мöда. Пыж бöрся видзöда, медым оз гусявны да нöшта жугöдны,— көсйисис Васьö.

Кор сиктсаяс заводитісны картопель пуктыны, Данила батыскöд тшöтш петіс öшинь улас. Таöдз найö градсö водзвыв гöрисны. Небзьöдöм мусö батыс кодйышталіс, а зонка чöвталіс картопельсö. Зілис пуктавны небыдджыка, медым ныръяссö не чегъявны.

— Вот пуктысям, помалан велöдчан восö и лэччам ыджыд ай дорад,— уджалігас шуаліс батыс.

Данила кывзис, юасис, кыдзи мöдасны керкасö лэптыны. Öта-рö майшасис, гашкö, гожöмбыд пö лоö стрöитчыны. Батыс такöдіс, сэк жö шулывіс, мый оз на тöд, дыр-ö тырмас. Ыджыд айыд пö бурджыка тöдö.

Пыж жугöдöм

Коля Майбуров воис гортас да петкöдліс косяссьöм гач коксö мамыслы.

— Васьö понсö усьöдіс,— норасис сійö.— Нинöмсьыс, мед ог некодлы висьтав, мый найö Данилыскöд пыж гусялöмаöсь.

— Адöй,— шлапкерис бокъясас мамыс.— Мый ыджда косялöма. А кутшöм пыж гусялöмаöсь, кытысь?

— Пу пыж, берег дорас куйлö.

Коля, ассянныс содталöмөн, висьтавліс мамыслы зонкаяскöд

паныдасъләмсө. Быттьö сы былö найö көрт лөмөн усьласисны, понсö усьöдiсны. Грöзитчисны нöйтны, удтас кө кодлыкö.

Мамыс кывзiс да шензис, сэсся пиыс моз жö шеныштiс ки-
нас:

— Öнi жö участкөвöйлы норася. Рөзбойникъяс быдмöны!

— Эн норась, ме ачым найöс велöда. Тöдны кутасны, код
былö воны!

— Ладнö,— кутыштлiс писö мамыс.— Тэ ыджыд нин, налы
водзöссö ачыд сетан. Пөрччы гачтö, дöмышта.

Коля Майбуров олiс мамыскöд кыкөн. Батьсö сiйö оз тöд.
Мамыс шулiс, мый вөрөг пуля помысь кулi. Бöрынджык öти
пöчсянь кывлiс, мый тюрмаын ловсö сетöма. Коля заводитлiс
юасыны мамыслысь, но сiйö öлöдiс. Сывъялiс писö да шуис:

— Тэ менам, ме тэнö некодлы увтыртны ог сет и некодлысь
нинöм эн кывзы.

Коля радейтöмсö да лелькуйтöмсö чужöмсяньыс тöдлiс. Мый
чöскыдыс, мый мичаыс — ставыс сылы. Школаö пыран кад во-
ис, да мамыс весиг уджсö вежис. Почтальоналö вöлi да эновтчис.
Пырис школаö пелькöдчыны, джодж мыськавны. Медым дон-
торйыскöд матынджык лои. Квайтöд классöдз ки пöлöдыс шко-
лаö новлöдлiс. Сöмын пиыс öлöдöм мысти дугöдчис: зонкаяс пö
сералöны.

Бөръя кадö Коля тшöкыда ю дорö лэччылiс. Вартчыны сiйö
оз куж. Но таво гожöмнас аслыс шуис, мый велöдчас.

Öти лэччылiгөн и паныдасис Васьöкöд да Данилакöд. Сутугаөн
ыршасьöмсьыс да понлөн гач косялöмысь Коля Майбуров ёна
дöзмис кык друг былö. Скöрыс пытшкöсас пуис. Думайтiс, кыдзи
водзöс босьтны.

Лыддысьысь тöдö нин, кыдзи кык друг аддзисны жугöдöм
пыжсö. Да сiдз и эз вермыны туявны, кодi пакöстьсö вöчис.
Найö мыйлакö эз виччысьны тайöс Майбуровсянь.

А делöыс вöлi тадзи. Öтчыд, пемдандорыс нин, Коля Майбу-
ров лукйысис сарайын. Видзöдалiс, кутшöм инструментъяс куй-
лiсны джаджйын. Аддзис көрт тув нетшкысян да босьтiс киас.
Бергöдлыштiс, көсйис нин бөр пуктыны важ местаö. Но друг
юрас чужис мөвпыс, кыдзи водзöссö босьтны. Дзебис нетшкы-
сянсö пинджак пöла улас да тэрыба лэччис ю дорö. Видзчысьö-
мөн матыстчис пыжлань. Сулыштiс, кыйкнитлiс öтарö-мöдарö:
эм-ö кодкö матiгöгöрын. Некод син улö эз усь. Босьтiс веськыд
киас лөмсö да суйыштiс йывсö пöв пом улас, мыйөн пыж
розьсö вöлi дөмöма. Песовтiс, перйис пöвсö да шыбитiс бокö.
«Öнi гуляйттöм лоö»,— скöрысь думыштiс.

Коли кад, Васьö да Данила вунöдiсны нин Коля Майбуровкöд
ю дорын паныдасъләмсö. Но Коляыс помнитiс. Сiйö некыдз эз
вермы öвсьыны. Кор аддзис, мый зонкаяс выльысь дзоньталiсны
пыжсö, мөвпыштiс выль пакöсть йылысь. Кывлiс Данилалысь
гортас воөмсö да, нöшта мый чери кыйны мöдöдчöны, ёнджыка
на кутiс думайтны налы лёк вöчöм йывсьыс.

Öти рытö кыйöдiс, кор Васьö каяс ю дорысь. Видзчысьöмөн
матыстчис пыжлань да көрт тув перъялан лөмнас песовтыштiс
пыж пыдöсысь пöв помсö. Лои векныдык кост. Костас сюялiс
сөй да йитвежсö чуньнас мольöдiс. Сэсся вывсяньыс мавтiс гу-
аш краскаи. Мед некутшöма эз торъяв пыжыслөн рöмысь. Öнi

медым казавны, колё зэв сюся видзодны пёв пом гөгөрыс. Майбуров ачыс видзодалис и коли дөвөльнөй. «Оз казавны, мед юас польодчыштасны»,— водзвыв нимкодясис сійө. Сылөн чайтөм серти, ваыс оз пыр жө ну сёйсө пёв костсыс. Мыйтакө пыжнас позяс катны. Майбуров думнас көсийс, мед пыж пыдөсыс сиктсянныс ылынджык воссяс.

Данилалөн тувьяс

Муртса помасис велөдчан во, ая-пия сөвтисны машина мышкө инструментъяс да төвзисны кар бердө, вель стрөйтчанінө.

Ыджыд айыс да бабыс олісны карбердса сиктас важөн нин. Найө радпырысь паныдалісны Данилаөс. Гөгөр бергөдлісны, тапйөдлісны мыш кузяыс. Ыджыд айыслы нимкодь, мый внукуыс воддза волөмсянь төдчымөн быдмыштөма да ки сөныс ёнмыштөма. Зонка яндысигмоз вашъяліс. Көрліс чангыля беринось нырсө да малыштліс кинас русыд юрсисө.

— Быдмыштөмыд,— нөшта өтчыд видзөдліс сы вёлө ыджыд айыс.

Но бабыс пыр и ропкыштіс:

— Ичөт на, кутшөм стрөйтчысь, муртса кыш пиысь петөма.

— Мужик өд, мед ичөтсяннь велөдчас,— шыасис батыс.

— Медым,— кывкөрталіс ыджыд ай.

Мөд луннас найө куимөн босьтісны зыръяс, черъяс. Сөлісны ыджыд айыслөн важиник узикө да мунісны вель стрөйтчанінө. Налы колө пасъявны керка подувлысь ыдждасө. Гөгөрыс кодйыны метра джын содта канава да тыртны сійөс шавъялан лыаөн. Ыджыд айыс шуис: тадзи пө вөчам, медым төвся кыныс керкасө оз мөд новлөдлыны.

— Кыдзи кыныс вермө керкасө кыпөдны?— юасис Даньө.— Керкаыс жө зэв сьөкыд.

— Мороз пөлыслөн выныс вывті уна. Нөшта на ыджыдджык керка новлөдлө,— висьталіс ыджыд айыс.— А новлөдлігас стрөйбаыд вермас вежыньтыны, өдзөсьясыд оз мөдны сиптысьны. Медым тайө эз ло, колө шавъялан лыасө подулас пуктыны. Сэки зэр ваыс да мупытшса ваыс исковтасны, нинөмлы лоө кынмыныс. Ёд буретш ваыс кынмигас паськалө. Школаад эз өмөй та йылысь висьтавлыны?

— Ог помнит, ме, гашкө, сэки виси. Эг волы школаас.

— Сідзкө, өні кывзы да велөдчы,— зырсө сатшкигмоз велөдіс ыджыд айыс.

Данила кывзіс да верстьөяскөд өтвылысь кодйысис. Сөмын пөсьсө чужөмсьыс дөрөм соснас чышкыштас и бара зыр воропө кутчысьө. Дерт, эз зыр тырыс босьтав мусө. Ыджыд айыс өлөдіс: эн пө уна босьтав, гөйыд вөрзяс.

Вежон ноксисны найө. Лөсьөдісны ставсө, мый колө, медым бура керка подувсө вөчны. Каржаа бетон кисьтөм бөрын шуисны вичысьлыны бетонлысь кутчысьөмсө да ёнмөмсө.

Сэк кості, вель керка местасянь неылө, мужикъяс лэптисны пывсян. Да-да, мужикъяс. Первойя луннас жө, кор воисны кодйысянінсяныс, пөчыс Данилалөн шуис:

— Нолтö, мужикъяс, куимнанныд зiля мыссьö да ужнайтны пуксьöй. Пывсян ваймöма.

Данилалы таысь лои нимкодъ. Быгтьö верстьöяскöд радысь лои. Весиг, кор батыс пывсигöн койыштiс пач горъяс пöсь вассö да пöсьыс сотыштiс пельяссö, эз мöд лябны. Эз пышйы корöсянiнсьыс. И гортас пывсянсьыс öтлаын ськöд кайис.

Ставöн виччысисны брус вайöм. Вылъ пывсян лэптiгöн на батыс телепон пыр сёрнитiс та кузя. Тэрмöдлiс öдйöджык пилитны: отпускöй пö помасяс да ог удит керкасö кыпöдны.

И со лун-мöд мысти ыджыд машинаöн вайисны брус. Данила видзöдiс, кыдзи машинавывса краныс ачыс ректiс бруссö водзвыв вольсалöм утьяс вылö. Краныс босьтас некымынöс öтпырйö да ньöжйöник пуктö. Регыдöн утьяс вылын лои кык ыджыд чукöр.

— Тайöс тадзи кольны оз позъ, колö лöсьыда тэчны,— шуис ыджыд ай.

— Мыйла?— чуймис Данила.

— Он кö тэч, брусый шыгыртчас да бакшасяс.

Ыджыд ай да Данилалöн батыс пыр жö заводитiсны лöсьöдны выль места. Найö пуктiсны подувы вылö кыз керъяс. Медым пö улiöдыс тöлыс бурджыка ветлас да бруссö косьтас. Сэсся сёр рытöдз тэчисны брусъяссö. Öта-мöдыскöд косталöмön рад вöчасны, пукталасны тьöскысь пилитöм рейкаяс да на вылö мöд рад тэчöны. Тадзи кайис бура ыджыд кык чукöр. Зэръясысь найöс вевтисны плёнкаöн.

И эз весышöрö. Поводьяыс мöд луннас дзикöдз тшыки. Енэжыс тупкысис кымөръясөн. Лун кост мысти заводитiс зэрны. То гымön да чардөн, то арын моз буситö. Зэрыс ёна падмöдiс стрöйтчысьясöс.

— Висьталiсны, кос гожöм пö лоö,— небесаö индылiс ыджыд айыс.

— Некод нинöм оз тöд, мый Енмыс шуас, сiйö и лоö,— во-чаасьлiс бабыс.

Зэр вылö видзöдтöг öблöжитчисны, быдса лун тырмис. Данила эз тöд, мый тайö лоö, да сюся кыйöдiс батыслысь да ыджыд айыслысь мошкоритчöмсö. Öблöжитчöм бöрын заводитiсны керкасö кыпöдны. Зонка оз на лючки гөгöрво, кыдзи колö керка пельöссö тшупны, кыдзи бруссö öта-мöдыскöд йитлыны. Ставыс кажитчис сьöкыдөн, дзугөн. Кутiс юасьны, но ыджыд айыс сöмын мудера видзöдлiс сы вылö.

— Данила, тэныд сетам медся кывкутана удж. Кутан тувъяс вöчавны. Лок петкöдла, кыдзи вöчны.

Ыджыд ай босьтiс ён весът кузя брус пом, чер да мöлöt. Петкöдлiс, кыдзи тувъяссö вöчавны.

— Кымын тув колö?

— Уна.

— Ме öдйö вöчала,— черö кутчысигмоз кöсйысис зонка.

Но абу на кокни вöлöм тувсö вöчны. Вöлöмкö, сöмын кажитчö, мый прöстöй уджыс. Данилалöн тувъясыс эз артмавны. Öтияс лоины вöснийсь, мöдъяс чукаясь. Ыджыд ай бөрйис бурджыкъяссö да торйöдiс. А чукаяссö да вöснияссö тшöктiс чукöртны мешöкö.

— Пывсян пачад шогмас,— вашмунiс сiйö.

Сэсся аддзис внукуслысь чушкыльтчёмсё да содтіс:

— Эн шогсы, өні бурджыка нин артмас.

Но здук-мод мысти Данила шуйга кисё топодомён матыстчис ыджыд ай дорё. Водз чуньыс вундыссьома да вир войталё. Зонка вирсё аддзис, да сёлёмыс пыр жё гудыртчис, лёк лои. Ыджыд ай казяліс тайёс. Кутыштёмён нуодіс внуксё машина дорё. Пуксьодіс, перйис аптечка да йодён мавтыштіс вундомінсё. Сэсся гартыштіс бинтён. Тшөктіс пукыштны машинаас, виччысьлыны, мед вирыс дугдас бинт пырыс сөдзтыны. Тайё лунё Данила тувьяссё сэсся эз вочав. Рытнас пёчыслы петкодліс доймём кисё.

— Нем виччысьтөг артмис,— асьсё дорйыштіс сійё.

— Эз кө дөбельки доймы, бурдас,— такөдіс пёчыс.

Асывнас ыджыд ай көсйис кольодны, мед пё шойччас да бурдодчас. Но Данила эз кольчы.

— Сідз бурдас,— өвтыштіс кинас.

Быдса вежон Данила вөчаліс тувьяссё. Велаліс, да найё артмалісны бура нин. Костас мыччаліс батыслы джут ёкмыльяс, пысавліс катлысян гезсё брус помё. Весиг зіліс кутчысьны брус помас, медым тшөтш отсыштны. Но ыджыд айыс пыр жё өлөдліс:

— Вешйы, дойман.

Данила таысь дөзмывліс. Сылы зэв окота гырысьяскөд радысь кайны сруб вылас да сэні выліас уджавны. Дзижгыны «Штиль» пилаён, кутчысьлыны ыджыд дрельё, босьтны стреплер да кутавны джутсё. Дай вылысянныс ставыс нин тыдалё. Весиг суседыслөн йөр пытшкыс да сэні кузь гөна понйыс.

Но ыджыд айыс поліс внук доймёмысь да быд пөрийё өлөдліс. Со и талун Данила чушкыльтчис, пуксис бокё да ичөтик вөласян пуртсё сатшйөдліс пөв помё. Сэсся пөв помас пуртнас парсаліс: «Дедушка — лох» да сатшкис сійёс лыа чукөр дорё.

Ыджыд айыс пажнайтігөн аддзис пөв помсыс гижөдсё да дөзмискодь.

— Бабыдлы норася.

— Но вот, нөшта и удтысьысь, быттьё нывка,— көрліс Данила нырсё да бергөдчис мышкөн.— Ог сэсся тувьяссё вочав! Дышөдіс өтиторсё помся вөчны. Тайё быдөнлөн артмас. Дай тувьясыс абу медся коланаөсь. Гортё бөр муна. А то купайтчыны ни вуграсьны тайё гожёмын эз сюрлы.

— Быдөнлөн тувйыд оз артмы. И тэныд ковмис велөдчыны. А керка лэптёмын тувйыс медся төдчана. Ме жё шулі, мый тайё медкывкутана уджыс,— воча такөдіс ыджыд айыс.— А мунан кө гортад, коді помалас? Тэтөг керкаыд оз эшты.

— Ылөдлан!

— Ог,— шуис дедыс да лючки висьталіс, мыйла тувьясыс лооны зэв коланаөн.

— Тувйыс кө оз ло, керкаыс олігас вермас киссьыны. Сідзкө, быть лоё тэныд кольчыны татчө,— помаліс сійё.

Данила кывзис, первойсё эскытёма, но бөрас гөгөрвоис, мый тувтөгыс стеныс вермас збыльысь вежыньтчыны. Сідзкө, оз прөста сійёс тувьяс отсөгөн лэптыны. Та бөрын эз кут ыждавны. Видзөдліс мыжа морт моз ыджыд айыслы синмас да прөща коригмоз индіс пөв пом выло:

— Дедушка, ме сэсся некор татшөмсö ог гиж.

Мöд луннас батысö телефон пыр корисны удж вылö: колö пö авария бырöдны. Гымньöв лыйлöма, фарфорöвöй кутöдъяссö сюръя вывсьыс жульöма. Гашкö, вежон тырмас ноксыны. Батя-пия пыр жö мöдöдчисны гортö.

Эз удайтчы

Муртса воисны ас сиктö, Данила пырысь-пыр котöртис Васьö друг дорö. Васьö буретш вöли öшинь улас, пон чом дорын йöжгы-лясьö.

— Привет!— горöдис Данила.

— Привет!— радпырысь вочавидзис Васьö.— Сы дыра эн лок. Гожöмыс кольны кутис.

— Тэ думайтан, öти лунön керкаыс кыптас?— ыджыд ай мозыс вочавидзис Данила.

Васьö татчö воча нинöм эз вермы шуны. Сийö ачыс оз тöд, кызди керкасö стрöитöны. Та вöсна сёрнисö мöдарö бергöдис. «Бригантина» йылысь висьтавлис. Унаысь лэдзлöма ю вылö. Но ылöдз абу катлöма. Полöма öтнас петны ыли туйö Данилатöгыс. Ёна виччысис сийöс. Быд паныдасигөн юасьлис Анна тьоткалысь:

— Данилаыд оз на лок?

— Оз на, уна на уджыс,— шулывлис мöдыс.

И со другыс танi. Позяс лöсьöдчыны да катны ком вугравны. Шуöны, шедö пö. Васьö вöли майшасьö нин: ставсö пö кыясны да налы оз коль.

Буретш пуксис мича поводдя. Шондiыс бура шонтö да косьтö. Сиктсаяс уськöдчисны турун пуктыны. А посни челядь купайтчисны, сьяльöдчисны ляпкыдiнын да лыа вылын гожйöдчисны.

Васьö да Данила шуисны аски жö петны туйö, войколөн ветласны. Öд регыд Данилалы бара лö мунны керка стрöитны. Зонкаяс босьтисны сёянтор, пöрт, тасьтi-пань да кружка. Ставсö тэчисны нопйö. Ичöтик зептö Васьö суйис истöг көрöб. Вугыр шатинъяссö көртыштiс пыж дорышö. Данила вайöма ассыйс тув вöчалан черсö да тшöтш аскöдыс босьтис. Пуктис сийöс пыж пыдöсö тувъялöм ящикö. Васьö вöли вöчöма, вевта и быдөн. Веси-г томлавны позис. Сэтчö жö тöрöдис нидзув дозсö.

Васьö сёрсыйс вайöдис понсö. Кор лэдзисны пыжсö ва вылö, сийö корис понсö пуксьыны пыжö. Но Бимыс сöмын увтчис да эз көсйи пуксьыны пыжас. Васьö ёна чуксалис, но ставыс весьшöрö. Бим матыстчылас пыж дорö да никсiгтырйи бöр öдöбтас эжа вылö. Кор другъяс босьтисны кианыс пелысьяссö да вöрзисны катны, понйыс берег пöлöныс на бöрся вöтчис. Сувтыштлас, увтыштас и бара вöтчö. Мыйкö ас ногыс висьталис зонкаяслы. Но найö сийöс эз гöгöрвоны.

Данила пыж бöжын сынö и веськöдлö. Васьö шöрас пукалö, кык лопта пелысөн сынö. Пыжыс кокныдык, лöсьыда мунö. Бокъясас шлопöдчисны посныдык гыяс. Гыясыс весиг неуна пыжсö кыпöддывлисны. Зонкаяс сынигмозыс видзöдалисны берег пöлöнысь бадь кустъяс, кызд пуяс да посныдык кушинъяс.

Ывлаыс ставыс быттö сёльöдчö шоныд зарниасыйс посныдык гыясөн да шондi югöрөн. Кызд пулөн шпорöдчысь корйыс.

На улын веж туруныс тшөтш быттьö гыалö-ворсöдчö юыскöд öтвылысь. Шондi югöрыс котöртö дзоридзьяс кузя да вошö кöнкö пыдiас, дзик рас дорас. Сiйö вылысянь нюмъялö став ловъя ловлы, шонтö найöс да лелькуйтö. Берегсянь öвтö дзоридзьяслөн чöскыд дук, окота апавны морöс тырнад, кыскыштны ас пытшкад да весиг мыйтакö кутыштны.

А кöнкö ылын кылö кöклөн кöкöмыс: «Ку-ку, ку-ку!» И став тайö мичлунысь зонкаяслы лов вылас сэтшöм кокныд да долыд, мый окота лои сынны и сынны ю кузя. Воöдчыны сэтшöм меса-таясöдз, кытчöдз найö эз на волыны. Аддзывны да тöдмавны уна выльтор.

Но став тайö мичлуныс да долыдлуныс быри öти здукөн. Кор юыс кутiс чульöддыны, а визулыс содiс. Кор зонкаяс адзисны пыж пыдöсысысь васö. Данила повзьöмөн горöдiс:

— Пыжыс пысьтiс! Мыйла?

— Ог тöд, ставыс лючки вöли.

— Босът кансер банкасö да гумлышт васö,— тшöктiс Данила пыж нырсö береглянь веськöдiгмоз.

Васьö зiля коясис. Данила мый вынсьыс сынiс береглянь. Метра дас, дас кык эз воны. Пыж пыдöсöд другөн ыльöбтiс ва-ыс. Воис зонкаяслы морösöдз. А сэсся пыжыс на улысь воши. Визулыс сiйöс мöдiс нуны ю шöрлянь. Другъяс уськöдчисны вартчыны пыж бöрся. Вöтöдiсны да öтар киөн кутöмөн заводитiсны сынны береглянь. Пелысьясыс кывтiсны водзö. Но Буско аддзис тайöс да уськöдчис ваö. Вартчис öдiйö, суöдiс Васьöлысь кык лопта пелыссö да курччис. Сэсся вомас кутöмөн вайöдiс берег дорö. Пöшти öтпырiйö ськöд воисны зонкаяс. Найö пыр жö лэптiсны пыжсö эжа вылö. Путкыльтiсны, кутiсны видзö-давны.

— О-о,— чуймис Данила.— Дöмас пöвйыс пыж пыдöсыскöд косталöма.

— Вот тайö да!— вочаасис Васьö.— Пöвйыс ачыс эз костав, кодкö песовтöма.

— Кодi?

— Тöдi кö эськö..!

Зонкаяс пöрччысисны, пыдзрасисны да öшлiсны ва паськöмсö кустьяс вылö. Сэсся Данила копыртчис да пыжыслысь быд тшупöд мöдiс сюся видзöдны. Öтилаясь, пöв костысь, аддзис сёйсö. Но тайö сылы нинöм эз висьтав. Думыштiс, мый пыжсö берег вылас кыскигөн сёйыс вермис костас пырны. Васьö тшöтш туясис.

— Кодкö миянлы пакöститчö,— чорыда шуис сiйö.— Мöдöдысь öти месаöд жугалi.

— Мый кутам вöчны?

— Дзоньгасьны,— шуис Васьö.— Ящикас важ дöра тор вöли, сiйöс сюялам.

— Но öд сöдзтыны ваыс мöдас. Мыйöн васö пыж пыдöссьыс коялам?

— Кружкаыд öд коли. Дай, ме думысь, оз ёна сöдзты.

— Кöть и оз, век жö бöр гортö ковмас косны,— Данила ышловзис да разис сутуга помсö, мыйöн гартыштлис ящик про-бойсö томан пыдди.

Перйис дöрасö да пыдзыртiс. Косявлiс торъя лестукъяс вылö.

Лестукъяссö сюялісны пöв пом да пыж пыдöс костö. Данила босьтіс ассьыс черсö да вачкышталіс пöвійö, көрт тув местаясö. Йитвежыс топаліс. Зонкаяс нöшта öтчыд видлалісны гөгöрбок да шуисны, мый гортöдз воасны. Водісны эжа вылö да кутісны виччысьны паськөм косьмөм. Шондіыс да тöлыс öшлөм көлуйсö öдйö шурöдіс. Регыд мысти Васьö чеччис да видліс.

— Косьмөма.

Другтяс пасьтасисны да лэдзисны пыжсö ю вылö. Сатшкисны пыж кутöдсö берегö. Шуисны виччысьлыны, письтас оз пыж пыдöсыс. Восьтісны нопсö, перйисны кружка да сёянсö. Няньыс вöлі нильзьöма. Дай мукöдторйыс тшöтш көтасьöма. Нинөм вöлі и думайтны водзö катөм йылысь. Нильзьöм няньсö Васьö пуктіс пыж нырö, шонді водзö, мед пö косьмыштас. Мөдысь коляс дорын пö чиръям, медым чериыс бурджыка локтас. Орччөн, шонді водзö жö, пуктіс косьтыны истöг көрöбсö.

Зонкаяс видзöдісны пыж пыдöсö. Ваыс, кыдзи и чайтісны, сöдзтіс. Но коясьöм сорөн позис воöдчыны гортöдзыс. Данила чернас керыштіс вöсньыдик пипу, зіб пыдди, öд налөн коли сöмын öти пелыс, кык лоптаыс. Васьö сынас, а Данила пыж бөжын пукалас. Зібнас веськөдлас да тшöтш отсаяс сынны.

Кывтны увлань тöдчымөн кокньыдджык и öдйöджык. Бим котöртіс берег пөлөн да увтчис. Весиг панийліс пыжсö. Бөжсö легöдөмөн видзöдывліс зонкаяслань. Тыдалö, нимкодясис бөр гортö локтөмысь.

Первой мыччысис сиктыс, а сэсся лыа көсаыс. Лыа вылын пуртікасисны пасьтөм челядь. Кодсюрö юас бызöдчисны. Коді кыз кужö, сідз и вартчö. Данилалы син улö шыбитчис ю шöрас вартчысьыс. Мыйкө вывті тешкодя вөрöдчö. То пон моз бызöдчыштас, то сунлас, юрнас ва пытшкö бердлас. Весиг серамыс Данилалөн петіс.

— Видзöдлы сы вылö,— индіс Васьöлы ю шöрö.

— Вöйö, буракö!

И сэк жö ю шöрын вартчысьыс дзоньнас бердліс ва пытшкö. Быльснитіс-петіс да лёкысь чилöстіс:

— А-а-а!

Васьö пырысь-пыр мөдіс сынны пикö воөмалань. Воисны да шай-паймунлісны. Пöгибö воөмаыс вöлөма Коля Майбуров.

Данила мыччис Колялы зібсö да тшöктіс кутчысьны. Коля пыр жö шашаритчис зібьяс. Весиг эз лэччысь сэк, кор берег дорас нин воисны.

— Лэдз зібсö,— тшöктіс Данила.

Коля лэччысис да кутіс дорйысьны: көдзыд пö ваыс да йöрсөн кокöс кутіс.

— Эн ылöдчы, ваыс шоньд. Он куж вартчынысö!— вильыша горöдіс Васьö.

Коля Майбуров öшöдіс юрсö. Синтяссö дзебөмөн сэсся босьтіс лыа вылысь дөрөм-гачсö да надзöникөн мөдöдчис гортас. Яндзимыс, лöглуныс, öбидаяс — ставыс сы пытшкын öтлаасис да сотчис-ыпъяліс. Кык друг нюмъялігтыр видзöдісны сылы мышкас. А Бим бара уськөдчыліс увтны, но Васьö падмөдіс.

— Бим, он лысьт!— горöдіс сійö.— Лок ме дөрö!

Зонкаяс лэптисны пыжсö важ местаас да путкыльтісны утяс вылö. Шуисны кайлыны гортас, нурьясьыштны да выльысь

дзоньтасьны. Черисö кыйны катасны аски асывсяньыс. Кыдз шуисны, сідз и вöчисны. Данилалөн мамыс эськö заводитліс öлöдны мунöмсьыс, но батыс пиыс дор сувтіс.

— Мед ветлас,— шуис сійö.— Выльлунö бара керка кыпöдны мунам. Менö удж вывсянь лэдзисны.

Вуграсьны ветлём

Выльлунö Данила батыскöд асывсяньыс лöсьöдчис петны туйö. Машина бöжö сөвтисны вöчасян да мукöд кöлуй. Зонка пуктіс асьыс тув вöчалан черсö да плёнкаа пакетын кыйöм черисö.

— Гөстинеч бабушкалы да дедушлы нуа,— шуис сійö мамыс-лы вуграсянінысь воём бöрын.

Кыйдöссö чери кыянінысь воёмкöд тшöтш ректіс тазйö да юкис шöрипöв: джынйыс пö аслыным, мöдыс бабушкалы.

— Кыкысь жаритны позяс, молодец,— ошкыштіс мамыс.— Гөстинечтö колö нуны. Час, нöшта ас вöчöм вый тöдсаяс сетыштісны, сійöс пукта да яй тор на со тані.

Зонкалы мамыслөн ошкöмьд кажитчö. Черисö керигөн кöс-йысис на катыны ю кузя.

— Керка кыпöдöмыс эштас, да Васьöкöд бара на черисö кыям,— шуис сійö.

Вуграсьны ветлöмыс налөн век жö артмис. Коля Майбуrowöс ю вылын мездöм бöрын Васьö да Данила выльысь тупкисны пыж пыдöсысь розьсö да дзижалісны. А мöд лун асывводзö бара мöдöдчисны туйö. Та пöрийö Васьö асьыс понсö эз босьт: увтны пö кутас да чериыс повзяс. Сынісны кыкнанныс. Васьö батысылысь корöма выль пелыс, важ пыдди, мыйöн кывтлісны воддза катлігөн. Та пöрийö пыжсö ваö лэдзтöдз сюся видзöдалісны. Корсисны, эз-ö кодкö жугöд либö кутшöмкö пакöсть вöч. Öні некыті эз письт. Лючки воисны вуграсянінöдз.

Зонкаяс пыж нырсö кыскыштісны векньыдик лыа кöса вылö да сатшкисны муас кöрт кутöдсö. Неылын, джуджыдінас, кодкö вöчлöма коляс. Колясыс важмöма нин. Тані талун некод эз вöв. Сöмын бипур места висьталіс, мый кодкö регыд на войпукöма.

Другъяс эз кутны нöрзыны. Пыр жö босьтісны вугыр шатинъяссö. Васьö перйис банкасьыс нидзувсö да тувкнитнс Данилалы:

— Видзöд, кыдзи колö самсö вугырас пысавны. Да эн вунöд куимысь сьöлыштны сам вылас.

— Эн велöд, ме ачым тöда,— дöзмис мöдыс.

— Тöдан дерт, коді велöдіс?

— Ачым велöдчи.

— А менö батьöй велöдіс,— миритчигмоз шуис Васьö.— Чöвтам сама вугыръяссö, а асьным бипур лöсьöдам.

Зонкаяс шыбитісны сама вугыръяссö коляс дорö. Шатинъяссö пуктісны вожа пу вылö, а помсö сатшкисны муас. Данила босьтіс черсö да мöдöдчис раслань. Васьö вöтчис бöрсяньыс. Найö чукöртісны кос пуяс, усьласьöм увъяс. Данила чернас перйис сямöд. Кыйсянінö вайисны чукöртöм пуяссö да посьнöдлісны. Васьö пыр жö лöсьöдіс бипур да öзтіс сямöдсö. Бипурыс яра

ломзис. Данила босьтис пыжысь пёртсö да гумовтис юсьыс сöдз васö. Сэсся öшöдис пёртсö бипур весьтö. Кор чайыс пузис, зонкаяс пажнайтисны.

Пажын бöрын зонкаяс сулалісны коляс дорын, дзоргисны-видзöдисны табъяс бöрся, оз-ö дэбöд.

— Данила, лэпты, дэбöдö!— шöпкөмөн тшöктис Васьö друтыс-лы, кор казяліс, кызди табйыс дзумгысис ва пытшкö. Данилалы шеді мык.

«Кужтöмъяслы пö пырджык везитö»,— ас кежын бать кывъ-яснас шуасис Васьö. Но сылы жугыльтчынысö нинöмысь на. Регыд мысти и сылы дэбöдис. Вель ыджыд кельчи кыпöдис.

— Ас кадö на локтім,— радлыштис Васьö.

Та бöрын нöшта на сюсьджыка видзöдис ва веркөсö. Кор аддзис, кызди табйыс неуна вöйыштис, весиг кутыштис ловсö. А кодыр табйыс дзумгысис ва пытшкö, кыскыштис асланыс вугыр шатинсö. Вöсньыдик шатиныс кусыньтчис, жилкаыс зэаліс. Васьö гөгөрвоис, мый вугырас шедöма ыджыдкодь чери. Та понда весиг пöсьö шыбитис — мед эськö эз жö мын чериыс!

Зонка видзчысьмөмөн кыскыштис жилкасö асланыс. Пидзöсчанысис, пуктис шатинсö бокö да заводитис кияснас кыскыны. Берег дорас мыччысис вель ыджыд ляпа. Васьö öтар кинас зэлöдис жилкасö, а мöдарнас кватитис черисö. Чабыртис сідз, мый чери пытшкас мыйкö трачмуні. Нимкодысла сьölöмыс чеччыны мöдліс, сы ыджда чери шеді. Васьö лэптыліс ляпасö юр вылөдзыс да ошйысис другыслы:

— Данила, видзöд, мый шеді!

Данила сöмын юрнас довкнитис. Сійö ачыс сюся кыйöдис табсö. Зонкаяс öта-мöд вежмөн мачалісны мыкъясöс, ляпаясöс да гөрд синма кельчиясöс. Лэдзалисны найöс капрон ведраын юысь гумовтöм ваö. Медым чериыс дырджык оз кув, öд гортö кывттöдз уна на кадыс.

Сэсся Васьölөн бара табйыс друг дзумгысис ваас. Зонка аддзис да пыр жö лэптис шатинсö, но чериыс сöмын мыччысьліс. Бөр тельсмуні ваас.

— Мыні, мый ыджда вöлі! Аддзылін, Данил? Гашкö, кило лоö!

— Эг, ме öд аслам таб вылө видзöді.

— Лёк, мый эн аддзыв,— жальпырысь шуис Васьö.

Та бöрын чериыс дугдіс шедны. Быттö ородісны. Оз дэбöд дай ставыс. Став няньсö нин чирийсны да шыблалісны ваас, медым чериясыс локтасны. Но весьшөрö.

— Тыдалö, мынөм чериыс аддзыліс мянөс да висьталіс мукö-дыслы,— кывкöрталіс Васьö.

Зонкаяс энөвтисны вугыр шатинъяссö. Көть и дугдіс сёйны, кыкнанныс радлісны, шедыштис чериыс да.

— Рыгнас да асывнас вуграсям на,— шуис Васьö.

— Вуграсям, дерт,— довкнитис юрнас Данила.

Рыгнас зонкаяс пукалісны берег дорын. Шлачöдчисны выльысь перйöм корöсьөн, öвтчисны номъясысь. Васьö бипурö пукталіс уль коз лапъяс, медым тшынас вöчны. Чужöмъяссö мавтисны ном лекарствойн. Но номъяс öтарö дзизгисны да нөрö-витисны сатшкысьны быд восьсаинö.

Сьöд войсö бипур дорö водыштісны. Первойсö шуштöмкодъ

вöлі. Зонкаяслы кажитчис, быттö орчча раскын кодкö ветлöдліс.

— Колöма Бимсö босьтны,— дөрöмсö лöсьöдігмоз шуис Васьö.— Понйыдкöд гажаджык.

— Ага, ме жö шулі, босьт, мися. А тэ — черисö повзьöдлас,— нерыштіс Данила.

— Ме öд эг думайт, мый гажтöм лоö,— дорйысис Васьö.— Босьт дінад чертö, а ме пукта пелысöс. Кодкö кö мыччыяс, повзьöдам.

Зонкаяс босьтісны ас дорас черсö да пелыссö. Куйлыштісны бипур выlö видзöдöмөн да тöдлытöг и унмовсисны. Садьмисны, кор шонді югöрыс вартіс ва веркöсö. Пыр жö босьтчисны шатинъясö. Чериыс сёйис. Зонкаяс бара мачалісны найöс. Шедліны и комъяс. Сэсся, кызди и воддза луннас, другөн дугдіс дэбöдны.

Васьö босьтіс киас чери тыра ведрасö да шуис:

— Гортö мöдам.

— Сьökыд,— радлыштіс Данила ассьыс чери дозсö видлігөн.

Сійö первойысь на черисö кыйис, и та мында шедіс. Нимкодъысла инас оз öшйы.

— Плёнка мешöкö ректа, мед йöзыс аддзыласны,— шуис другыслы.

— Эн,— öлöдіс Васьö.— Оз позь кыйдöснад öшйысьны. Оз кут шедны.

— Мыйöн тöдан?

— Батьöй висътавліс.

Данила ланьтыштіс, тыдалö, думайтіс, мый вöчны. Сэсся бөр дзевис плёнка мешöксö. Кывзысис другыслысь: гашкö пö, збыль оз кут шедны.

Ва ньылыдсö пыжыс кывтіс öдйöджык. Дай сынöмас этшаджык вын ковмис пуктыны.

Янсöдчигөн зонкаяс сёрнитчисны нöшта öтчыд ветлыны. Та пöрийö ичöt ю йылö, Нёбью кузя. А Данилалөн стрöитчигкості Васьö бурджыка видзöдас пыж бөрся. Мед некод нин оз пакöстит.

Мöдысь карö лэччöм

Батя-пия воисны ыджыд ай дорö пажын бöрын. Данила пырис керкаö, чери нопсö киас кутöмөн. Сылы окота öшйысьны. Та вöсна и кыйöм черисö ачыс пыртіс.

Ыджыд айсö босьтöма йöзви юкалöм. Гыррдза гөгöрсö мавтöма мазьөн. Мед пö шонтас да висьöмыс лэдзас. Бабыс сылысь сойсö важ чышгьянөн гартö. Кöрталігас ропкис:

— Сьökыдсö вöдитöмысь, абу нин том, мед керка стрöитны. Медавын коліс.

— Сьöмтöгыс кодöс медалан?— вочаасис ыджыд ай.— Öні ставыс сьöмö зурасьö, абу важся кад. Йöзсö помечавнысö сьökыд чукöртны, водзвыв тшупöмсö керсьыс лэптыны, а бруссьыд помечнад оз артмы.

— Сідзкö, мед чукöртöны сьöмсö да вöлись стрöитчöны. Керкаын öд олöны. Кар берд ковмöма.

— Тэ тай мунін жö сэтысь,— кыскыштіс ыджыд ай.

— Ме тэ бөрся вөтчи, кор удж пондаыд тэнö вуджөдісны,— эз сетчы баб.

Данила батыскөд пөрччысигмозыс шпыннылісны. Данилалы телепит ошйысны. Та понда матыстчис шуасьысыс дорö.

— Бабушка, эн венласьöй, бурджык гөстинецсö местит. А дедушкалы ме кута отсасьны. Сылы кокныдджык лоö.

— Со аддзан,— серөктіс ыджыд ай.— Кокньöдысьыс эм нин.

— Дедушка, эн серав, збыль öд шуа,— Данила кусыньтіс сойсö.— Со видлы сойöс, сөнöдыс эм жö!

— Эм, эм. Молодеч, мый отсавны көсьян,— кывкөрталіс ыджыд ай.

Виль керка дорын ставыс куйліс сідз, кыз кольісны. Öні коліс стен бердö сувтöдны утьяс. Воддза дорыс кузьджыкөс. Медым сы кузя позяс бруссö кыпöдны. Сэсся матысталісны брусьяссö утьяс дорö. Батыс ыджыд айыскөд кайисны сруб выlö. Вывсяньыс чөвтисны гезьяс. А Данила найöс пысаліс кыкнан брус помö да котөрөн тшöтш кайис выліас.

— Дедушка, вай гез помсö, тшöтш кыскышта.

— Вешйы, дойман!— кызди и пыр, öлөдіс ыджыд айыс.

— Эн пов, ог доймы,— Данила босьтіс гез помсö да тшöтш заводитіс кыскыны.

Öтарсö батыс кыскис, мөдарсö Данила ыджыд айыскөд. Сідз и катөдісны бруссö. Тэкöд пö кокныдджык и вөлöма, бөрас висьтасис ыджыд айыс. Сэсся тадзи катлісны бруссö сы мында, мыйта колö, медым керкаыслыс öти рад кытшовтöдны. Та бөрын Данилалы тшөктісны шойччыштны да тувьяс вöчавны. Öні зонка эз нин ыждав. Дай кызди ыждаван, кор верстьöяскөд радыс нин уджалö. Весиг пöсяліс бруссö лэпталігас.

Ныльöмсö плешсьыс чышкыштігмоз сійö матыстчис суседыслөн забор дорö. Забор саяс кыйöдчис кузь гөна понйыс да бөжсö легöдіс. Увтыштас небыдика да бара бөжнас люг-легвöчас. Быттьö здоровайтчис зонкакöд. Данила кыскис зепсьыс кос нянь тор, коді кольöма чери кыйöмсянь, да сетіс понйыслы. Понйыс кватитіс, азыма курччаліс. Сэсся нырсö мыччис забор костöдыс. Зонка малыштіс сылыс нырсö. А понйыс кисö нюлыштіс. Буракö, пасибö пыдди.

Данила вöчаліс тувьяссö да пукталіс чукөрö. Сэсся сөвтліс найöс кушмөм ведраö. Зіля кайліс поскöд да мыччыліс батыслы.

— Со мыйта вöчи!

— Молодеч,— ошкыштіс батыс.— Бура нин тувьяссö вöчалан.

— Мастер Данилаыс,— тшöтш шулывліс ыджыд айыс.

Зонкалы любö ошкөмсьыд. Сійö нöшта на бурджыка зільö тувьяссö вöчавны. Öні весиг чаг ёгыс этшаджык артмö. Дай бөрья каднас эз нин лөгасьлы ыджыд ай выlö.

А кодыр керкаыс кайис медвыліөдзыс, öкрупеньөдзыс, да сэсся вевт улö пырис, Данилалы лои нимкодь.

Лиза чойыслы, кор сійö автобусөн локтіс мамыскөд видзöдлыны налыс уджсö, ошйысис:

— Менам тувьясыс кутöны керкасö!

А батыс содтіс: не кө Данила, ог пö тöд, кор на эштіс кер-

ка лэптöмыс. Зонка та бöрын некутшöма эз кут жалитны, мый унджык кадыс тайö гожöмö керка кыпöдöмö коли. Дай надейт-чис, мый школаö пыртöдз «Бригантинаыс» сийöс Васьö другыскöдулас на вуграсьнысö.

Пакöсьт вöчысь

Васьö думсьыс виччысис нин Данилаöс. Öд куим вежон коли сьлөн мунöмсянь. Анна тьötлысь быд аддзисигөн юасис, локтас оз Данилаыс. Но пыр кыліс вочакыв: оз на пö. Тайöс кылöм бöрын Васьö ышловзыліс.

Луннас сийö гортас кольліс öтнасөн. Сылы коліс вайны юкмöсысь ва, чышкысьны, ньöбны нянь, вердны порсьписö, кодöс мамыс регыд на вайис орчча сиктысь. Ньöбöма öти тьötöлысь. Сьöd сера, зэв вильыш да руксысь.

Васьö лун сьöмöснас лэдзлö сийöс гид дорын ичötик йөрö. Чошöыс сэнi котралыштас, сөйыштас да шондi водзö нюжöдчас. Васьö чайтö: радейтö жö гожйöдчыны.

Бимыс аддзас зонкалысь чошö дорын ноксьöмсö да пыр жö заводитö никсыны. Тадзи сийö вöзйысьö гуляйтны. Васьöлы аслыс окота жö гуляйтны. Медся ёна ас дорас кыскö «Бригантинаыс». Пöшти быд лун лэдзлö сийöс ваö. Öтарö сынлас, мöдарö. Ылöдз оз катлы. Öтнас полö ылöсö мунны. Бимыс увтчö, некыдз оз кöйы пыжö пырны, Васьöös чуксалö берег вылас. Но Васьö аслыс чорыда шуис, мый велöдас понсö пыжас пуксьыны.

Талун асывсяньыс поводдяыс руйвидзö. Öшйöмаöсь лöз кымөръяс, воалöны гежöдик зэр тусьяс. Челядьпиян гортаныс пукалöны. Кодi телевизор дорын, а кодi шоныд вольпасьын туплясьö. Васьö пальöдчис водз. Мамыскöд бөр-водз лэччисны карö. Кöсийсны кöм-паськöм ньöбны школаö пыригкежлö. Коркö рытланьыс нин бöрсö воисны. Васьö зiля сөйыштiс, лэдзис домсьыс понсö да кыкнанныс котöртiсны ю дорö, пыжсö видзöдлыны.

Воис, да весиг чужöм вывсьыс вежсис. «Бригантинаыс» места вылас эз вöв. Сöмын утяьсыс кольöмаöсь да ю дорöдз пыжсö кыскöм туйыс. Кодкö керыштöма кыдз пусö, кытчö вöлі томлалöма «Бригантинаыс». Керыштöм пуыс сэнi жö туплясис. Коръясыс абу на нюкыртчöмаöсь. Васьö муртса оз бöрддзы. Сувтiс утяяс дорö да сулалö, оз тöд, мый вöчны.

А Коля Майбуров, кодi кутiс морöс пытшкас лöглунсö другъяс вылö, кор аддзис Васьöлысь мамыскöд автобусö пырöмсö, пыр жö думыштiс водзöс босьтöм йылысь. Сийö кватитiс джаджысь ключ чукөр да сюйис зептас. Ключьяссö важөн нин чукөртiс жугласьöм томаньясысь. «Гашкö, кутшöмкö лöсялас»,— мөвпыштiс керка öдзöссö сиптiгмоз. Сэсся, зэр вылö видзöдтөг, зiля мöдöдчис юлань. Матыстчис «Бригантина» дорö. Пыр жö видліс восьтыны томансö вайöм ключнас. Öтиös сюйлас, мöдös, но весьшөрö. Томан эз вössы. Кватитiс из да скöрысь заводитiс вачкавны томансö. Кöсийс жугöдны. Но бара нектор эз артмы. Сэсся шыбитiс изсö да тэрыба кайис гортас. Бөр воис, перйис пинджак пöла увсьыс чер да кераліс кыдз пусö, кытчö чепсö пыжыслысь гартыштöма. Кутчысис кыкнан кинас пыж нырö,

йөткыштис валань. Зиб выlö керыштис вöснъидик кыз пу, кодi орччөн быдмис воддзаыскöд. Увийис да йывсö шыбитис бадь пытшкö. Пуксис пыжас да зибнас йөткасьöмөн мөдiс берег пöлөн.

Сийö катис бадь да кыздза рас пöлөн. Дзик берег дорöдыс. Йөткасигас син бöжсö чөвтавлis сылань, кöни раскыс помасьö. Буретш сэтчö кöсийис воöдчыны да дзeбны пыжсö.

Кольöм во школаса велöдысь, Анна Ивановна, нуöдлis найöс экскурсияөн сикт помас. Сэки берег пöлөнсьыс аддзылisны нэмöвöйся силос гусö. Опонь гуөн йöзыс нимтылöмаöсь. Гуыс джуджыд. Коля ачыс потш пом тювгылis: метра куим лöö. Пась-таыс да кузьятаыс метра квайт. Тшуплöмаöсь сруб да суюлöмаöсь гуас. Вылыс керъясыс, куим рад, сисьмöмаöсь. А улыссаясыс сэки вöлины ва пытшкынöсь, тыасьöмаöсь да век на троньякы-лisны.

Анна Ивановна висьтавлis, мый коркö важөн, войнаöдз на, налөн грездса колхозö райкомсянь вайöдасны выль председате-льöс, Опоначий Ивановичөн ыджöдлöмаöсь. Аслыспöлöс мужик вöлöма. Сийö колхозникъяслы тшöктас ю дорас кодйыны гу да суюны сэтчö вылысь тшупöм сруб. Шуöма: вöчам пö силос. Йöзлы тайö дивö лöö. Вöчасны найö, кызди тшöктis юралысьыс. А кор воис кöрым заптан кад, Опоначий Иванович чукöртас дзонь бригада. Öтияслы тшöктас ытшкыны турунсö. Мөдъяслы ульвывсьыс юравны. Челядьпиян вöла рос доддьөн ваяласны юръяссö лöсьöдöм гу дорö. Мужикъяс путкылялisны найöс весь-кыда гуас. Томджыкъяс макар сод лэдзлöмөн пыралisны пытш-кас да турунсö лöсьöдiгмоз таялisны. Сэсся юысь ведраясөн ваялisны ва да кисьталisны турунсö. Кор гуыс тыри, пыртлisны сэтчö вöв да сыөн тальöдisны. Мед пö топыд лоас. Тадзи вöчлö-маöсь силос.

Öти во сöмын тадзсö мошкоритчöмаöсь. Мөд онас председа-тельсö нуасны война выlö. Грездас кольöны сöмын нывбабаяс, пöльяс да челядь. Найö энöвтчасны силоссö вöчöмысь. Öти-кö, налы эз во сьöлöм вылас татшöм уджыс сьöкыд пондаыс, а мөд-кö, сюрукъяс некыз эз кöсийыны дука кöрымсö сёйны. Да и йöлыс сэсся чöскыдтöм кöра вöли.

Öни силос гуыс эжмöма. Тулыснас сийöс юыс дзеблö ас пытшкас. А ямöм бöрын ваыс гусыс оз йидж муас. Тыдалö, топыд гöрд сёйыс кутö. А гашкö, юыс пыкö. Гуыс юсяныс зэв матын. Ваыс вижöдöма сэтчöс быдмысь турунысь. Көть и ойdlö, чери сэтчö эз кольчыв. Сöмын лягушаяс олöны.

Буретш сэтчö, гу дорас, воöдчис Коля Майбуров. Сатшкис пыж нырсö берегас. Босьтis чептöдыс, воысалis пельпомас да кыскыштis. Пыжыс, көть и сьöкыда, сетчис. Кашкигтырийи кыс-кис сийöс дзик гу дорас. Бергöдis пыжсö бок вылас, медем дорышас лои. Öни гуас ваыс ямöма метра кымын. Тыдалisны сись керъясылөн колясьясыс. Подувсаясыс, ва пытшсьыс, тупкысьö-маöсь нильöгөн. Дай талун гу дорыс, көть и эжмöма, вöли вильыд. Зэрö, да сёйыс нильзöма.

Коля кöсийис пыжсö йөткыштны гуас. Босьтis нырöдыс да зэвтчис. Но пыжыс эз сетчы. Зонка мый вынсьыс öдöбтöмөн тойыштis. Пыжыс вөрзис, домасян чептыс исковтiгас шымыртis Колялысь коксö да кыскыштis. Коля уси да пыж бöрся тшöтш

исковтіс гуас. Пыжыс лэччис помыв в сатшөмөн, гумовтіс васё да вöйи. Сөмын йöрышыс тыдалö.

Колялы ваыс лои голяөдз. Усигмозыс горөдіс «Ы-ы!» да ырыштчис петны гу пытшсьыс. Видліс кавшасьны сруб стенөдыс. Но киясыс вильсьялісны. Некытчö вöлі кутчысьнысö. Öтaрö шыбитчыліс, мөдарö. Мый вынсьыс зілис чеччыштны, петны гу пытшсьыс. Но став зільöмыс лои весьшөрö. Гөгөрвис, мый веськалі налькйö, да повзис.

— А-а, мездöй!— мый вынсьыс горөдіс сйö.

Сылөн горөдөм выlö вочавидзис сөмын йöлöгаыс. Кыскö ылысянь бөрсö воис.

— Мамö!— бара горөдіс Коля да бөрддзис.

Сйö дыр польöдчис ваын, горзис да лимзалис-бөрдис. Ас кежсьыс корис весиг Енлысь отсөгсö. Көсйысис сылы, мездас кө, бура асьсö кутны да некодлы сэсся лөксö не вöчны.

Гашкö, Енмыс чуйдіс. А гашкö, Бимыс кыліс пикö воөмасö. Но понйыс Васьöс кутис нуöдны рас помланыс. Увтыштас, котөртлас водзö да бөр Васьö дорö косалас. Зонка казяліс тайöс да вөтчис пон бөрся.

Кор воис силос гу дорö, Васьö чуймис. Гу пытшкын лимзалис Коля Майбуров. Бөрдöмысла да повзёöмысла весиг эз казяв, кыдзи юр вылас кавшасьöма ичөтик лягуша. Васьö матыстчöмысь лягушаыс чеччыштіс ваас. Буретш сэтчö, көні тыдаліс «Бригантинаыслөн» йöрышыс.

— Со вöлөм коді гусыс!— горөдіс Васьö серамсö кутігмоз.— Ачыд налькйö шедін! Тэ, сідзкö, и водзын миянлы пакөстьсö вөчалін?! Висьтась!

Коля Майбуров заводитліс соссьыны, эг пö ме, но кор аддзис Васьöлысь мышкөн бергөдчөмсö да мунны көсйöмсö, висьтасис. Бөрдигтырйи корис отсавны да көсйысис водзö не пакөститчыны.

— Ачыд пет!— скöрысь шуис Васьö да бергөдчис мышкөн.

Коля нöшта на гораа бөрддзис. Васьö сулалис, сы пытшкын öні быттö тышкасисны кык морт. Öтиыс жалитіс Колясö, а мöдыс эновтны тшöктö: мед пö ачыс кыдз кужас петö. Бимыс, буракö, мöдыс дор жö сувтіс, помся Колясö увтö.

Васьö чилснитіс дульсö пинь пырыс. Тöдчö, мый скöрыс абу на прöйдитöма. Воськовтіс пөрөдөм кыдзлань, кодöс корöсь перйысьяс керыштлөмаöсь. Нетшыштіс мыр помсьыс да ружтігтырйи, став вынсьыс кыкис гу дорö. Сэсся увъяссö вывлань кутöмөн лэдзис гуас.

— Босьт пыж домалан чепсö да көртав, а ачыд кутчысь пуас,— тшöктіс Колялы.— Увъясас кутчысьöмөн кавшась.

Коля лимзалигтырйи корсис чепсö да домыштіс кыдз пуö. Сэсся шашаритчис кыкнан кинас увъясö да кыкыштчис вывлань. А Васьö, мыйөн кинас судзис, кватитіс сйöс пинджак мышкуöд да кыкыштіс.

Коля Майбуров петіс гуысь, пөрччысьлөмөн пыдзыртіс паськөмсö. Васьö виччысис. «Зульöдны кө эськö!»— думыштіс ас кежсьыс да кулаксö чабыртіс. Сэсся видзөдіс лимзалысь Коля выlö да бергөдчис. Кватитіс кыкнан кинас кыдз пусö, скöрысь горөдіс Колялы:

— Пыжсö коді кутас перйыны? Отсав тшөтш!

Коля кутчысис кыскыны. Пыжыс срубйӧдз воис да водзӧ эз кӧсйы кайны. Сьӧкыд, пытшкас ваыс тырыс. Зонкаяслӧн выныс оз тырмы лӧптыны.

— Гортӧ кайла, батыӧс кора,— шуис Васьӧ.

— Ме вежся да тшӧтш вола.

— Волы, тэ ӧд мыжаыс.

Васьӧ локтіс гортас да висьталіс батыслы Колялӧн пыж гу-сялӧмсӧ. Корис отсавны кыскыны гусыыс. Батыыс дӧзмис:

— Ньӧръявны колӧ сійӧс татшӧмторсьыс.

Пасьтасис, босьтіс ведра, гез да пиыскӧд лӧччис ю дорӧ. Бим котӧртіс водзын. Ӧні сійӧ эз нин увтчы. Дышӧдӧма, тыдалӧ, Коля былӧ ӧна увтчис да.

Воисны важ силос гу дорӧ да лӧптыштӧсны пыжсӧ васыыс. Сэсся ведрӧн, гезсӧ кӧрталӧмӧн, лӧпталісны сы пытшкысь васӧ. Медем кокныдджык лӧ. Кор кутіс мыччасыны пыдӧсыс, батыыс пуктіс ведрасӧ эжа былӧ. Сэки и мыччысис Коля Майбуровыс. Юрсӧ ӧшӧдӧмӧн матыстчис да тшӧтш кутчысис пыжсӧ лӧптыны. Ӧні сійӧ кокныда нин кайис вывланьӧ. Лӧптӧм бӧрын пыжсӧ видзӧдалісны гӧгӧрбок, эм-ӧ жугалӧмин. Сэсся кыскисны сійӧс ю дорӧ. Коля Майбуров юрсӧ эз кыпӧдлы, синъяссӧ зілис дзебны.

— Прӧститӧй,— небыдика шуис торйӧдчигас.

Батя-пия сӧмын видзӧдлісны, нинӧм эз шуны. Сӧлісны пыжӧ да йӧткыштчисны зібйӧн. Бим котӧртіс берег пӧлӧн. А Коля Майбуров сідз и коли юрсӧ ӧшӧдӧмӧн сулавны. Сы пытшкын ставыс бара гудыртчис: «Брезгуйтӧны, вышшитчӧ Васьӧыс. Бим-нас да батынас посйысьӧ».

Водзӧ лӧӧ на.



Выль кывбурьяс

Чери керысь

Батьö бара вайис чери:
Ёкыш, кельчи, сир да мык.
Лунтыр сійöс мырси-кери,
Öнi, майбыр, оз нин тшык.

Черитö ме керны кужа,
Сöмын кыйнысö ог куж,
Ю вылысь век локта кушöн,
Бöрд көть серав — мудз да руш.

Батьлы мыйлакö тай шедö
Ёкыш, кельчи, мык и сир.
Гашкö, сы вöсна, мый метöг
Öтнас видлалö быд йир.

— Тэысь чериыс тшук полö,—
Шуö нюмъялöмөн бать.
— Кыйсьынытö мунтöдз колö
Кисыд мыськыны сьöм-гадь.

Нидзув

Ошкис-ошкис нидзув-мам
Ассьыс нильöг писö:
Сійö мича, сійö рам,
Сійö медся визув.

Ошкис-ошкис нидзув-мам,
Но эз чайтлы со мый:
Пиыс вöлöма бур сам,
Со тай кывліс: ам да ам —
Тшукис чери вомö.

Телепат

Рытивбыд нин мойдö баб,
А ме вольпасьö ог баб,
Лабич вылын дзöра.
Педзны эськö эг и мöд,
Эг кө бабысь гусьöн тöд:
Шкапын кампет көрöб.

Ошйысис

Ме пö ытшкыны ог куж!
Киын коса ворсö.
Здукöн виддзыс лоис куш —
Уськöдi вөр дорсö.

Ме пö ытшкыны ог куж!
Турун сöмын водö.
Лэбö вутш и весиг вуж,
Киын гадь нин потіс.

Ме пö ытшкыны ог куж!
Быдса вöвдöм дасьтi.
Но друг кылi: дзуж да дзуж,
Локтiс кыськö малямущ,
Чушкис ныр и чушкис чуш —
Со и ошкы асьтö.

Вотчысь

Вотi ягсер, вотi гоб,
Тырис чуман, тырис ноп.
Тырыс тшакыс, оз нин төр,
Майбыр, озыр таво вөр.
Öдвa кыски чуман-ноп:
Вот и ягсер! Вот и гоб!

Трасича

Визув-винёв ласича
Вöлöмакö трасича.
Бабö сійöс видö,
Визъялö пö гидын.
Мыйкö помся корсьö
Курöг йöртöд дорсьыс.
Оз мöй тöд сьöд нырыс:
Вöрын тырыс шырыс.
Ичöт зверсьыс бабушyd
Абу прöстö полöма.
Талун асыв тöдмалім:
Чипан яйла волöма.

Водзöсөн

Зептын кöть и
Кампет öти,
Ёрткöд юксьытöг ог ов.
Чойлы сета, воклы сета,
Меным унаыс оз ков.

Мамлы чösмасьыштны коля,
Батьлы вичмöдышта тор,
Баблы юка, дедлы юка,
Вежаньлы — бур сьölöмсор.

Тузиклы на нювсьöм вылö —
Аддза: дуллыс петö сьлөн.
Да и Муркалы на тшöтш,
Медым юммöдас вомкötш.

Абу жаль мен шоколадыд,
Ставныд номсасьöй бурпöt.
Ме öд тöда инөн-ладөн:
Аски водзöс пыдди татөн
Лоö кампет кило-мöд.

Öтка пи

Ёна оз ков зильны,
Ставыс тырмö мем:
Видео, мобильник,
И мопед на эм.

Бать компьютер ньöбö,
Мамö — дона лызь,
Мед пö оз жö дьöбөн
Ло нин быдман мысьт.

Ставыс тырмö меным,
Сöмын олöм жуг.
Лои шуда медым,
Колö на и друг.

Верзьöмөн

Улич пölөн тövзис вölөн
Гут.
«Тпру!» да «Но!» да, «Тпру!» да «Но!» да,
Он тай кут.
Вötчис верзьöм бöрся мегö:
— Сувтлы вай!
Вöлыд бөркок сувтис сэки,
Он на кай.
Гутлөн плетьыс нель сыв кузя,
Шлуч да шлач.
Мегö эськö вötчö сюся,
Чибö — скач.
Тövзис вöла улич пölөн,
Кöни луд.
Кöртвом дом кутысьнас вöлі
Повтöм гут.

Вичкоын

Вичкоё ме кежа вежа вала,
Висьтасы и дарьяся од талун.
Копрасям ми Енлы: ме да бабё,
Медым некор нинёмон ог лябёй.
И Ен мамлы пернапас ме човта,
Юрбитігмоз кевмысян кыв ловта.
Вичкоысь ме пета дзик виль мортон,
Вежа ванас реза грека гортос.

Ныв пастук

Орччон олысь Юра
Аттё вылын юра.
Нывъясёс век дзеродё,
Дзик быд ногыс нерё да.
Сёласьё да печласьё,
Вильышлуннас вечмасьё.
Улич вылё петё да
Киас ньор на летодё.
Татшомтортё вочё да,
Другьясыс нин кодзыдось.
Уличын кор суоны,
Ныв пастукон шуоны.

Генерал

Сійё — быттё командир,
Сы серти и олам.
Сытөг уджтё войт ни чир
Гортын вочны полам.

— Ноко, нёнюк татчё вай,
Одйё вежой рузум!—
Командуйтны кужё тай
Потанийорса тузыс.

Дэбыд льольё юас кор,
«Өввё» тшөктас сывны.
Либё чачё кыз оз кор
Тюли-тёли кывнас.

Улич вывті гуляйтіг
Бокё пё эн кыйав.
Сійё генерал кодь дзик,
А ми — радөвöйяс.





Рөмпөштан

ВИСЬ Т

*...Kodі me? И көні менам му?
Рөмпөштанын — төдтөм-төдтөм чужом...*

Вина гаг дукуыс өшйөма жырийө. Топыд, нөгыль йөв кодь сук... Нырто чазөдө. Чалкнитан кө истөгөн — ыпнитас-пасьму-нас, надейнө. Сё страк. И синтө восьтны страк. И палявнытө страк. Төдса — юр потөм лоө. Öнi, регыд... Пөкмелля... Но вежөр оз кывзысь. Сийө ас олөмнас олө. Сингяс воссьöны...

Павел ымөстiс. Читкыртчыліс. Ружтөмпырысь пуксис важник, дзуртысь, чигарка пом öгыръясысь быдлаті нин розясьсөм диван вылө (сэн и узис), гыжйыштiс вежонся зу кодь тшөтьсө. Гөгөртiс гудыр видзөдласөн... Көні ме? Мый..? Паляліс. Зывөкпырысь (палялөм бөрас век тадз, эз и велав) кыйкнитліс öтарөмөдарө. Кезнитөдіс. Этійө төрытья вина дуксыс, этійө туплясьсысь тыртөм штопъясьсыс, этійө нййтсьсыс...

Гырд видзөдлас пырыс аддзис нййт джоджын куйлысь Төмаөс. Вот көн шуда мортыс! Абу бич Төма, а морт. Төма — сийө сөстөм... Мед кө и тойөсь. Кык лун на төдсаөсь, а быттьө нэмсө öтлаын олiсны. Вок кодь. Код шуө, мый бомжъяс шудтөмөсь? Коді шуө, мый найөс колө жалитны? Йөй нисьө прөсуж чукөрыс! Йөршитчөмаөсь асланыс пон чомъясө, лун-лун мыйкө нускөны, жөдзөны, педзөны, кытчөкө тэрмасьöны. Челядь, семья, удж... Чепталөмаөсь, доддялөм чаньясөс! Вөляныс абу. Пыр мыйкө вылө надейтчөны, мыйкө корсьöны, көнкө гурйысьöны, аския лунө эскөны... Бур виччысьöны... Ага, усяс... Юр выланыс. Енэжсянь. Балябөжас. Вомсө мед паськөдөны. Квайтымынөдз воасны (воасны кө),— и көні «аскиыс»? Юрсө бергөдалöны, сюрса кратшмунтөдз зэвтчөмаөсь, гөрдөдөмаөсь... И вөлисти гөгөрвоöны — став бурыс (вөлі кө, дерт) кольөма Төрытас. Тю-тю! А эз и казьявны! Тэрмасисны. Талунсө, тайө здуксө эз донъявны. Сідзи и колө, бөбъяслы! Абу жальөсь... Доддялөм чаньяс. Да седлө улын. Орс нөшта мыш кузяыс... «Сідзи и колө... Кыланнид,

трасичаяс! Сідзи и колө... Бөлбанъяс... Изъяс. Вөля вунөдөмъяс. И ме тшөтш сэтшөм. Стенын өшалыс серпас. Кымөм сюръя... Абу жаль... Некод абу жаль... Медпервой — ачым...» — пытшкас чорзис нин Павеллөн...

*Стенын өшалө серпас:
Сэн лэбөны-төвзёны вөвъяс.
Вомъяс быгзёма...
(Майбырөй, плетьыс тай инмис).
Мича серпас.
Но агдза ме: вөжжияс, вөжжияс, көвъяс...
Абу вөляыс.
Жугыль тай вөвъяслөн синмыс!
Налы шыбитны сийөссө эськө!
Налы рөзваляг важөн нин гзескыг!
Жаль, мый серпасас измөма кадыс.
Сэні вөляыс абу! И — ладыс...*

Тёма — шуда. Надейнө... А вот Павел өні — кулөма нисё ловъя. Талун сы пытшкын лэдзчысьөм, слабиник лов... Но пыр на киа-кока, коді неважөн зывер кодьөн вөліс! Коді Му шарсө бергөдны көсйис. Коді доддялөм чань моз жө эскыліс аския лунас. Кодлөн ставыс вөлі: гөтыр да челядь, бур квартира да бур машина... Вөлі... Вөлі... Ставыс вөлі Павел Егорович Жикинлөн, Бужөд грездын чужлөм коми мортлөн. Ставыс вөлі...

Мыйкө Павел пытшкын вөрзыштис. Кутшөмкө чорыдлун чужис, лөглун... Тувкнитис кокнас джоджын куйлыс Тёмаөс. Чужйөмкодъ и артмис. «Э-э-э, чеччы, мый базгысин?»

Унзиль синъясөн Тёма дувгөдчис Павел вылө. Лёззём юрсиа, зыр кодь тошка... Робинзон Крузо. Павеллөн нюмыс нин петыштис, сёлөм улас бөр личалыштис. Быттё завор иган восьтисны.

— Чеччы, а то гусяласны!

— Но... — нюмъевтис Тёма (сийө век нюмъялис). — Кодлы ме кола, йошкарола? Абу юмов пренник, чай дінө оз корны. Мыйся кад нө ывлаас, рыт али асыв?

— Ме тэнсьыд сийө жө юала.

— Рыт... Абу. Асыв!

— Мыйла?

— Мыйла пөчыд уля, ачыд куим син бугыля... Ме часіа.

— Озыр. Став надея тэ вылө, Тёма. Бордъя идөг тэ менам. Выліас, аддзысям кө, ставсьыс вештыся. Юрөй потө. А колөкө, потіс нин. Шөри. Кула. Кулі нин... Вёскөдчыштны кө он корсь...

— Век тадз, — броткөдчө ветымын арөса (а гашкө, и сизимдаса, Енмыс төдө) Тёма. — Эстчө — ветлы, эстысь — вай, эсийөс — гусяв... И ставсө — Тёма...

— Эн тшебрит! Тёма... Кыдз нө эськө тэнад збыль нимыд? Паспорт сертиыд?

— Паспорт? — паськаліс Тёмалөн съөд синмыс. — Тэ мый, төлысь вылысь усин? Али чужигад кантузитчин?

— Чужигөн, шуан?.. А тэныд чужигад бать-мамыд көть кутшөмкө ним сетлісны эз? Мыйла Тёма? Артём ли мый? Көсьян, ме тэныд выль ним пукта, лөсяланаджыкөс.

— Кутшѳм Артѳм?— дѳзмискодъ Тѳма.— Ме — Артѳм? Да видзѳдлы менам чужѳм вылѳ. Вермас-ѳ татшѳм ним лѳсявны? Лешак...

— Чѳртыс тѳдѳ,— кинас ѳвтыштѳс Павел.— Он кѳ висътав, и эн... Мен веськодъ...

— Тѳныд — Тѳма, и ставлы Тѳма. Чужан нимѳ ачым нин важѳн вунѳдѳ. А гашкѳ, эз и вѳвлы нимѳй? Мѳдсѳ, коймѳдсѳ да нѳльѳдсѳ вуштѳ жѳ. Вичѳй-ѳвѳй абу... Мамлѳн чужѳмыс вежѳрысѳ важѳн разалѳс-сылѳс... Асъя руѳн. Бательсѳ мыгѳрсѳ эг жѳ ад-дзыв, пышйыны удитѳма, гад. Чужтѳдз на. А тѳ выль ним мем сетан... Некор эн шу комиѳн: «Ме тѳныд — сета!» Дѳзма. И ачыд эн лѳдз шуны. Бѳлбан чукѳр! Кор кыла, мортыслы бугылас тойыштны окота. Тѳдан, мый **Сѳта** — важ Египѳтын хаослѳн ен? Лѳк вѳчысѳ да ставсѳ гудыртысѳ?! Повзѳдчысѳ. Кор шуан: ме тѳныд сѳта, артмѳ, ме тѳныд — хаослѳн ен. Ме тѳнѳ, сѳдзкѳ, гудырѳта, няйтѳ вѳйѳта... Кыв бѳрсяыд видзѳд, Паш... А паспортнад менѳ гажѳдѳн!

— Гажѳдѳм — абу гажмѳдѳм. Гажѳдѳ кѳ, и бур. А тѳ...— Павел выль синмѳн сюся видзѳдлысѳ Тѳма вылѳ: абу прѳст вѳлѳма...— Юрыд либѳ лѳсялысѳ. Вай уйыштлы аслад законнѳй мѳста-ад да ѳти поллитра судзѳд. Верман кыкѳс!

— Эк-эк-эк,— лѳзъ юрсѳ гыжйыштѳс Тѳма. — Кыдз он спѳсит ѳрттѳ? Ми ѳд ѳртъяс, да?

— Ёртъяс, ѳртъяс! Давай! Тѳ век на тан?— Павел тойлалѳгмоз колльѳдѳс Тѳмаѳс ѳдзѳс дѳрѳдзѳс.

Деливѳ. Сѳѳкыда пуксис дзуртысѳ диван вылѳ. Думыштчис... Кык лун тан олѳ. Кодлѳнкѳ пѳлынытчѳм, важысла крукыльтчѳм пу керкаын. Тѳма тай аскѳдыс вайис. Некор эз думыштлы Павел, мый юркарын татшѳм рѳзвалинаяс эмѳсѳ. Кѳзяеваыс, буракѳ, энѳвтѳмаѳсѳ... Гашкѳ, кувсисны. Но йѳрыс ѳд кутшѳм! Позъѳ выль коромина лѳптыны. Некутшѳм рѳдвуж мѳй вѳвлѳм кѳзя-иныслѳн абу? Неуна водзынджык кѳ! Шашаритчис эсѳкѳ Павел тайѳ йѳрас, мырддис, некодлы эз сет! Водзынджык кѳ... ѳнѳ — веськодъ. Тѳрытыс, талуныс, аскиыс... Киля усьѳм морт. Плеть пу чери моз уськѳдѳм кияс... Ныж пиня... Кѳтъ ѳсѳ вѳлѳ, ой ѳсѳ!

Ярьюгыд олѳмсѳ кыкѳн ми тѳкѳд тай йирум...

Каитча, каитча: чѳгѳма медбѳръя пиньѳй.

Гудыртчис олѳмыс. Сѳѳлѳмын ыркъялѳ йирым.

Уѳвтас ме гѳнысѳ тшук лѳчыг пиньяса иньѳй.

Уѳвтас. Лѳбыштас. Шутѳвтас.— Сѳдзи и колѳ!

Веньгыркѳд, коньѳркѳд, пиньтѳмкѳд кутшѳм нѳ олѳм?

Комын да кык! Енмыс сетлыс мем пиньѳс да гыжѳс.

Кодлыкѳ — ѳсѳѳс, а меным со — тупича-ныжѳс...

Сѳдзи и колѳ! Мый жалитны олѳмсѳ? Мый жалитны асѳтѳ? Ставыс нин — вѳлѳма, сѳялыгѳс ѳльѳн кывтѳма... Быдтор нин аддзылѳма. Пежсѳ и бурсѳ. Быдѳнлѳн вылѳсянѳ индѳм туйвизѳ, быдѳнлѳн вылѳсянѳ индѳм олан йѳр. ѳнѳ со Павел — тѳдтѳм йѳрын... Тѳдтѳм мѳстаын... Тѳдтѳм юлѳн мѳдар берегын... Палялас коркѳ, зѳригѳн...

Төдтөм юлөн мөдәр берегын
Палялі ме коркө, зэригөн...
Чужом чукур ваыс шильөгис,
Мольөгис... Ылөгис...
Олом кассө быттьө вунөді,
Челядьдырө зэрыг сунөдіс.
Сизим арө, сизим гожомө,
Гожомө, гожомө...
Керкасайса югыг ывлаө,
Бузган саригз — тувсов ытваө.
Сяръясьомө дай мач песомө,
Песомө, песомө...
Дзуртан — тэрыб пиня гөгыльө,
Озын гіса бипур-өгырө,
Из бөж куръя шуйга берегө,
Берегө, берегө...
Көні ме? Да бара — берегын!
Төдтөм Юлөн мөдәр берегын.
Коді ме? Кор кадыс мунөма?
Вунөма. Вунөма...
Синлыс костті зэрыс визувтө.
Кыті водзө мунны? Из увті?
Паляла ме. Коркө паляла.
Бөръя ордым помөс таляла...

Да чөрту став думъясыс! Төмаөс виччысьлас. Курыд зельё нач ваяс. Мыйла бара курыд зельёөн вина-водкасө шуёны-а? Лекарство? Бурдөдө? Да, бурдөдчантор... «Троя». Везитас кө. Лавкаса казенной водкаыс ёна лёкджык. Кодлөнкө гуся гөбөчын, буди, вөчөны. Скөр йөзөн вөчөм. Мый налы мукөддөн дзоньви-дзалунөдз? «Троя» — бурджык. Павел өні төдө — бурджык...

Жикин водзө жуйвидзис важысла ли, шогысла ли дзуртысь диван вылын, мөвпаліс. Ылөсас. Со, коркө тайө керкаас йөз овлісны... Коді? Кутшөм рөдысь? Ыджыд-ө семьяысь? Коми али рочьяс? Төдлісны эз шудсө? Кымын кага вөчлісны этійө диван вылас? Тыпу! Мый йылысь думайтсьө! Төмаөс виччысигад йөй-ман...

Синъясыс крукасисны пөлөстчөм жө көлуй видзан шкапө. Кос печкан кодь нин со, важысла... Оти кокыс тай чеглөма, да пес чурка сэтчө суйөмаось. Кольквиж рөма, буракө, коркө шкапыс вөлөма. Шогысла жө ли мый рудөдөма нин-а. И рөмпөштан... Öдзөс пасытаыс. Колө жө. Кодкө лепитөма. Али лавкасянныс тадз? Со, Павеллы дзик паныдөн өшалө. И сэні — Жикин. Төдө асьсө и оз төд. Быттьө медводдзаысь аддзис. Тщөтясьөм, вижөдөм чужөмсө, пыкталөм синъяссө. Дзоньнас. Тайө абу Павел, абу! Оз көсйы сійө тайөн лоны!

Рөмпөштан, тэ ылөдчан! Тэ сайын — мөдаръяугыдыс либө мөдарпемыдыс! Тэ пытшкын — мөд морт. Сійөс Павел оз төд, и төдмасьны оз көсйы. Но вот тай мыйлакө видзөдө рөмпөштанас Павел Егорович Жикин, сюся видзөдө... Мыйкө быттьө кыскө сэтчө. Синмыс — гудыр, гөгөр вералө, руалө... Рөмпөштан...

И нем виччысьтөг мыйкө воссис сэн, рөмпөштанас, югзис. Черань везйөн потласьөм визьяс шылялісны, разалісны...

И рөмпөштансянь воськовтіс... морт. Босьтіс да и воськовтіс! Быттьо аслас керка порог вомөн. Быттьо лэбач жбыркнитіс... Ар дас кыка зонка. Пионерскöй галстука, школьнöй формаа. Павел муртса эз чермун. Кутшöмкö вын сійöс топöдіс диван бердас. Личкис, кабыртіс... А зонкаыс ёна майшасьтöг пуксис вежыньтчöм пызан дорын öткөн сулалысь куреньга кодъ джек вылö (быттьо гортас) да вашъялöмөн шуис:

— Здоров!

— Здо-ров,— тшöкмуніс Павел.— Здоров кö...

— Ме Паша! Хи-хи! А тэ коді? И мый месянь колö?

Павел дувгöдчис том пионер вылö. Русов юрси, чангылъ ныр, беринöсь чужöм... Вылысса кык пиньыс со лэбöма, вашъялігас тыдалö... Воськыд синсö читкыралö... Тöдсакодъ и абу... Коркö паныдасьлісны?

Вежöрас мыйкö дзенöбтіс. Павел быдсөн пöсъявліс. И öттшöтш — йирмöг босьтіс. Мыкталöмөн юаліс:

— Ба-ба-батьтö к-к-кыз шу-öны? Ёгор? О-о-выд Жикин?

— Но,— верстьö морт моз зумыштчис зонка (тöдчö, мый мужик быдмö!).— И мый? Месянь мый колö?

— Тэсянь? Э-э-э... А кыз тэ татчö веськалін?

— Кытчö?— чуймалö зонка.— Татчö, школа кильчö дорас? Тешкодъ тэ кутшöмкö! Настасся Ивановна тай урок вылысь лэдзис, кильчö бокас пö тöдтöм мужик тэнö юасьö. Дас минут и сетіс. Ог кö лоқ, корсьны кутасны. Тöд. Лёкөн кö корин, ачыд бурөн он мун. Ёртъяс менам юр вундысь кодъöсь. Кадöй этша, висътав, мый колö, и бөр тенькъя. А то Настасся Ивановна дöзмас. А ме сійöс пыдди пукта... Ылöдны оз позъ.

— Тэ кысь школасö аддзан?

— Тешкодъ тэ, мужик! Школа кильчö бокын сулалан да!.. И юасян! Со миян клубным орччөн, а со — куим сус быдмö. Аддзан? Али синтöм? Бужöд грездыд эз на вежсьы!

«Бужöд...— чардыштіс Павел юрын.— Бужöд... Господьöй-Енмöй... Эм ли, абу ли тэ, ог тöд, но... Бужöд... Бужöд?»

Жикин гөгөрвоис, кöть вежöрыс эз кывзысь. Югзьöм синъяс-өн видзöдіс ичöт Паша вылö. Ас вылас. Аслас челядьдыр вылö.

Солькнитчис, ойдіс пытшкöсыс водзын тöдлытöм на шоныдлу-нөн... И сэнi жö чужис дой, зöлитысь, кортöм...

А зонка водзö нузіс:

— Ог эшты ме. Мыйла корлін? Муна...

— Эн, эн!— кисö лэптіс Павел.— Энлы! Висьтав кöть, кызд батыд да мамыд олöны?

— Ха!— чуймис детинка.— Та вöсна и корлін? А мый юасян, и коді тэ сэтшöмыс, мед юасьны? Мен — тöдтöм... Ветлы, инö, миянö, керкаыс тай орччөн. Оз сёйны. Пöчöлысь юав, сійö быдтор тöдö. А мый бать? Уджалö тай. Совхозлы стрöйтчö. Нёльöд мöс карта нин аслас бригадыскöд лэптисны! ВДНХ-сянь медаль весиг сетісны. Югъялысьöс. Вот тадз! Мамöй фермаын... Лысьтысьö. Куим да джын сюрс литра быд мöслысь вонас лысьтö! Почёт пöв вылын. Вот! Сылөн медальыд ещö на уна. Дерт, нокыс тырмö жö. Пемыд асывсянь сёр рытöдз мöс бöж дорын, гортын прамöя ог и аддзывлöй... Вот тадз. Но, ме котöрта!

— Энлы, энлы!— кевмысис Павел.— Муртса сувтлы! Пашка, а тэ менö тöдан он?

— Первойись аддза,— сералис Пашка.— Абу тыр сюсь быттьо. Юасян нинөм абусö. Кысь ме мортсö тöда, кор первойись аддза!? Политбюроса шленгясöс тöда, а тэнад портретыд некөн оз öшав. Прöстой морт либö. Но, котöрта... А то Настасся Ивановна...

— Пашка...— гөрддзасис горшыс Павеллөн.— Пашка...

А зонкаыс öти коксö суйöма нин рөмпöштанас. Жикин сöмын горöдны удитис:

— Пашка! Тэ Катятö, Катятö видз! Эн вошты! Сийöс тэныд Енмыс сетис! Эн вошты! Эн вöч менсьым öшыбкаöс! Пашка! Эк, Пашка...

— Кутшöм Катя?!— удитис воштöдзыс горöдны зонка.— Йöй тэ!

Рөмпöштан бөр вевтгысис бусөн, быттьö нинөм абу и вöлöма. Шöйöвошöм, лигышмунöм Павел кутчысис юрас. Воштас, воштас Катяöс Пашка... Оз кывзысь, биа-изгья детина... Медыджыд öшыбкасö олөмас вöчас. Гөгөрвоис эз, кылис эз бара? Прöстит, Пашка... Эз удит. Көть тай и волис...

...Катя. Турунвиж синма, дженьыдика вундöм сьöд юрсиа нывка. Рочакань. Том, нэриник, бадь кодь вöсньыдик да нюдз. Мугов чужöма, быттьö тöрыт на лунвыв саридз дорысь локтöма. Медводдза муслун. Нэмөвöйся шуд да нэмөвöйся дой.

*Кöка войö, кöка войö...
Мича нылыг тшапкис сойöг.
Гулыг кушин шөрö нуис,
Синмö видзöдгöмөн шуис:
«Менам помтöм шуг,
Менам помтöм гой».
Зэра лунö, зэра лунö...
Нывлөн паметъсьыг ме вуні.
Öнi ачым бöргä-лöвтa,
Тывйö шогсö сöмын көвтa.
Вöлі — помтöм шуг.
Коли — помтöм гой...*

Коляс кык во, и этйö пионерскöй галстука зонкаыс воштас юрсö медводдза муслунысь. Унсö воштас. Көть таöдз Катяöс эз и казавлы. Кык во чöж лун да вой кутас мучитчыны Паша Жикин. Катялөн көдзыд лов да веськодълун понда. Но коймöд воас и руа нылыдлөн воча муслуныс öзгяс жö! Ылькмунас. Кутшöмкö тöдтöм төвру ыпнитöдас бикиньсö, öзтас, паськөдас, пионерскöй биपुरö пöртас! Би! Муслун. Ыджыд буквасянь. Радейтчöм. Абу öнiя моз «мусукасьöм». А топöдчывтöг, ёнджыкасö — синнас. Ставыс — лов пытшкас, ставыс быттьö йöзсьыс гусьөн, ставыс быттьö нэриника, полігмоз... И таын — ставыс! А медыджыд козиныс — гоз-мöдысь окыштчылöм. Гашкö, тайö и эм збыль радейтчöмыс? Гашкö, тайö и эм юмов да öтшöтш курыд «висьöмыс», кор мортыс ассьыс кок увсö оз аддзы да лэбалö сынисадьөн көнкö енэжас, еджыд, небыд кымөргяс пöвстын? И мыйла медводдза радейтчöмыс вежджык шудтöм да

дой вöчысь? Мед бытшкыштны том мортöс, мед öлöдны, мый радейтчöмыс — висьöм, вежөр торкөм, а олöмыс — дзик мöд? Код тöдас... Артмö тай — тайö «челядь висьöмсö» Енмыс кызвыныслы мыйлакö сы вöсна сетлö, мед бöрыннас кузь олöмыслөн сё ветымын дойыс эз ви. Гашкö, таын и правдаыс? Олöм збыльыс?

Эз вөрзöд Катяöс Павел. Ни армияöдзис. Ни бöрас. Некор. «Катя... Прöстит менö, Катерина, менам шöвктугйöй, менам сьöлөмшөрй, акань тусьöй, Енмөн сетөм нылöй! Прöстит да прöщайт... И аддзысьлытöдз. Регыд, надейнö, аддзысям... Регыд. Тöда. Тöда и пола. Ог мöдарьюгыдö мунöмысь. Тэ водзын. Но кок улад уськöдча! Джодждöраөн вольсая! Мун, мун ме вывтi, таяв, сет милöсьт! Мылышты, Мезöсö! Сöмын эн öтдорт, сöмын прöстит... Ме предайтi тэнö. Ме унаöс предайтi. Каитча. Но тэнö — медъёна, медъёна...»

*Кор зургисны олөмлөн йөртöдö,
Кор суюисны Ен сетөм вежöсö,
Кор гөргдзасис заворлөн көртöдыс,
Ме нурбыльтi: «Мылышты, Мезöсö...»
Мед местай лоас гыр сöстөмөн,
Мед вöлöга-нурйысь ог оравлы,
Мед ломалö биöй пыр öзтөмөн,
Мед голяöс чептөн оз домавны.
А сiгзи кө... Позьö на олыштны.
Мый морөн мем кельыглöз вöляыс?
Мен лолыштны колö... Тыр лолыштны...
Да вунöдны вöля-невöляöс.*

Павел тай бара нин синсö шыбитiс рөмпöштанлань. Быттö мыйкö корөмөн... Син бырмöныс видзöдiс. Виччысис. Сийö тöдiс, кодi öнi татчö пырас. Ловгөннас кылис. Эскис. Кевмысис!

...Рөмпöштанысь тайö пöрийö воськовтiс паськыд пельпомъяса, зумыд тэчаса зон. Бурлак. Ярскöб синма. Абу блин сёйысь рöдысь. Болонь курткаа (виль мода!), комын сантиметр пасьта шевъялысь клёша. Гач подулас зельöдчöны шöри кусыньтöм ыргөн көпейкаяс (мода жö!). Шапкатөм, көть ывлаас — апрель шөр (Жикин календартöг тöдiс — тайö 1980 вося апрель). Пырысь зонмыд пыр жö сувтöдiс Павел вылö синсö. Эз пуксы нэриник джек вылад, сулалö со... Кисö морöс вылас кресталöма. Сюсь. Повтöм.

— Тэ менö юасян?— шыöдчис.
— Ме,— вочавидзис Павел чуймавтöг нин.
— Мыйкö чужöмыд тöдсакодъ. Эг аддзысьлöй?
— Öдвакö,— шпыньмунiс Жикин.
— Но и мый колö? Шуисны, корсян пö менö. Кадөн абу озыр, вай öдйöджык мойд. Нылöй виччысьö. Невеста!
— Чолөм, Павел. Павел кө-а...
— Павел, Павел. Кöсьян кө — Павел Егорович. Дас көкъямыс тырис нин. Аски армияö босьтöны. А талун рытпукам. Верман волыны, кöсьян кө, көть и тöдтөм морт. Гөстыдлы ми

век радось. Весиг кортём госьтлы! Ха-ха! Ӗдзӧс мян пыр вось-са. Но, мый колӧ мясянь?

— Кӧнӧсь ми ӧнӧ, Паш?

— Ыӧсас мыйкӧ сёрнитан, ог тӧд тэнсьыд ним-вичтӧ... Первойысь тан? Тӧдмась либӧ виль местаыскӧд — Яг шор пос вылын со сулалам. Гуляйтам вӧлӧ Катякӧд да висьталісны, пос вылас пӧ тӧдтӧм морт тэнӧ юасьӧ. Со и локтӧ. Интереснӧ лои.

— А Катяыд кӧнӧ?— дӧгмунӧм гӧлӧсӧн шыӧдчис Жикин.

— А мый Катя?— кӧдзыд видзӧдласӧн келснитӧс зон.— Мый тӧд Катяыс?! Менӧ корин али Катяӧс?! Мыйкӧ мен он кажитчы тӧ... Нӧшта юала: мый мясянь колӧ? И кодӧ колӧ, ме али Катя? Сэтшӧма кӧ кӧсьян, верма и вайӧдлыны! Сӧмын ме дырйи сёрнитан, мед ачым синмӧн аддза да пельӧн кыла.

Топавліс Жикинлӧн сьӧлӧмыс. Руавліс синмыс. Катя... И кутшӧмкӧ вын век жӧ пытшкӧссяныс горӧдіс:

— Эн! Эн кор! Тэнӧ ме виччыси. Кӧсья вӧлӧ Катя йывсьыд кыв-мӧд шуны...

— Н-н-о...— кулакъяссӧ зэвтӧс зон.— Лякны, гашкӧ, кӧсьян?

— Эн ӧзйы, Павел,— зілис лабутнӧя сёрнитны Жикин.— Томдырйи ачым тӧ кодъ вӧлӧ, тӧда. Ылысса рӧдняӧн ме лоа Катяыдлы. Ог кӧсйы, мед аддзыліс. Нинӧмла. Да и оз нин помнит сійӧ менӧ, ичӧтикӧн мамыскӧд гӧститны волісны, со и ставыс. Ме мӧдтор... Павел, сет мен кыв, мый Катятӧ он шыбит!

— Ха!— вашмуніс Павел.— Серам петкӧдлысь. Ме? Катяӧс? Ассьым муслунӧс? Мыйысь? Кутшӧм гут тэнӧ курччис, мортанӧй? Вот ветла армияӧ. Виччыяс. Гӧтрасям. И кувтӧдз ӧтлаын кутам овны, кыз тай йӧзыд шулӧны. Ха-ха! Ладнӧ, некор мен! Волы менам кольӧдчан рытпук вылӧ, рӧдняӧн кӧ Катялы шусин. Да, а кыз кӧтъ нимыд? Кодсянь Катюшлы привет висьтавыны?

— А-а-а,— ӧвтыштӧс кинас Жикин.

— Тэнад делӧ,— ӧвтыштчис жӧ зон.— Но тӧд, Катятӧ ме некодлы ог сет! Некодлы! Кылан?!

И сыліс-бырис.

Воштан, воштан тӧ Катятӧ, зонмӧй. Пӧгубитан еджыд юсь-лебедьӧс! Чеган бордъяссӧ лэбигас. Ныж пуртӧн кромсайтан... Кӧсьян, висьтала, мый водзӧ лоас? Княжпогостӧдз Катюшыд кольӧдас тэнӧ, рекрутӧс. Янсӧдчигад сыркъялӧмӧн бӧрдас, ӧтарӧ на лӧвтас: «Бӧръяысь аддзысям, бӧръяысь... Сьӧлӧмӧй кылӧ...» А тӧ, зонмӧй кутан воча гӧрдлыны, дуригмоз, а он збыль, сылысь синвасӧ чышкавыны: «Мый тӧ, йӧюк, кутшӧм бӧръяысь? Он и тӧдлы, бӧр локта. Кык воыд — тшаква! Отпускӧ на вола, вот аддзылан. Сэсся гӧтрасям, нэмсӧ ӧтлаын лоам. Сӧмын виччысь...» Мелӧ кывъяс пондан шуавны, а юрнад ӧтарӧ-мӧдарӧ гоньӧдлыны. Мед аддзылӧны ставыс! Мукӧд водзас вылын ныра: со видзӧдӧй, кутшӧм ныв менӧ армияӧ кольӧдӧ, кызди радейтӧ, кызди мучитчӧ-чегсьӧ! Ставыд видзӧдӧй! А вагонӧ пырӧм бӧрын тэнад Катяыд юрсьыд ӧдйӧкодъ и вунас, кӧтъ бӧрдысь нылыс код тӧдӧ мыйдыра на поезд бӧрсяыд котӧртас... Усьлӧ да чеччӧ. Усьлӧ да чеччӧ... Усьлӧ... Чеччӧ...

...Армия. Кызкӧ тешкодъ да ӧдйӧ ставыс артмис. ДОСААФ пыр Павел велӧдчис связистӧ. Княжпогостын налысь 132 командасӧ чукӧртисны Дальнӧй Востокӧ нуӧм вылӧ. Салдатпуясӧс виччысисны Хабаровскын. Сӧмын тай Хабаровск пыдди рек-

ругъяс дзик мѣдлаѣ веськалісны. Первой войнас петкѣдісны Агрыз станцияын... Вокзалѣ суйисны. Юръяснысѣ кушѣдз шырисны. Котовскийяс... Кор выльысь сѣвтѣдісны поездас, дошлаѣй йѣз (сѣтшѣмъясъд тай быдлаын эмѣсь) шѣпкѣдчисны нин: оз Дальнѣй Востокѣ, а мѣдарѣ нуѣны. Кытчѣкѣ лунвывлань. Сідзи и лои. Коркѣ Казань мыччысис. Сѣсся Волгоград (ставныс уськѣдчисны Рѣдина-мамѣс видзѣдлыны). Кодсюрѣ «ура» нин горзисны. Волгоградын пѣ служитны кутам. Майбыр, абу тай Дальнѣй Востокод, Му шар помыд... Но и Волгоград бокитѣ шлывгис-муніс, быттьѣ еджыд паракод. Помтѣм-дортѣм степ заводитчис. Кар ни сикт некѣн оз тыдав.

Тѣлысь вылын быттьѣ. Пармаысь петѣм коми йѣзлы — тешкодъ. Уналѣн сѣѣлѣмъяс нюкыртчисны... Код морѣ нуѣны? Код лешакѣ?

Коркѣ поездыс сувтис жѣ. «Кѣкъямысдас витѣд разъезд! — арзисны офицеръяс. — Гражданка йывсыд сѣсся вунѣдѣй! Пуляѣн — вагонъяссыд!»

И со — петисны. Сѣ кызь морт (ыджыд команда вѣлі). Перрон вылын полысь баяяс быттьѣ. Чатрасъѣны, ѣта-мѣд дорас жмитчѣны... Ѣтувнад тай гажаджык... Крепитчы, салдат! Ставыс водзын на!

Строй водзын юѣртисны: команда воис Крут-Ярѣ. Военнѣй кар. Позьѣ шуны, стратегическѣй полигонлѣн юркар. Космическѣй войска. Эськѣ быд лешакыс служитѣ. Железнодорожникъяссянь — морскѣй пехотаѣдз (мый вѣчѣны морпехъяс кос степ шѣрас? Кѣлесаа карабъяс тойлалѣны?). Тасянь выльѣн воѣм салдатъяссѣс шыблаласны-разѣдасны полигон пасъта тшак моз сярмунѣм частъяссѣ. Верман веськавны и... морскѣй пехотаад (тайѣс кывлѣм бѣрын вель уна рекрутлѣн синмыс кольчаасъліс).

А водзѣсѣ мый казътывсѣѣ? Пывсян. Гимнастѣрка, гач да дѣрѣм. «Обсервация». Строевѣй. Ать-два! «Спортгородок». Сержантъясслѣн горзѣм: «Тіян Комиад кубометр сынѣд вылѣ дизентериялѣн ѣти микроб, а тан — кыксѣ! Нѣшта холера да чума. Важ шойнаясын микробъяссыс «узьѣны», вермасны и петны. Сійѣн и чѣлѣмалам ставнытѣ! Турник вылын китѣ чашнитанныд — пом воас, салагаяс! Пежасяс ранаыд, и каюк! Ха-ха-ха!»

Сержантыд абу ѣткодъ. Кодкѣ — тѣлка, кодкѣ — зъверкодъ. Ѣти сержант, Рыгывыв Украинаса хохол, лун-лун риксис: «Вунѣдѣй гортса олѣмтѣ, дзодзѣгъяс*! Ѣнісянь тіян ловныд — Ен кийн, а тушаныд — ме кийн! Талунсянь ті мѣданныд вѣтасъны, кыдзи эськѣ менѣ вины! Но бѣрас, салагаяс, мен жѣ аттьѣ шуанныд!»

Сідзкодъ и артмис. Уналѣн бѣрас (сержантлѣн дукуыс нин эз вѣв) скѣр хохолыслы аттьѣ шуисны. Сыысь, мый регыдѣн бырѣдіс «мам йѣв» дуксѣ. Сыысь, мый тѣлысьѣн вѣчис челядьысь салдатъяссѣс, и та вѣсна кызвын «дзодзѣгыс», «салагаяс» кык во мысти гортас ловйѣн локтисны.

Быдсяма йѣзыс тай эмѣсь! Армияыд — нѣль пельѣсѣ йѣршитчѣм олѣм. Йѣзыд оз вежсыны. Наян кольѣ наянѣн, жеб кольѣ жебѣн... Шоныд места быдѣн корсѣ. Павеллѣн ѣнѣдз нюмыс

* Дзодзѣг (тані и водзѣ) — присяга примиттѣм на салдат (армияса сѣрни).

петö. Помнитö, кыз «обсервация» дырйи налысь командасö тшöкыда сувтöдлісны шеренгаö да öтарö юасисны: коді көсйö служитны сэн либö сэн? Коддөн эмöсь спорт разрядяс, коді ворсö музыкальной инструментъясөн, коді көсйö учебкаын сан-инструкторö либö пöварö велöдчыны? Да уна мукöдтор! И ставыс öд гижöдчöны, мутивöйяс, колö ли оз! Кужöны ли оз! Öтчыд (санинструкторö «коралісны») дзоньнас стройыс петавліс! Куимөн колисны, тшöтш — Павел. Батъыслысь кывъяссö помнитіс: «Эн чепсась, ассыд ныртö быдлаö эн сюй! Нинöм бурыс оз ло. Судьбасыд он пышйы. Кызди выліас шуöма, сідз и лo-ас», — колльöдігас чорыда крапкис батъыс.

Паш гөгөрвоис, мый батъыс кывъяс сайын — кутшöмкö правда. Кывнад тірöдны — бөръя делö.

...«Обсервация» помасигөн локтісны выль «ньöбасъысьяс». Кыз тай Княжпогостас (присяга эз и лэдзны примитны). Заводитчис «корасьöм». Медводз босьталісны «шоныд места» корсьысьясöс. Гирилюки кытчöкö новлісны. Вошисны-бырисны, дукыс сылі. Жикин сэк первойысь мөвпыштіс, мый некодлы оз ков да татчö, Крут-Ярас, и кольöдасны. Казармаын морт кызь и довъяліс нин сöмын. Сідзкö, судьба... Быдлаын служитны позьö. Кык воыд кызкö коляс... Но эз тай сы ног ло. Коркö ранитчöм зъвер моз чилöстіс дневальной: «Жикин! Көлуйнад — ывлаö! КПП дорö!»! Кватитіс Паш водзвыв дасьтöм вещмешöксö, видзöдліс бөръяысь казарма пытшкөссö да тэрыбакодъ и петіс. Некутшöм жалиттөг. КПП дорысь аддзис ас кодыс жö жугыль салдатъясöс. Морт дас ыжъяс моз жмитчисны ворота дорас. Сьöлöмыс неуна личмуніс: ас командасыс нель тöдсаös век жö аддзис. «Слабог, землякъяс на эмöсь...» — думыштіс. Чолöмасис-киасис. Öттшöтш мукöдыскöд тöдмасис (шөр Россияысь да Уралысь вөлöмаöсь).

...Ставнысö сэсся öти ГАЗ-66 машинаö сölöдісны (а мый дас мортыдлы?). Найöс «ньöбысь» капитан кашкөмөн бруткысис-пуксис кабинаö, а сержант — новобранечьяс дорö, тентөн вевттьöм кузовö. Мунігчöжыс (мунісны час нель) томъяс вылын тешитчис. «Гöрдитчöй, зырымбедьяс! Медбур местаас веськалін-ныд, космической войскаö! Дзик юр вемас, ЦУП-ö!» — кыз гөлöсөн gryмакыліс сержант. — Спутникъяс бөрся да ракетаяс бөрся кыйкъявны мöданныд. Иностранечьясöс аддзыланныд: чехъясöс, полякъясöс, немечьясöс, весиг кубинечьясöс... Ха-ха! Варшавской договор! Вын! Кывлінныд, салагаяс? Но эн чайтöй, мый олöмныд ма кодъ юмов лоас. Час, волам... Дорын узылыны велöдам. Водзвыв шуа: медся шог лоö дышъяслы да наянъяслы. Шлангъяслы! Эмöсь кө татшöмъясыс, асьныд джагöдчöй! Тöдöй, дзодзөгъяс! И терпитöй. Сержантлөн да «пöльлөн» кывйыс ставныдлы — закон...»

Эз и тупкысылы вомыс сержантлөн. Варов морт веськаліс. Дерт, эз быдөн сійöс кывзы. Кодсюрöыс кө повзьöм чужöмөн дзöргисны лытöм кывъя «ичöt командир» вылö, то мукöдыс зэв на-й чöскыда вутралісны-узисны (казармаад унпöтыд оз шедлы, да тан көтъ позяс ойбыртыштыны). Павеллы пöсь ни көдзыд жö вöлі, мый сэн сержант тшебритö. Олöмыс велöдіс нин: быргандарыд збыльвылас абу скөр. Чöv олысьысь колö повны... Унджык туйсö сэсся узис жö.

...Мый водзё вөлі? Вєськаліс Павел ЦУП-ад, весиг кутшөмкө радлун чужліс. Судьбаыд тай со эз ылөд, көть шоныд местатö Павел эз корсь. И землякъяс орччөн эмось. Позьё овны...

Брянскöй обласьтысь, Жуковка карысь (көнi СССР дырйи велосипедъяс вöчавлісны) öти зонкөд, Миша Смуровкөд, ёна другасис. Кыдзкө ачыс быттё ставыс артмис. Вокъяс кодьöсь лоины. Пыр öтлаын. Крöватъясыс весиг орччөн. Смуров — боксёр, спорт мастерö кандидат. Ёна спортротаö «гöтралöмаöсь», но помöдз тай со мортыс пыксёма. Павел кодь жö «нигилист да фаталист», шоныд места оз корсь... Миш вылад, майбыр, армияд некод эз лезит. «Пöльяс» ни «черпакъяс». Видлы воны... Сарапана радиоыд тан бура уджалö. Смуровыд Павелöс гозмöдысь дорйыліс жö. Да, позьö тан овны... Позьö служитны. Недыр мысти присяга примитасны, и...

Буретш тайö здукас Павелöс судьбаыс первойысь «крукыштіс».

...ПХД вөлі — парко-хозяйственной лун. Павел да Миш овощехранилищєын ноксисны, лöп-ёгсö весалісны. И сэк восьса öдзöс пырыс кодкө равöстiс: «Жикин танi? Кык минут мысти — казармаын! Котöрөн! Вещмешöкыд дась нин!»

Бiркмуніс Пашлөн сьölöмыс. Быттё ёсь пуртөн вöлыштiсны сэтчö. Көдзыд... Вот тэныд и судьба, вот и ворс ськөд... Пашлөн кельдöдөм чужөм — Мишлөн кельдöдөм чужөмлы паныд. «Ме кольöда,— шуис сэк ёртыс.— И тэкöд тшöтш вöзйыся. Шуи — вöча. Сэтшөм ме. Вот аддзылан!»

Öтлаын мунісны казармаö. Дзуртан öдзöсöд пырисны. И бара Павел сьölөмнас уси. Койка дорас, морöс вылас кияссö гартыштöмөн, коксö паськөдөмөн, сулаліс тöдтөм сержант. Страк! Сьöд тшöтя чужөм, вежон, надейнö, абу бритчылöма... А тушаыс! Гөра! Кык метра! Пудъя гираа кулакъяс... Балябөжас — кельыдлөз берет. И погонъясыс лөзöсь.

— Но, и кодi тэ?— синъяссö сувтöдiс Павел вылө, кыз гөлөсөн буркнитіс сержант.

— Радөвöй Жикин,— кыдзкө чипөстөмөн артмис Пашлөн.

— Тэ көн катласян, салдат? Генерал али мый? Абу на радөвöй весиг тэ, дзодзөг, присягатö на эн примит, а виччысьны лөö, салага! Шашарит мешöктö, сэн ставыс нин дась. Куим здук мысти — КПП вылын!

Павел полiгтыр честь сетіс, и сөмын та бөрти шога видзöдліс орччөн сулалысь Миша вылө. Но мöдыс быттё эз казаяв ёртсö. Сійö синъяснас «йирис» сержантöс:

— Позьö шыödчыны?

— Но,— нурбыльтіс сержант.— А тэ кодi, сэтшөм сюсьыс?

— Михаил Смуров! Босьтöй менö тшöтш. Ми Жикинкөд бур ёртъяс. И кöсьям öтлаын служитны!

— Збой,— нюмуніс сержант, и чужөмыс сьлөн неуна шыляммыштіс, шаньмыштіс.— Пыдди пукта. Но мый меным тэнад кöсьöмыд? Тэ көнi, боец? Армияд оз кöсьöм серти овны. Вот ме тайö здукас кöсья гортса пызан сайын пукавны, мича нылöс пельпомöдыс кутыштылыны, аскур чурскыны, а вот тэкöд лөö тшетшкөдчыны... Ми армияын, салдат, абу санаторийын! Устав серти быттё олам. А закон серти кө, öтлаын служитны позьö сөмын вокъяслы. Вот тадз...

— Ми Пашкөд вокъяс кодъось!— торкис сержантос Смуров.

— Тупкы вомтө,— пыр жө бөр чорзис сержантлөн гөлөсыс.— Тан ме сёрнита! А тэ чери моз чөв ов! Вош, кыс локтін, тэ мен он ков!

— Ме КПП дорын виччысыла, сэн прöщайтчам,— шöпнитіс Миш Павеллы, и мөдөдчис өдзöслань. Сержант шпыннälмөн видзөдіс мышкас. Мыйкө мөвпаліс. Чужөмыс ворсіс... Вераліс...

— Сувт!— чорыда горөдіс Мишлы. Быттö плетöн швачкис. Смуров озчирк моз бергөдчис. Видзөдліс колыс синъясөн сержант вылө. Надеяөн. Но чуймавтөг. Быттö «сувт» кывсö водзвыв виччысис. Быттö төдіс...

— Кыдз, шуан, овыд? Смуров? Кытысь? Брянскöй облас-тьысь? Виччыслöй тан! Кыкнанныд!

Сьöкыд воськовъясөн (весиг джоджыс дзуртіс) багатыр кодъ хохол петіс казармаысь. Ёртъяс колысны. Чөв олöны. Юрсигусьөн лэбалысь надея öні войлаліс налөн юр вемъясын. «Ставыс лоö бур, вот аддзылан»,— синнас нюмъяліс Миш. Сöмын синнас. Вот аддзылан пö... Вот аддзылан...

Быттö ваö видзөдіс (бöрыннас Павел тшöкыда чуймавліс Мишлөн «туналөм-төдөм» вылө). Бөр локтіс сержант да бруткис-шыбитіс кок дорас Мишлы нопсö.

— Ачым чукөрті, салага,— шпыннälіс сійö.— Вытöйд кажит-чис. Татшöм салдатыс мем колө. Öдвa и лэдзисны тэнö... Но и менö он беровт, он песовт. Пыкси кө — пом. И право менам эм. Кутöны кө тэнö — бур... Мынтөдчöны кө — лөп... А лөпыд мен оз ков. Öні вошöй син улысь, КПП дорын аддзысям!

Жикин да Смуров радысла тшөтяссьöм сержант водзад пидзöс вылас дасьöсь уськөдчыны. Синисадь котөртісны КПП дорö, полісны, мый колясны найöс. Эз кольны. Час мысти на сöмын сержантыд локтіс. Павел сэк кості землякъяскөд прöщайтчис. Гашкө пö, коркө и аддзысылам на. А Мишлөн Жуков-каысь тан некод эз вöv. Крут-Ярö куимөн кольöмаось.

Дас кык салдатос пуксьөдісны тента «УРАЛ» машинаö. Каби-наас шмуткысис банийм чужöма кызіник майор, тента доддьö — багатыр сержантыд. Чөв олісны салдатъяс, кутшöмкө ас дум мөвпалісны. Но кор машина вөрзис, сержант паровоз гудök кодъ гөлөснас рукөстіс:

— Но, мый юртö öшөдінныд, дзодзөгъяс?! Чайтöй — адысь райö пышйінныд! Регыд гөгөрвоанныд. Водзвыв шуа: дас кык мортысь менам командаö веськаласны сöмын квайтөн. Сюсьяс-ыс. Төлкаясыс. Вежöраясыс. Би пыр да ва пыр ковмас мунны, мед командаö веськавны. Öтувъя карантин вуджанныд, присяга примитанныд. Та бöрын выль олөм заводитчас. Инасянныд, абу кө урөдъяс! Эмось кө сэтшөмыс, öні жö чеччыштöй машинасыс, нинөм ог шу. Абу на сёр. А вот бöрас сёр лоö. Тадзи ме шуа, Саша Старченко! Хохол, мөд ногөн кө,— украинеч. Быдөнлы — Старöй! Дзодзөгъяссянь — пöльясөдз! Төдöй да пеляд сюркня-лöй. А то верма и дözмыны. Дözма кө... Ок! Ладнö, вугралöй, туйыс кузь... Верманныд весиг сывны. Сывсьö кө...

Но кутшöм нин сыйлөм!

Журөдісны-вайисны том салдатъясöс военнöй аэродром вылө. Быттö ичөтик карö веськалісны. Кирпичысь тэчөм керкаяс сулалöны, мукөд объектъяс... Лэбалан полосасянь (сійö новобра-

лісны нөшөн лёк думъяс... «Виа, ставнысö виа...» И виис эськө, өтчаяннөй мортыд. Асьсө төдіс. Но судьбаыс бара на милөсьт сетіс. Серөктіс. Кор Павел шатлалөмөн, код юра моз, сувтіс кок вылас, кор дойысла өзъян синмөн воськовтіс куим сержан-тыслань, найө... пуля моз чечыштисны комнатаысь.

И сэсянь Жикинлы найө лоисны... ёртъясөн. Дугдісны дзе-рөдны. Весиг изьвинитчисны на бөрас. Повзим пö тэнад синмысь, гөг сюрөсөн гөгөрвоим — виан. Молодеч пö, мыйгырысь коман-диръяслы эн сорит. А Павел и збыль некодлы эз висьтавлы ло-өмтор йывсьыс. Весиг Смуровлы. Но он жö тай ставсö вермы дзебны. Торйөн нин армияд. Öти кудйын олігад тай гыыс öдйö разалö. Öтчөд ывлаын, плац вылын маршируйтігөн, Паш дорö матыстчис Старöй да шпыннялөмөн шуис: «И водзö тадз ов. Эн соритчы. Тан соритчысьтö дөбелькиаласны. Терпитыштан, и ачөд казакөн лоан...» Павел гөгөрвоис, мый Старöй ставсö төдö. Но нинөм эз шу.

...Карантин помын примитисны присяга. Бөрзбөм сьөлөмөн Павел лыддис: «Ме, Сöветскöй Союза гражданин... принимайта присяга...» Синваыс муртса эз пет. Öнісянь сійö — салдат! Рө-дина дорйысь! Олөмсö да дзоньвидзалунсö сетас Рөдина вöсна! Буретш тадз мөвпаліс Павел. Пытшкөс ловнас, сьөлөмсянныс. И ачыс аслыс эскис.

Карантин бөрын «бокөвөйясөс» торйөдісны батальонысь да вайисны төдтөм объект вылө. Сійö сулаліс аэродромсянь верст джын сайын. Кирпичысь тэчөм кык судта стрöйба. Орччөн — мукөд объектъяс. Йöрсö потшöма бытшкасьысь сутугаөн. Режим-нөй объект! Салдатъяс, дерт, ылөсас төдісны нин, кытчö найөс вайисны (карантин дырйи шөпкөдісны). Павелөс кодсюрө весиг дуригмоз бокас тойлаліс: «Шпионөн лоан... Рөдинатö эн пре-дайт!»

Ылөс кывъяс сайын мыччасис збыль. Тан меститчис куим РДГ*. «Уджалісны» АК-РЛДН системаын (космическöй да мукөд-пөлөс ылысса разведка), «Рытыввыв» юкөнын. «Асыывыв» юкөн меститчис Камчаткаын, сэн служитисны морпехъяс. Бөрынджык Павел накод паныдасьліс жö, ёртасис. Но тайö лои бөрынджык...

...Дас кык морт топалөм сьөлөмөн сулалісны кирпич стрöйба-ас да виччысисны, кор найөс өткөн корасны төдтөм жырьö. Быттö юр вундөм водзын. Коркө öдзöсыс воссис, горөдісны: «Жикин!»

Неыджыд жырьын, пызан сайын, быттö тунъяс пукалісны куимөн. Полковник, майор да капитан. Интересөн дзоргисны Павел вылө. Паніс сёрнисö полковник. Но кутшөмкө төдтөм кыв вылын. Коми зонмыд тай нинөм эз гөгөрво-а. Сөмын чуймис. Мыр моз сулаліс.

— Эн гөгөрво? — роч вылө вуджис полковник.

— Изьвинитöй, эг...

— Кыдзи? — нюмъяліс полковник. — Со тан, личнөй делөад, гижöма, мый тэ — коми. Сідз?

— Сідз.

* РДГ — разведывательно-десантнөй группа.

— И коми кывсö тöдан?

— Тöда.

— Вуджöд коми былö: «Я люблю свою родину».

— Ме радейта ассым чужан муöс.

— М-м-м... Эг жö гөгөрво. Ачым чужлі да быдми Эстонияын, кöть эськö и роч. Овöй — Ругин. Водзö былö тöд. Но эст кывсö öнöдз помнита. Коми да эст кывъясыд — матысса, финскöй кывъяс, мыйла либö öта-мöдöс ог гөгөрвоёй?

Павел лэптыліс пельпомъяссö. Ме пö абу мыжа...

А полковник стрöга нин шуис:

— Ставыс тэнад киын, радöвöй Жикин. Видзöдöм серти, тэ абу лёк салдат. Комияс тан водзын эз служитлыны. Ог помнит. Ме абу паныд, служит... Да эн янöд ни асьтö, ни бать-мамтö. А то став комисö няйтö вöйтан! Бөръя кывйыс — абу менам. Веськыда шуа. Уна пöсь ковмас кисьтны, мед разведкаö весь-кавны. Тöлысь чöж синсьыд би петмөн мöданныд бергавны, быттö пропеллёръяс... Бур боксянь петкöдчан — бөр татчö во-ан. Он кö шогмы, лöг куттöг торйöдчам. И век жö виччысьны кута, Жикин... Мед кöть и öта-мöдöс комиа-эстөн эг гөгөрвоёй...

Павел гөрд, пым чужöмөн петіс жырйысь. Быттö прамöй пывсян бöрын. Корöсь жар апыштöм бöрын. Весиг ёртъясыс повзисны. «Мый нö лои?» — шöпкöдчисны. А Павел кинас öвт-чис. Сьölöмыс сырчик моз тіраліс. «Öти кокөн тан нин... Збыль мöй?! Мен надея сетісны, мый босьтасны! Аттö, бара на судьба-öй... Колö жö... Эстонияын чужлöма полковникыс... Колö жö...»

А сэсся заводитчис интереснöй кад. Лунысь-лун — выль чуймöданатор. Сölöдісны важиник Ли-2 самолётö... Стöчджыка кö, дерт, война кадся «Дуглас» былö. Сöмын нимсö тай роч вы-лö вежöмаöсь. Первой нырас пырисны квайт салдат, куим офи-цер (кыкыс — медицинаысь). Сьöкыда кыпöдчис самолётыс, ок сьöкыда... Ружтöмөн, дзуртігмоз. Видзöдöмпырысь, пöрысьысла бөрдіс, норасис... Тіркмунлісны салдатъяслөн сьölöмъяс — gryп-кысясны! Но кыпöдчис тай, матушкоыд! Кутчысис борд вылас, öшйис сынöдас, первой нэриника, сэсся зумыда нин, юсь-лэба-чөн на, гашкö, бара асьсö кыліс! Куим час сынöдын «войлаліс-ны». Öтарö дай мöдарö. То увлань, то вывлань. А офицеръясыд сюся видзöдöны! Коді первойөн бледöдас, кодöс первойөн ділк-вайöдас... Виччысьöны... Павеллы Старöй тöрыт шöпнитіс:

«Восан — тэд пом лоас. Кöть садьтö вошты, но кутчысь. Мöд ногыс менам командаö некор он веськав. Вестибулярнöй аппараттö прöверайтны мöдасны... Тöд...» Павел, дерт жö, Миш-лы, другыдлы, шöпнитіс. Со öні и кутчысьöны. Бумага кодь бледöсь ставныс. Но оз позь слабөн петкöдчыны, оз позь! Мед кö сизимысь нин деливöыс горшöдзыс воліс...

Мед кö... Кутчысьны, кутчысьны! И кор тайö рöзваль-самолё-тыс пуксьылас? Кор нин матушко-муыс найöс бөр примитас?

Коркö пуксисны жö. Америкаын вöчлөм самолёт gryм-грамөн сибöдчис му бердас. «Но мый, кутшпиян, — сералöны лётчикъяс да офицеръяс. — Деливö? Терпитыштанныд. Дон босьттöг тіянöс, лопдойясöс, кыскалам, карасин видзам! Быдөнсянь — штоп! Ха-ха!» И колö жö! Квайт мортысь Паш да Миш сöмын помöдз терпитісны. Кор самолётö пуксьöдісны нöшта квайт салдатöс,

а «пенсионер» Ли-2, бара кыза ружтөмөн, норасигмоз, выльысь кыпөдчис, сэк кык ёрт катласьомён вешйисны полоса дорын сулалысь ыджыд көрт бочка сайо да пөтмөныс восісны... Тані поэьо нин! Оні найос некод оз казав.

...Парашютон чеччавны медпервой велөдісны частьын, вышкасянь. ПДС*-са начальник, капитан Ночевка (тешкодьос жө украинечьяслон овьясыс!), дугдывтөг кыз гөлөснас индаліс:

— Воин! Салдат! Коктө, коктө топөд! Пызь мешок али мый? Юрнад уджалой! Вышкасянь кө оні кык пудья гира моз пластайтчаннды, кыз самолётсянь муас усянныд? Кымынысь отиторсө колө петкөдлыны? Бордтөм дзодзөгьяс! Курөгьяс! Увлань юрөн ставнытө шыбалала! Кокьястө топөдой, жмитой, ва челядь!

...Нулісны Ахтуринскө. Тан медводдзаысь Павел да сьлөн ёртьясыс аддзылісны НАТО-са самолётьяс. Американскөй истребитель Ф-15, А-10 «Тандерболт» штурмовик, французскөй «Мираж», английскөй «Харриер». Вот дивөйд! Көть збыльвылас нинөм чуймавынсь. Вөлөмкө, тан төдмөдоны мянанысь лётчикьясөс НАТО-са самолётьясөн, налысь слаб да вына местаяссө корсьоны. А павельясөс сэтчө медкомиссия вылө вайлісны. Быд «пельос» бара видалісны. Тренажёрьяс вылын песісны. Атшваймөн ставыслы лои. Кор нин бергалөмыс помасьлас?

...Төлысь да джын коли. Дурпоп моз бергалігад кадыс өдйө и муніс. Сулалөны стройын столбьяс моз дас кыкөн, а сөмын квайтлы туйыс восьяс разведкаө, кутшөмкө төдтөм «РДГ»-ө.

Коді веськалас? Быдөнлөн повзьом лэбачпион тіпкис сьөлөмыс. Быдөн думсьыс эскис, мый буретш сылысь овсө шуасны. Сулалөны. Тіралөны. Виччысьоны... Тан жө — офицерьяс да сержантьяс. Тан жө — полковник Ругин. Тан жө — Старөй... Зумыштчөм чужөма мыйкө... Настроенньөыс, буракө, абу. Баханцов! Смуров!.. Кынмис Павел. Быттө бокисянь видзөдө ас вылас (татшөмторйыс ськөд овлө). Оз мөй босьтны? Оз... А Мишөс со босьтісны... Молодеч. Везитіс тай... Көть сы вөсна радлыштас...

Павелмысь овсө витөдөн шуисны. Век на кын, нинөм оз гөгөрво. Боксянныс тойыштісны. Сөмын сэк паляліс, ас вежөрас воис, стройысь воськовтіс. Паныдасис Мишлөн югьялысь синьяскөд. Воча югнитіс-зыркнитіс. Судьба... Аттьө тэныд, аттьө, аттьө...

Тадзи Павел да Миш и веськалісны разведкаө.

«СК» («спецконтроль») отувья котырын служитіс көкьямыс-дас сайо морт: нелямын офицер да сы мында жө салдат-сержант. «СК»-лөн куим котыр: «Гепард», «Ястреб» да «Ящер». Быдөнлөн — аслас торья мог, но ота-мөдлы отсасьоны. «Ястреб» — дугдывтөг сынөдын, самолётьясын. Сэтчө медся вежөраяссө босьтөны, институт либө техникум бөрын. Лэбалөны «бордья идөгьяс», кыйкьялөны гөгөр, сюся видзөдоны улө-вылө асланыс «вежөра» аппаратураон. Нинөм тай оз вош налөн видзөдлас улысь, мусьыс и васьыс быдтор аддзөны. Космосысь и. НАТО-лөн спутникьясянь — ракетной шахтаясөдз. Дзоргөны тшөтш Союзлөн выль ракетаяс испытайтөм бөрся. Сійөн и меститісны татчө, ракетной полигон вылас. Отсасьой пө, нинөм дась нянь сөйны. А му вылас уджалөны «Ящер» да «Гепард». Отиыс радиомаякьясөн сы-

* ПДС — парашютно-десантной служба.

нөдса самолётъяслы индалө лэбан «калидор», мед бордыс кытчөкө бокө эз уйышт. А «Гепардлөн» медшөр могыс — «Ящерөс» дорйыны. Физическөя. Любөй вөрөгысь. Кув, но — дорйы. Бөръя лолөдз, бөръя вир тусьөдз. Вөч ставсө, мед «Ящерлөн» гуся аппаратураыс вөрөг киö эз веськав... Та вөсна «Гепардөс» медъёна и песисны. Война кежлө дасьтисны. И диверсия вөчавны велөдисны. «Гепардлөн» «радейтана» объектъясыс — Рытивывыв Германияса шахтаясын сулалысь американскөй ядернөй ракетаяс. Быд объект важөн нин төдса, гижөма да пасйөма. Спутниксьыд он дзебсы. Война кө заводитчас, колө öти здукөн ракетаяссө взорвитны, мед лэбны эз удитны... Но Ен мед видзас таысь, кыз шуласны. Бурджык мирнөй кадө «войнаысь ворсны...».

Павел веськалис «Гепардө», Миш — «Ящерө». Самолёт вылын лэбавны налөн образованньö эз тырмы.

Армия... Мыйла сйö кадсö нэм чöжыд помнитан мужик морт-тыд? Казытылан и казытылан... Со и Павел нинөм эз вунөд. Кыдзи куимысь ковмис Афганö пыравлыны. Кыдзи «Стингерысь» увлань юрөн усис «ястребъяслөн» Ан-26. Кыдзи сэни öтпырйö пöгибнитис дас öкмыс морт... Ставсö, ставсö помнитö Павел. Армия... Сэни ставыс пансис. Олөм дзугсьöмыс, олөм киссьöмыс...

Катя...

Карантинын бергалігас Павеллы некор вöли Катя йылысь думайтны. Прöст кадыс чунылыс мында и эм. Көркө сэсся сержантъяс «чужъялөмөн» тшöктисны жö быдөнөс гортас письмөтор гирстыштны. Тыртөм конвертъяс ныр водзаныс шыбитисны... Павел мамыслы гижис. Корис тшöтш Катялы чолөм висътавны. Ахтуринскысь локтөм бöрын Жикинөс виччысисны Катясянь öтпырйö куим письмө. Мича, сьölөм вөрзьөдана кывъяса... Казытыла пö, донай, пыр тэ йылысь мөвпала. И Павел тадз жö гижис. Виччысь пö, помнита... Сывъяла...

Вежоннас кыкысь кутіс локны Катясянь письмө. Часі моз. Кодсюрö весиг завидьтис Пашлы. «Везитö жö тэд, мытарлы,— дэльөдчыліс и Миш.— Вот меным мыйлакө некод оз гиж, а тэд лун кост мысьт письмө воö. Көн олөмас правдаыс? Мыйөн тэ бурджык? Мырддыны ли мый Катятö...»

— Видлы,— вашъяліс Павел.— Друг радиыд, гашкө, и бокө кежа... Абу жалъ.

А сэсся воис кок сөн орөдана письмө. Дойдана. Страшнөй. Эз Катясянь. Чангылъ ныра Нина гижөма. Медводдзасянь дасөд классөдз Павелкөд да Катякөд велөдчис, Катялы пöдруга улö век жмитчис, леститчис. И со письмө гижны убöлитөма, быттö Жикинлы бур пöдруга... Некор письмөсö Павел оз вунөд. Нина гижис, мый Катяыс карын (сэн велөдчис) гуляйтö, пöслөвичаөн сиктын лоөма. Ставыс пö чунынас индöны, дивитöны. И öттшöтш Павелөс жалитöны. Öтырышъя пö другъясöс вежалө, быд лун выль. Талун öтикөд шöйтö, аски — мөдкөд. Видзөдны пö дыш, та вөсна и гижи. Жаль да... Век жö öти классын пö öд велөдчылім, абу дзик бокөвöйяс... Синтö пö восьта.

Павел эз йöймы. Эз бөрддзы. Эз котөрт öружейкаö автоматла. Сöмын йинень моз кынмис. Да сэтшөмөн сэсся и коли. Олөм помөдзыс. Мөд мортөн лои. Ярөн, лөкөн (гашкө, век сэтшөм и

вөлі да?). Ёртъясыс, дерт, аддзисны сылысь вежсьомсö. «Сьö-лышт, баба понда кутан майшасьны! Мужик али нямöд?» — пельпомас тапкöдисны.

Павел дугдiс Катяыдлы гижны, кöть сысянь письмöйс öтарö локтiс. Конвертсö восьтывтöг курилкаын и сотлiс.

Коркö воис мамсяныс письмö. Мый пö лоис, мыйла Катялы он гиж? Оз пö гөгөрво нылыс нинöм. Вочавидзис Павел: шлявлы пö бур кывсö ог вермы гижны, а Катя нима нывсö ог тöд и эг тöдды. Тадз пö и висьтав, аддзылан кö. Та бöрын воис батьсяныс гижöд.

Кывъяссö öнöдз помнитö Павел. Батьыс гижис: «...Абу мужик тэ, а ветьöк. Быд лöпсö лёк йöзлысь кывзан, бур нывлысь олöмсö пазан... Мый ме тэд шулi армияад колльöдiгад? Мортөн кольны! Вунöдiн? Каитчыны кутан, да сёр лоö. Неморт тай тэ. А ме со помнита тэнö шаньön. Талунöдз помнитi...»

Нинöм эз вочавидз Павел. И мамыслы дугдiс гижны. Сöмын чойыскöд йитöдсö эз орöд. Но дзикöдз чорзис. Олöй пö, кызд кöсьянный, а ме ачым ыджыд-паськыд. Эг ме, а тi эновтчинный. Тiян öти туйвизь, а менам — мöд... Судьба. Аслам. Öтнамлön.

И век жö синмыс пемдылiс, кор чойыс гижис, мый Катерина бырöма... «Некод Катяыдлön эз вöв,— скöрысь гижис Вера чойыс.— Чангыль ныра Нинаыс, урöсыс, нарошнö Катяös няйтö вöйтiс, мед тiянös янсöдны. Ачыс кöсйис тэнад сылы вылö öшöдчыны, школасяныд Катя вылö завидьтiс. А тэ быттö эн и казьявлы кельдöдöм синнад. Енмыс ставсö аддзö, ковмас на и беринös Ниналы кывкутны. А Катяыд дзикöдз шогысла косьмис. Связь техникумын велöдчис, каникул вылö локтiс, да — смерть кодь! Сьöдöдöма, лы ни кучик! И этiйö Рыжöй Пете урöд вылас веськалöма. Рытнас, уличын... Изьдевайтчöма Рыжöйыс. Пежалöма. Тöдö, мый Катяös дорйысьыс матын абу. Тöдö, мый тэ эновтiн. Регыдön сэсся Катяыд и бырис. Сылiс шог-позорысь, быттö олöмыс кытчöкö пышйис... Мыйла тадз лои, вокö? Мый тэ вöчин? Миян семья вылö позор уси. Тэ вöсна. Батьыд тэнö синнас видзöдны оз кöсйы, мед пö тан дукуыс эз вöв. Пиöй пö коркö вöлi, и — абу. Мам помся бöрдö. Лида тьöткöд, Катя мамкöд, öтлаын и ливкъялöны, некызд сьölöмныс оз бурмы... Мыйла тадз, вокö? Кодi тэнö сэн вежис, армияад? Тэ жö рамön, шаньön мунiн... Катя тэныд письмö кольлiс, мен вайлiс... Сетан пö армиясыс локтöм бöрас. Быттö тöдöма...»

Ру пиын быттö лыддис Павел Катялысь бөръя кывъяссö: «...Ме ог тöд, мыйысь мыжми тэ водзын, мыйысь кедзовтан. Йöткыштiн тай. Вунöдiн... Ог гөгөрво, и нинöм вöчны ог вермы. И ог кöсйы. Сылыад мырдön ог жö öшöдчы. Ме нинöмön тэнö ог невöлит, ог скöрав. Быдöнлön тай аслас олöм. Кодлönкö шылыыд, кодлönкö гурги-гарги... Но сьölöмсянь сиа, мед тэныд олöмад вывтi ыджыд гуранъясыс эз веськавны. Ме öд тэнö öтнадтö радейтлi. Öти муслун чужлiс, сiйön и водзö кута овны. Некод сэсся оз ков... Сьölöмön кыла: дыр кeжлö янсалiм. Армияад, надейнö, и кольччан. Оз нин кыскы, буракö, тэнö ас муыд... И ме ог кыскы... Прöстит, эм кö мыйысь. Шудаön ло. Рамön да мелiön, кутшöмön тöда тэнö ме... А меным сöмын шогсыны кольö. Важсö казьявлыны. Но коркö и менам синва косьмас...»

Нюкыртчис Пашлөн сьолөмыс. Розяссьом гадь моз лясмуніс, чиніс... Быттьо бырис... А гашкө, эз и вөвлы?

Рыжөй Пете... Кыкысь пукавлөм, кызь вит арөса мерин. Армиядзыс на Павел өтчид сійөс ёнакодь дйтшкөдліс. Сиктса клубын делөыс вөлі, кор вина гагйысь дурмөм Пете Катялысь сойсө муртса эз чег — мырдөн йөктыны кыскис... Павел сэк Рыжөй Петеос шошукөдыс клуб сайө петкөдіс. Мөдыс пуртө на кутчысьліс. Павел сэк штакетникөн пельпом лыас Рыжөйлы сизьдыштіс. Штакетникыс чегис, и Рыжөйлөн пельпом лыыс чегис жө. Грөзитчис Пете сэк Жикинлы, ловтө пө босьта, а сэсса кызкө өдйө бурасис. Лун-мөд мысти ачыс и матыстчис: вай вунөдам пө лөгнымөс, быдторйыс олөмад овлө. Абу тай вунөдома. Со кызди водзөссө босьтіс, урөды...

Но мыйлакө эз уськөдчы вөтө Пашлы Катя, эз повзьөдды узигас. Эз пот шөри и сьолөмыс. Весиг татшөм лөк юөр бөрын. Быттьо эськө и жалитіс Катяөс... И сөмын! Эз пыдісянь. Кызд тай жалитөны кино видзөдігөн усьөм-пөгибнитөм «миян дор» геройсөс. Либө еджыд рөма вөлөс (дзолядырйиыс Паш век бөрдліс, кор киноын еджыд вөлөс вилісны). Колөкө, Пашлөн воддза олөмыс «киноөн» и вөлі, а збылыс — тані, өні, тайө здукас? Збылыс — өнія Пашыс? Оз ков важсө жалитны, оз...

*Мый жалитны кассө?
Мый лоөма,— бөрө он воөд.
Эн казътывлы кассө,—
И сьолөмаг кокниджык лоө.
Мый мунөма, муніс...
И весьшөрө асьтө тэ летан.
Важ олөмаг сунін?
Тэ коркө сэсь петан на. Петан...*

Рыжөй Пете... Сөмын мед паныдасьлас, Павел юрсө сылысь бергөдас! Час, гортас волас, пуж петкөдлас. Пашлысь нывсө виис, нинөм абусыс. Төдөмөн ставсө вөчис Рыжөй Пете, төдөмөн, водзвыв мөвпыштөмөн, мед Пашөс няйтө уськөдны. Со пө тэныд, ветьоклы! Ог пө тэысь пов, салдат! Ковмас на, ковмас Рыжиклы вештысьны... Ковмас!

Эз Катяөс жалит Павел. Асьсө жалитіс. Няйтө суюөмсьыс. Сөмын асьсө, рөдимөйсө. Пиньнас гречкис.

...Павел төдіс, коді өні рөмпөштансьыс мыччыяс. Но эз көйы тайө мортсө адзыны. Оз лэдз сійөс Павел! Эн пыр! Кылан, эн пыр, он ков! Не-на-ви-ди-та! Гор-шад кут-чы-ся...

И збыль, кор рөмпөштанын тыдовтчис банийм чужөма, дзонь-видзалунөн ыпъялысь салдат, Павел горөдіс:

— Мун! Вош! Ме тэнө татчө эг корлы! Ме ог төд тэнө, ог..!

Шемөсмөм чужөма салдат думсьыс көйис на воськовтны, но саяліс бөр.

Вот тадз. Вот тадз колө! Вот тайө — правильнө! Оз көйы өнія Павел морт виыськөд паныдасьны. Катясө виыськөд. Батьсө да мамсө виыськөд. Мед кө и аскөдыс. Аскөдыс? Но этиа салда-тыс — абу өнія Паш! Абу! Абу! Сійө — мөд, мөд олөмысь!

...Армиясянь Павел гортас эз сэсся и волы. Чойыс коркө гижис, батыс пö кувсьома. Катя мозыс жö дзик регыдөн и сылöма. Кыдзкö пö кельдöдiс, ки-кокъяс сыркмунiсны, сейны дугдiс... А сэсся сьölöмыс сувтiс. Тук-тук. Тук-тук... И — абу мортыс. Весиг врачьяс кисö сöмын паськöдлöмaсь: ог пö гөгөрвоёй... Ачыс пö тай кыдзкö лэдзчысис, дышöдiс, надейнö, овнысö. Куим тöлысь мысти сэсся и гөтырыс, Павеллөн мамыс, верös бöрсяыс мöдарьяугыдö мунöма. Инфаркт. Мамыс и батыс кулöм водзас шуöмaсь: эн пö корöй Павелöс гуасьнысö. Коркö пö дырөн висьталöй, мый кувсим. Ваö шыбитöм кутюөн асьсö кылис сэк Павел. Эжва ютi кывтысь йи пласт вылын öткөн пукалысьөн. Кузьнеч горйын донöдöм кльöщиён бара топöдлiсны сьölöмсö. Мыжа... Мыжа... Мыжа пö ме... Но бара на — недыр кeжлö. Бара на эз помöдз...

Томлун! Öдйöкодъ и мунiс Павеллөн дойыс. Бурдыштiс. Көть вурысыс век жö коли.

Армиясянь отпускö Жикин ветлiс... Жуковкаö. Сирасис Смуров: гортад кө он мун, ветлы миянö! Тöдмасын менам чойкöд, Галякöд. Юр вундысь кодъ нывкаыс, но тэд, гашкö, и кажитчас. А друг? Колöкö, рöдняөн на лоам? Павел первойсö дöжнасис-кодъ, но ёнджыкасö мода радиыс. Некод сийös гортас эз виччысь... Жуковкаö кө, и Жуковкаö. Проезднöй билетсö штабсьыс сöмын Москваöдз корис-а. Полис жö командирьяслы висьтавны, мый гортас оз мун. Москваын пö пöдруга виччысьö, а Сыктывкарöдз ас сьöм вылö ветла, сьöмыс эм.

Галяыс Павеллы первойсянныс эз кажитчы. Збыльвылас. Кач-ва кодъ, кутшöмкö ышöпас ныв. Вылын ныра, да нöшта на и сьöкыд характера. Но Жикин асьыс мөвпгьяссö эз петкöдды. Зэв на-й мелiа сюсюкайтчис Галякöд. А мöдыслы, буракö, коми зонмыд сьölöмас ийджтысис жö. Аслыспölös... Абу роч. Коми пö. Тешкодъ. Таöдз Галя весиг эз кывлы комияс йылысь. Тöдтöм-торйыд тай аслыспölöса кыскö. Нывлөн югъялан синмыс унатор йылысь висьталiс. Томлун... Куим лун мысти ныла-зонма öти шебрас улын нин туплясисны. Галялөн мамыс (батыс кувсьылöма нин) зонмös эз укöрайт. Нывсö бура тöдiс: мый көсьяс, сiйös и вöчас. Некодлысь тай оз юав. Зятён кө Павел лоас, абу лёк. Век жö пилөн ёрт, вок кодъ...

*Арся вöрын, ког жуймöма, кын...
Дзикöдз чусмöма бипур.
Сöмын босьтöма пöимлысь вын
Орччөн сулалысь пипу.
Сыкöд тулысын агдзылiм ми:
Танi рагейтчöм чужис.
Зонлөн синъясын öзъялысь би
Нывлөн синъясö вуджис.
Пуыг шöпкöдö: локтас на мöг...
Олöм вöрзöдысь тулыс!
Сiйö, коньöрöй, öнöдз оз тöг:
Важөн рагейтчöм кулис.
...Пöим, пöим...
Мыйысь грекö вöйим?*

*Өзтам битө буртор ыла,—
Артмө сөмын пөим...*

Отпуск помасьом бөрын Галя колльөдіс Павелөс, быттьө прамой невестапу нин. Локтан пө татчө овны, некытчө он воштысь, сералис. Сиргаг моз кутчысис — бурөн он мын. Но сьөлөмнас Галя дінө зонмөс эз кыскы. А кытчө воштысьны? Гортө туйыс тупкыса, некод сэн эз виччысь. Некодлы оз ков. Ставныслы — бокөвөй. Весиг чойыслы. Бать-мамысь да Катяысь Павелөс и чойыс некор оз прөстит. Кыв ылад, колөкө, өтигор шуас, а думьяснас... Көин. Отка көинөн лоин тэ, Павел. Ставыс тэд — паныд. И тэ — ставыслы паныд. Но и мед! Көин кө и — көин! Кутам овны көин ног, некодөс жалиттөг!

Өні Жикин збыльысь некодөс эз жалит. Скөр синваөн бөрдисны сылөн грөз улө веськалом том садатъяс. Нинөм абусыс Павел вермис мортлы пель бокас сетны. Весиг сержантъяс родыштисны сыысь, полисны дзенъясьны петук кодь яр мортыскөд. Отнас Смуров өртыс пыр орччөн вөлі. Но и сійө унаысь лөньөдіс: «Эн вывтiasь, Жик, дисбатө либө тюрмаө веськалан...»

— А-а-а,— өвтыштчис Паш.— Пөсь ни көдзыд. Тюрмаад йөз жө олоны. Колөкө, менам сэн и местай?

Смуров эз шыбит Павелөс, эз йөткышт. Енсянь сетөм өрт веськаліс Жикинлы. Отчыд овлө. Овлө кө... Помөдзыс орччөн вөлі. Кувтөдзыс.

Армия бөрас Павел да Миш мөдөдчисны Жуковкаө. А сэсся вөлі көлысь, өтлаасисны Галя да Павел. Сөмын тай пызан сайын пукалігөн Пашлөн пытшкөсыс бөрдис. Омаявны окота вөлі. Но кызкө терпитис. Первойсө том гозъя тьөща дінас олісны, бөрынджык петисны, торъя квартира сюри. А сэсся и нылөс чужтисны, Анжелаөс (Павеллы татшөм нимыс эз во сьөлөм ылас, но видлы Галякөд вензыны!). Быттьө эськө и олөм пуксис... Мишкөд, өні шуринкөд нин, коммерцияө уськөдчисны, көлуйөн вузасыны мөдісны. «Челнокалісны». Но эз гажөд олөмыс Павелөс. Мыйкө эз тырмы сылы, мыйкө майшөдліс. И семья костын — дугдывтөм зык-шум. Нинөм Галялы абу бур. Отарө йирө. Ставыс не сідз. Сьөмтө пө этиша ваян... Сьөд вөр шөрысь петөм ошлөн пө культурайд оз тырмы... Ныв радиыс сөмын и терпитис Павел Галяөс. Но гоз-мөдысь, терпенньө бырөм бөрын, гөтырсө шлөчкыліс жө. А сэки — тьөщасянь чард-гым, и весиг Анжела нин букыша видзөдө...

Коркө и нылыс быдмис, да вочасөн мамыс кодьөн мөдіс лоны. Сэтшөм жө чужөма-мыгөра, сэтшөм жө шогмытөм вытя. Жикинсянь нинөм абу. Вылын юра катша. Мам ылас видзөдөмөн и батьсө морт туйө жө эз пукты. Төдтөм морт быттьө... Абу ас... Ставыс төдтөм. Төдтөм муын...

Эз кыскы Павелөс ыль гортас. Сэн — көдзыд... «Лыйсыны али мый?» — корсюрө веськодя думайтліс Жикин. Асьсө сійө пыр на лыддис «бөечөн», да мөдарьюгыдас сөмын пуля помысь и көсйис мунны. Джагөдчөмыд либө сөн вундөмыд бөечлы — бөръя делө. Мед слаб тадз вөчө. Слабыс...

Катя йылысь Жуковкаын Павел ньоти эз думайт. Веськодь. Көнкө ылын, важ олөмын вөвлөмтор. Вөлі и — вөлі. Быдөнлөн аслас туй. Некодлы абу кокни. Со тай, Жикин ачыс ад гуранын

быттьö, кöдзыд гöтыркöд да сэтшöм жö нывкöд. Некодлы оз ков. Миш ёртысь кындзи. Эх, Галя, Галя... Надейтчыліс на коръяскö Павел, мый на костын олöмыс артмас. Анжелалөн чужöм бöрас радысла челядь моз чеччаліс. Мед кö абу пи, но — менам, менам вир чут! Эг лыбöй нель борд вылö, Галя, эг лыбöй...

*Тэнад бордъяс вылö кыкөн ми эг лыбöй...
Нинöм пудъясьны: тэд — райыс, а мем — адыс.
Жаль, мый выліас ми шудлунсö эг кыбöй.
Прöстö жаль, мый этша вöлі кадыс.
Прöстö жаль, мый бöжнас вачкис Зарни чери,
Выйöг пуртөн муніс менам азылас костті.
Бöжнас öвтыштіс... Эз тэнö,— менö нерис.
Со тай вöчис... Со тай кужис... Олігкості.
Прöстö жаль, мый ачым бордъясьны эг вермы...
Эськö лэбалім ми тэкöд сынисадыөн!
Öні кевмыся ме кымөрлы: эн зэрмы!
Да эн тупкы меным енэж, кристаради...
Прöстö жаль, мый бордъя идögөн тэ качин,
А ме му вылас тай куйла, эбös-ловтöм...
Лежнög пытшкын куйла. Чечча коркö ачым...
Сöмын — öтнам. Сöмын аски. Ставлы ковтöм...*

Пыр унджыкысь Павеллөн синваыс доршасьліс. Жаль лоліс... Кутшöм грекысь ставыс? Кор тунасис-тасасис ордымыс? Мый эськö позис вежны? И мыйла ставыс сёр нин?

Судьбасьыд он пышйы. Тэнсьыд сійö оз юась. Вöчас сідз, кызд думыштас.

...Некод эз тöд, мый Смуров сумкаын куйлö уна сюрс шайт. Эз вермы тöдны. Сöмын Жикин тöдіс. Та вöсна и орччөн мунö, видзöм ради. Кыйкъялö öтарö-мöдарö, медым кутш моз ырыштчыны, ковмас кö. Мед неминуचाысь дорйыны, лоас кö...

Лоис. Банкысь петöм бöрын тöv нырөн уськöдчисны куимөн. Вуджөрөн... Кырнышгъяс моз. Кианыс — обрезьяс. Съод маскаяс. Ырыштчис, выныштчис Павел... Дорйыны, дорйыны Мишös! Чöрту дай деньганас! Кынöмас быттьö взорвитчис... Резьöдысь дой... «Кокнас... Каратист...». Синмас пемдіс, но вежöрыс пыр на уджалö. Сувтны... Кöть пидзös вылö... Дорйысьны... Кыдз киноын... Но тайö киноыс — ачыс олöмыс. И сэн кадрьяс: кыкөн нетшкöны Миш кыысь сумкасö, а сійö зэвтчöма, водзсасьö... Син бöжнас Паш вылö видзöдö. «Шыбит сумкатö, шыбит!» — горзö Павел. Али шöпкöдö? Дорйыны, дорйыны Мишös! Миша! Сму-ров! Но Павеллы паныд — обрез ствол. Повзис. Страк. Лыйöм шы. Öтчыд, мöдысь дай коймöдысь. Босьтісны Миш кыысь сумкасö. Пышйисны. Лёкыс вермис бурсö. Тадз овлö. Мути-лөн закон. И сы серти ми олам... Кыссис Павел Миш дорö. Пеляс чуналіс ёртыслөн шöпкöмыс: «Галя, Галя... тöдіс, тöдіс...» Олöмыс сувтіс...

*Бара пурис, пурис
Лёкыс бурös...*

Чужѣмбанас вурис
 Коли урѣс...
 «Ѳткодьѣсь ми лоим»,—
 Лѣкыг шуѣ.
 Кыскѣ сійѣ бурѣс,
 Аскѣг нуѣ.
 Бурѣй, эн вай ылав!—
 Кевма ѣна.
 Ѳтиыс мем ковтѣм,—
 Мѣдыс дона.

Гуалісны Мишѣс лѣня, этшаник йѣзѣн. Гусьѣнкодъ ставсѣ лои вѣчѣма. Гѣтыр ни кага-баля Смуровлѣн (ѣз и гѣтрась, мыйта кѣтъ ѣз тойлавны). Этшаник рѣдвуж и воліс... Ымзѣмѣн бѣрдіс ѣтнас мамыс. Кын столбѣн сулаліс Павел. Бара быттѣ бокисянѣ видзѣдіс асьсѣ. Пытшкѣсас пезьдіс. Бѣрѣя морт, код вылѣ позис мыджтысьны — быри. А Галя... Жикин скѣр синмѣн кыйкнитліс гѣтыр вылас. Со кодлѣн кос синмыс... Измѣм чужѣм. Весиг бѣрднысѣ оз куж. Да оз и кѣсйы. Оз вермы. Мыйла лицемеритчыны? А юрас Павеллѣн чуналѣ: «Мый кулѣм водзас шѣпкѣдіс Миш? «Галя тѣдіс...» Мый тѣдіс?»

Гѣгѣрвоис. Пѣсьѣ уськѣдіс. И окота лои Миш дорѣ гуас шыбитчыны, гортѣяс орчѣн водны, сывйыштны. Нѣшта окота гѣгѣр чирсны, косявлыны, вины... Некодлы, некодлы веритны оз позь!

Мыйся олѣм?! Подлѣй! Гырѣ синмѣн видзѣдіс гѣтыр вылас. Сѣсся руаліс, руаліс... Бѣрдышт, бѣрдышт, Жикин, кокниджык лоас. Эн яндысь, эн пов. Бѣрдышт... аснад ло. И вочасѣн бѣр мортѣ пѣран. Лоан? Лоан...

Мѣд луннас, пажун дырйи, и крапкис Галялы, мый думайтис. Мѣдыс векрыштѣм чужѣмѣн — паныд. Ярмѣм кынь... Али санка...

— Ветьѣк! Йѣй нисѣ прѣсуж! Докажит, мый вокѣс виѣ!— горзис Галя.— Усьысь, кысь локтін, тѣныд местаыс тан абу! И ѣз вѣвлы! Вош сѣд вѣрад! Он ков меным! Эн и ковлы! И Анжелаыд абу тѣсянѣ! Миш понда тѣнѣ терпиті. Некодлы татшѣм муошкыд оз ков. Анжела пыр яндысис тѣ вѣсна, кылан? Прамѣй бать сылы колѣ! И аддзам! Аддзам! Эм! Весась, мед дукуд ѣз вѣв!

Тешкодъ... Вѣськодѣ да лѣня примитис Павел гѣтырыслысь дуль резѣмсѣ. Сѣмын курыда нюмѣяліс. Да, судьба... И бара мѣвпѣяс: кор да мыйысь сійѣ Ен водзас мыжмис, кор вежынтчис-пѣлѣстчис ордымыс? Дерт, морт виыськѣд Жикин овны оз мѣд... Павел ѣні стѣча тѣдіс, мый буретш Галяыс и ышѣдіс кодѣскѣ вокыслысь сѣмсѣ мырддѣыны. «Галя тѣдіс...» Тайѣс и кѣсйис Миш висѣтавны. Галя тѣдіс, кор вокыс банкысь кредит босѣтас. Тѣдіс... Господѣй-Енмѣй! Галя тѣдіс. Галя дасѣтысис... Ох, Галя, Галя! Олѣмыс помасѣма, немтор оз кут... Йѣи вылын... Ѳтнас. Тѣдтѣм му вылын. Кѣдзыд...

*Саригдзайса тѣдтѣм кѣдзыг муѣ,
 Кытчѣ шонгі дзиргѣяссѣ оз кой,
 Бызьѣм вѣлѣй скачѣн менѣ нуѣ
 Сѣтчѣ, кѣні ыджыдалѣ вой.*

А ме сыла: «Эзысь лымйой, чолөм!»
А ме бөрҗа: «Чужан муын — төв...»
Енмөй, висьтав, узя али ола:
Рөзваль догдьос кыскө... бөжтөм вөв.

Пышйис гортсыс Жикин (позьö кө гортнас шуны Жуковкаса көдзыд олан жырсө). Сьöрсьыс сөмын паспорт да неуна сьöмтор и босьтис. Воськөдчис Москваö. Ылөсас. Первойя луннас и грабитисны, паспортсö да сьöмсö гусялисны. Тадз Павел лоис «бичөн». Здукөн и бомжөдз воис. Усьöм мортөн. Во джын койпалис юркарын. «Му увса» олөмлысь быд пельöс төдмалис.

Павеллөн кадыс — юр выв тыр. Позьö, майбыр, мөвпыштны олөм-вылөм йывсьыд. Жикин дутдывтөг корсис вочакыв: мыйла олөмыс пегыртчис да чегис? Онөдз эз гөгөрво: кызди ловйөн колис, кыз эз вины, кыз эз сотчы быд пежсö юөмысь? Кутшөмкө вын быттё пыр на видзис сийөс. И отарө гудыр сора вөтъясын мөдисны уськөдчыны батыс, мамыс да Катя. Первойя кыкыс кө недыр мысти сывлісны-вошлісны руа вежөрсьыс (прөститисны?), то Катя... «Со, со көн помкаыс,— дөжнасис Павел.— Со мыйын делөыс. Гортлань колө, Катялань... Öдйөджык... Удитны. Гу вылас ветлыны. Колөкө, и прөститас на... Колөкө, и артмам на...» Гудыр вежөрөй, гудыр... Мый и «артмынысö» эськө?

Павеллы өтиторйын, позьö кө тадз шуны, везитис. Öти уль руа асылө Ярославскöй вокзаллөн перрон вылын сийө төдмасис Сыктывкарө мунысь поездса проводниккөд. Коми морт вылө слөймис! Кыліс, кыз лөз формаа мужичөй да нывбаба öта-мөд костас сэтшөм төдса кывйөн сёрнитөны!.. Матыстчис... Думтөг ни вератөг... Сьöлөмыс нюкыртчис чужан кывйысь, кыскис тай... Мыйкө нора висьталис Павел проводникъясыдлы комиөн, мыйкө корис... Кевмысис. Нуөй, кристаради, Сыктывкарөдз!.. Көть вагон улө суйөй, а нуөй!.. Эскис Павеллы коми мужичөйыд. Жалитыштис. Гөгөрвоис. Отсалис. Гусьөн и нуис...

Тадзи Павел Жикин, Бужөд грездын чужлөм морт, бөр веськаліс чужан муас. Уна во мысти. Вошөм пиөн. Некодлы ковтөм мортөн. Но Бужөдөдзис век жө эз на во. Поліс, яндысис... «Мөдысьджык, бөрынджык» — пыр кутшөмкө помка корсис. Татчөс бомжъяскөд өтутчис, Төмакөд өртасис. Позьö овны... Но кыскө, кыскө Катяыс! Мыйкө висьтавны көсийө! Быд вой шобрөдлө Павелөс, быд вой — көдзыд ньылөм. Локтас, локтас Павел. Тэ виччысьыштлы неуна, Катя! Абу на дась. Аски казынит...

...Диван вылын Павел öні виччысис... асьсö. Öніясö. Бичсö. Локтас, некытчö оз воштысь. И Павел сылысь мыйкө юалас: а водзөсö мый? Мый водзөсö лоө? Кор да көні тырас Павеллөн олан дозйыс? Кор паныдасяс Катякөд? Зэвтөм синмөн видзөдө рөмпөштанө. Öні, öні... Пет!

Весьшөрө. Некод эз пет. И гөгөрвоис Павел — помыс воис... Тайö здукыс и эм бөръяыс. Тыри, тыри, буракө, олан дозйыс шөйтысь пилөн. Слабог. Вот тайö бур... Вот тайö колө... Вот и ладнө... Жаль сөмын, Бужөдөдз эз во...

Торпыригъяс вылө пазмуніс рөмпөштан... Торпыригъяс вылө

пазмуніс оломыс. Чолөм, югыдін ли, пемыдін ли! Чолөм, да примит, верман кө...

*Рөмпөштан...
Тэ менө ылөдан...*

Кор Тёма аддзис джоджын куйлысь Жикинөс, вомтырнас бөрддзис.

— Ок-ок-ок,— ливкйөдліс рам мортыд.— Со өд кызз... Пөкмелляысь куліс. Эг удит вайны... Прөстит, ёртанёй, прөстит... Ме тэнö вии... Эг удит вайны пөкмелитчантө... Эг удит... Прөстит. Со өд кызз... Колө жө... Колө жө... Ме вөсна бур мортыс кувсис. Кызз мем водзö овны? Та ыджда грекөн? Пөкмелляысь өд куліс... Эг удит... Эг... Эк, олом! Мыйся олом!? Эг удит... Прөстит...

Кыз синваён бөрдіс Тёма.

А Павеллөн лолыс кыліс, сөмын висьтавынысö нинөм нин эз вермы. Вермис кө, шуис эськө: эн шогсы, Тёма, эн тэ менө ви, Павел Жикинөс... Аттьө тэд, бур морт! Ставысь аттьө тэд, шань ёрт... Ов на, кытчөдз верман, тэ лёксö некодды эн вөч. Тэ — абу ме... Тэ — ов...

Павелөс орөдіс... Катя. Мөд ног — некыдзи. Ставысь оломад колө вештысьны. Кор Жикин виччысис рөмпөштанысь асьсө, рөдимөйсө, бөръясө, сэсь полөмпырысь, кыззкө чуймалігмоз, петіс... Катерина. Гожся дзоридзьяс рёма мича платтьөа. Важкоддыс на том... Абу и вежсьылөма. Кор аддзис Павелөс, нөшта на повзис, весиг ойкнитіс.

— Эн пов, Катерина,— кияссö морөс дорас жмитөмөн, лөника шуис Жикин.— Тайө ме, Павел. Дерт, урөсми да, он нин и төдмав, гашкө...

— Павел?— чужөмыс сермуніс Катялөн.— Кутшөм Павел?

— Жикин! Жикин ме!— быттө юрбитіс, кыпөдіс кисө Павел.— Прөстит, прөстит, Катерина...

Бөрддзис.

Катя жальпырысь видзөдіс тошсялөм дядьö вылө. Ньюмуніс. Шуис:

— Павел... Ми Павелкөд важөн нин өтлаын, мөдарьюгыдас. Шудаөсь ми. Пыр тай ме бөрся и локтіс. Кор тюрмаө пуксис, пөжар дырйи сизим мортөс спаситіс да ачыс сотчис. Төдөмөн вөчис. Ме дінө матыстчис, өдйө и корсис. Аддзис. Сійөс выліас прөститісны. И тэнö прөститасны, эн шогав. Выліас ставсö аддзöны, ставсö төдöны, гөгөрвоёны... Нем абусысь оз лөгавны... Оз позь... Прөщайт... Пете...

— А ме? Коді ме?— шөпкөдіс Павел.— Ме, сідзкө, коді? Менө выліас примитасны оз?

Тірзис став тушанас. Сыркмуніс вир-яйыс.

— А тэ — Рыжөй Пете,— рөмпөштанө бөр воськовтігмоз меліа шуис Катя.— Вежисны выліас тіянлысь ловъяснытө. Тадз шуисны, тайө кывйө воисны. Оломтө, шудтө, судьбатө... Ставсö вежисны. Прөщайт, сэсся ог нин аддзысьлөй. Разнөйлаын кутам лэбавны, Пете...

«Рыжөй Пете...»— ичөтик чутөн Павел вежөрын гартыштчис-

чужис кутшөмкө мөвп. Той ыджда. Сэсся ыдждіс, ыдждіс...
Нюжаліс, паськаліс... Чардыштис, гымыштіс. И ставыс разаліс...
Пемыдөн, ёсь дойөн...

И вөлисти ем йыв кодь торпыригъяс вылө пасьмуніс рөмпөш-
тан.

И нэриник, полысь пыстаён жбыркмуніс инасьтөм лов, и
пыр жө сійөс тупкис, вевттис кань варышлөн вуджөрыс. Став-
сьыс колө вештысьны... Ставсьыс колө...

*Менө воштісны тәдгөмөн выліас,
Сизим бөргөм шы сөмын тай кылі-а...
Сизим тысяча сьөкыда лолыштіс
Вы-лі-ас...
Да эз примитны, чөртыг тай, уліас...
Му Сар йөткыштіс вывланьө кулігөн.
Му пытш олөмсьыг колө пө вештысьны!
У-лі-ас...
Вылас петі и — енэжыс зырөдіс.
Югыг шондіыс синъясөс бырөдіс.
Тэныг местаыс абу пө выліас.
Вы-лі-ас...*

Сьөкыда, ой сьөкыда, дырөн дойдаліг, ем пыс пыр быттё
кыскисны выліас Рыжөй Петелысь ловсө. Но кыскисны... При-
митісны. Прөститісны. Эскисны. Лэбав вильыш бабичаён*, лэбав!
Шойччы... Личөдчы...



* Ба б и ч а (диал.) — бобув.

Авторсянь: Республика школая-
ын ёнджыка босътчисны велөдны коми
кыв. Чайтам, мый ворсігмозыд кывтö
велөдны лоас кокныдджык. Öдйöджык
да бурджыка челядь вежөрö сатшас.
Та вöсна и вöзгя ворсöмсö. Гашкö, ась-
ныс челядь кутчысясны, колöкö, гы-
рысяс босътчасны. Оз кö чукöрмы ин-
дöм мында ворсысьыс, позяс öти мор-
тыслы ворсны йöзöс да кутшöмкö шы-
пас. Тайö ворсöмсö вöзгям урок нуöдан
отсöг могысь. Позяс öти урок вылын
ворсны ставнас, верманныд и юклыны
некымын урок вылö. Мыйкö содтышт-
ны, челядькöд öтлаын суетлыштöмөн
вильтор тöдмавны.



Алексей ПОПОВ

Вильыш шыпас

ÖТИ ЮКÖНА ПЬЕСА

ВОРСЫСЬЯС:

ДИМА
БАТЬ
МАМ
ПÖЧ
ВОК
ЧОЙ
КÖЧ
КÖК
«К» ШЫПАС
«А» ШЫПАС
«Ч» ШЫПАС
«Ш» ШЫПАС
«П» ШЫПАС
«Г» ШЫПАС
«Й» ШЫПАС
ГÖЛÖСЬЯС

Сцена вылын ыджыд картон лист, кытчö гижöма «Анбур». Сэні жö кабалаысь вöчöм ыджыд кöструля. Сцена пельöсьясö саймовтöма пу-
ысь либö мыйыськö мöдторйысь вöчöм чер, кокан, бидон да гöгыль.
Медым саймовтны найöс, сцена вылö позьö петкöдны унджык кöлуй.
Сцена вылын öшалö занавес, меd ворсысьяс бöрыннас вермасны сай-
мовтчывны сы сайö. Мыччысьö Дима. Зэв жугыль. Киас кутö дневник.
Мыччысьöны чой да вок.

ВОК. Мый нö Димаыс талун сэтшöм жугыль?
ДИМА (ышловзьö). Да нинöм.

ЧОЙ. Коді нө тэнö дзерöдіс?

ДИМА. Некод эз.

ВОК. Эз кө öд дзерöдны, чушыд татшöма эз нюжав.

ДИМА. Некод, мися, эз дзерöд.

ЧОЙ. Колöкө, Воваыдкөд лөгасинныд?

ДИМА. Эгö. Сійö ворсны со корö вöлі, а меным абу окота.

ВОК. Гашкө, Толякөд?

ДИМА. Эг жö. *(Восьтö дневниксö.)* Со меным велöдысьным «три» пуктіс. Видзöдлöй, кутшöм мисьтöмöс.

ЧОЙ. «Куим»? «Витъяс» бöрын «три» кутін чукöртны.

ВОК. «Куимыс» öд öтметка жö. Менам тай нө сійö зэв уна, да ог Дима моз шогсы.

ЧОЙ. Тэтö он, Дима öд медводдза во на ветлö. Да и пыр на «вит» öтметкаяс ваяліс.

ДИМА. Эсійö мисьтöм шыпас вöснаыс öд.

ВОК. Кутшöм шыпас?

ДИМА. К-өн нимтöны. Тшöктісны талун сійöс гижны. Ме пöсвятöдз зіли, а абу артмöма. Да и кызди сійö артмас, зэв чукыля-мукуля да?

ВОК. Эн шогсы, Димук, аски мöд шыпас кутасны гижöдны да бара на «пяттö» ваян. Вай бурджык ворсны мунам. *(Мунö.)*

ДИМА. Абу окота.

ЧОЙ *(малыштö Димаöс юрсиöдыс)*. А тэ велöдчы сійöс гижны. Лок ме тэныд отсала.

ДИМА *(скöрмö)*. Тайö мисьтöм шыпассö öд ог жö кут гижны. Сытöг ола.

ЧОЙ. Сытöг эськө овны он вермы да. Ковмылас на. *(Мунö.)*

ДИМА *(видзöдысьяслы)*. Збыльысь öд мисьтöм «К» шыпасыс. Со тайö анбурас *(петкöдлö)* уна буква, комион кө, шыпас. Ті-янлы ставныс найö кажитчöны? *(Видзöдысьяс вочавидзöны.)* Дивö тай. Меным эськө мукöдыс кажитчöны жö да. Сöмын öти оз во сьölöм вылö. Час, корсьла. *(Кисö сюйö «Анбур» гижöда лист сайö, кыскö «А» шыпаса чорыд бумага.)* Кутшöм шыпас тайö? *(Видзöдысьяс вочавидзöны.)* Тöдінныд. Меным сійö кажитчö жö. Первой «пять» öтметкасö сыысь и пуктісны. Вай öтвылысь мöв-пыштлам, кутшöм сёян заводитчö «А» шыпассянь. *(Челядь лыгдöдлöны.)* Ті тай зэв сюсьöсь. Со мыйта чöскыдторйыс. Час, нöшта öтиöс перйыла. *(Сюйлö кисö да перйö «Ч» шыпас.)* И тайö шыпасыс меным кажитчö. Сысянь заводитчö чай, чöд, чöдлач. Нöшта мый? *(Видзöдысьяс лыгдöдлöны.)* Збыльысь öд, шыпасыс быттö ачыс ч-ч-чöскыд. Вай корсьла мустöм шыпассö. *(Лукйысьö, сэсся весиг саймовтчылö анбур сайö. Мыччысьö «К» шыпасöн.)* Со сійö. Сэтшöм крукуля. И сысянь заводитчö сöмын ко-колюка, чöскыдтöм кöнтусь вый. Ог радейт ме сійöс. Мыйла бара анбурас сюйöмаöсь? *(Босьтö да шыбитö «К» шыпаса бумагасö. Чышкыштö кисö.)* Ме кызкө сытöг эськө олi. *(Кылö кодлөн-кө чуксасьöм: «Дима, Димук, воли татчö».)* Со, чуксалöны менö. Час, ветла.

Мунö. Недыр мысти öдзöс моз воссьö алфавит гижöда бумагаыс, и петöны «А», «Ч», «Ш», «П», «Й» шыпасъяс. Тайö шыпасъяссö ыджыда гижöма ворсысьяслы водзас и мышкас. Позьö бумагаысь вундыны да вурыштны дөрöмö либö платтöö. Найö тойлалöны «К» шыпасöс.

«П» ШЫПАС. Мун, мун миян дорысь.

«Й» ШЫПАС. Сöмын янöдан миянöс.

«Ш» ШЫПАС. Со кыдзи Димаыс тэнö оз радейт.

«А» ШЫПАС. А менö ошкис.

«Ч» ШЫПАС. И менö тшöтш. Чöскыдөн шуис. (*Асьсö петкөд-
лö.*) Збыльысь öд ме мича да авъя. (*Йöткыштö «К» шыпассö.*)
Абу тэ кодъ. Коколюка, көнтусъ вый. (*Нерö.*)

**Шыпасъяс йöткыштöны «К» шыпасöс да бөр пырöны, пöдлалöны ан-
бурсö. «К» шыпас кольö öтнас, весиг син дорсö чышкалö. Сэсся усь-
кöдчö анбурлань, кöсйö восьтыны, но оз воссьы. Кылöны шыпасъяслөн
гöлöсьяс: «Мун миян дорысь. Эн пыр. Ог лэдзй. Весась ылöджык!»**

«К» ШЫПАС. Со öд кутшöмöсь. Вöтлисны весигтö. Кыдз ме
натöг öтнам овны кута? Сэтшöм лöсьыд вöли öтувийөн. Кымын
ссыланкыв киён кутчысьмөн сывлiм. Ставсьыс Дима мыжа.
(*Видзöдысьяслы.*) Сэтшöм мöй ме мисьтöм? Тадзи кедзöвтöны.
(*Пуксьö да думыштчö. Сэсся збогера чеччö.*) Мöвпыштi. Думыштi,
кыдзи водзöс мынтыны, ачымöс петкöдлыны. Абу на ме сэтшöм
ковтöм. Петкöдла пуж. Босьтча кывъясысь кутшöмкö шыпас
вöтлыны да ачым сы местаö суйся. Видзöдлам, мый таысь арт-
мас.

Сцена вылö петö Дима. Аддзö «К» шыпасöс.

ДИМА (*шензö*). Код нö татшöм мисьтöмыс? Крукыля-мукуля-
ыс? «К» шыпас али мый?

«К» ШЫПАС. Нöшта öд эльтчан. Тэ вöсна анбурсьыс вöтлис-
ны весигтö.

ДИМА (*шланнитö кинас бокъясас*). Дивö тай. (*Синъяссö тi-
лыыштö.*) Збыльысь тай «К» шыпас. Мисьтöм жö и вöлöма. Ме
жö шуи, мый тэ кодбыслы абу места анбурас. Мун татысь.
(*Повзьöдö.*)

«К» шыпас котöртö.

«К» ШЫПАС. Олöм эз кут лоны. Быдлаысь вöтлöны. (*Бергöд-
чылö да петкöдлö кабырсö.*) Тэ каитчыны на кутан таысь. Вот
видзöдлан!

ДИМА (*уськöдчö сылань*). Нöшта öд повзьöдлö.

**«К» шыпас дзикöдз саймовтчö занавес сайö. Мöдарсяныс петö Дима-
лөн батыс. Киас кутö чер.**

БАТЬ. Пиук чом тшöктiс вöчны. Ворсны пö ёртъяскöд кута.
Лоö вöчыштны.

Петö Дима.

ДИМА. Пап, чомтö нö он на вöч?

БАТЬ. Вöчны со, пиук, лöсьöдча. Пöвъяс корся.

Дима мунö сцена вывтi, мыйкö корсигмоз. Бара саялö. Занавес сайсянь мыччысьö «К» шыпас. Аддзö Дималысь батысьö.

«К» ШЫПАС (*видзöдысьяслы*). Ме петкöдла Димаыслы пуж. Мед оз эльтчы. Ковтöм шыпасон шуö. (*Збоя.*)

Эг кут öшйыны ме инö,
Первой уськöдча бать дiнас.

Котöрөн кутчысьö батыслы киас. Бать шензьö, кöсйö мездысьны. Та дырйи колö сутш кежлö пемдöдлыны либö дзикöдз кусöдлыны бисö. Медым батысьö ворсысьыс чер пыдди удитiс босътны киас бумагаысь клеитöм кер кодьöс. Кор биыс öйö, «К» шыпас абу нин. Бать сулалö керъя. Öдвa кутö киас.

БАТЬ (*шензьö*). Сутш-мöд сайын кутi чер,
Öнi, видзöд, лои кер.

Бать сьöкыда лэптыштö керсö. Мöдарсянь бара петö Дима.

ДИМА. Пап, чомтö эн на вöч?

БАТЬ (*лэптышtlö керсö*). Мыйöн нö ме вöча? Чер пыдди мыйлакö лои кер. Кодкö киö шашаритчылис да. Весиг эг гөгöрво-лы, кодi.

ДИМА. Эн ылöдды. Чертö дзебин, кöнкö. (*Корсьö, оз аддзы.*)

БАТЬ. Ог, пиук, ог ылöдды. Ачым шензя. (*Мунö черсö корсиг-тыр занавес сайö.*)

ДИМА (*водзö корсьö*). Абу и эм.

Тайö каднас занавес сайсянь нюмъялигтыр мыччысьлö «К» шыпас, дэ-льöдö Димаöс. Детинка гыжйыштö юрсö.

ДИМА. Чер. Кер. (*Сюся видзöдлö «К» шыпас ылö.*) Чер. Кер. «Ч» шыпасыс вежсьöма «К»-өн. (*Бара видзöдлö «К» шыпас ылö.*) Да тайö жö эсйö чукыль-мукылыс пакöститчöма. Тэ öд?

«К» ШЫПАС. Ме, дерт. Нöшта на мыйкö вöча. Мед он эльтчы дай. (*Саймовтчö. Дима сы бöрся.*)

Сцена ылö петö вокыс. Водзас тюрöдö гöгыль.

ВОК. Со кутшöм гöгыль менам эм. (*Петö Дима.*) Видзöд, кыдзи сйö тюрö. (*Петкöдлö.*)

ДИМА (*вокыслы*). Тэ некодöс эн аддзыв?

ВОК. Некодöс. (*Шензьö Дималөн корсьысьöм ылö. Дима вет-лöдлыштö да бара саймовтчö занавес сайö.*)

Вокыс водзö гöгыльөн котралö. Мöдарсянь мыччысьö «К» шыпас. Сйö котöртö вок дiнö. Кутчысьö гöгылас. Мöдыс оз сет. Бара пемдышtlö либö кусö би. Югдöм бöрас «К» шыпас абу нин. Гöгылыс тшöтш. Во-кыс усьöма джоджö. Орччөн сьд ёкмыль куйлö. Занавес сайысь петö Дима.

ДИМА. Ёна тэрыб сылөн кокыс.
Öдйö сүдöма вокöс.

ВОК (*пуксьö, видзöдö сьöд ёкмыль выlö*).

Менам водзын вöлі гöгыль.

Другöн артмöма сёй кöкыль.

ДИМА (*матыстчö, видлалö ёкмыльсö*). Со öд мый кутіс вöчны мустöмторйыд.

ВОК (*чеччö*). Кöні менам гöгыльöй?

ДИМА. Ме нö мöй тöдä?!

ВОК (*зырö сылань*). Тайö тэ уськöдчин бöрсянь. Мырдин завидьыдла.

ДИМА. Эг ме.

ВОК (*водзö зырö*). Вай бөр. Эн йöзлысь босьт.

ДИМА (*бöрынтьчö*). Эг, мися, ме вöрзöдды.

ВОК (*зырö сійöс занавеслань*). Коді нö? Тэ уськöдчин да. (*Вочасöн саяlö*.)

Сцена былö петö пöч. Киас сылөн кокан.

ПÖЧ (*тэрмасьтöг вöсьлалö*). Лöсьыд жö нин гожöмнад. Кар-
тупель мудьян кад со воис. Ог нин эськö вермы да. Коканöн
видла картупельсö мудйыны.

Уджалігкості мыччысьö «К» шыпас, кылö пöчлысь бөрья кывъяссö.

«К» ШЫПАС (*залань*). Картупель. (*Нимкодя*). Нöшта öд Дима-
ыс шуö, мый месянь некутшöм прамöй кыв оз заводитчы. А
картупельсö пуöмөн и жаритöмөн радейтö. Нöкйөн и выйөн
киськалöмаöс. (*Пöч заводитö кокасьны*.) Вирыд пузьö татшöма
увтыртöмсьыд. Таысь ме со мый вöча.

Котöртö пöчлань. Бара мыйкöдыра венласьöны. Куслö би. Та дырйи
пöчсö ворсысьлы колö öдйö пасьтавны кöчлысь маскасö. Öзйö би.
«К» шыпас вошöма нин. Сцена вылын коканасьö кöч. Мыччысьö Дима.

ДИМА. К-ыд пышйис карта сайö.

Сё дивöыд! Мый нö тайö?

Сэні мудйысис öд пöч.

Öні коканасьö кöч.

**Кöч аддзö сійöс, повзё да чилзигтырйи пышйö. Мыччысьö «К» шыпас
да йöктö Дима водзын.**

«К» ШЫПАС. Но мый? Ковтöм шыпас ме? Абу тай на ковтöм.
Быдтор сямма вöчны. Мед эн дöзмöд дай.

ДИМА (*уськöдчö сылань. «К» шыпас котöртыштö. Сувтöны*).
Ок тэ, мустöм чукыль-мукуль. Кöні менам пöчöй?

«К» ШЫПАС. Эн пов. Гортад пукалö. Кор, колöкö, менсьым
прöштша. А то нöшта уна дивö вöча.

ДИМА (*ырыштчö*). Тэнсьыд! Чукыль-мукульысь? Некор ог!

«К» ШЫПАС (*бара йöктыштö*). Кор, колöкö. Верма öд и
водзö дурны.

ДИМА (*уськöдчö сы выlö, мöдыс пышйö*). Он пышйы. Час,
суöда, крукыльта дзикöдз. (*Котöртö «К» шыпас бöрсяыс да
саймовтчöны кыкнанныс*.)

Сцена выlö петö мам, киас шöрт тупыль. Пуксьö улöс выlö.

МАМ. Öнi кыа Димуклы шоныд да небыд носки. Мед төвнас школаö котравнысö шоныд лоас, ичöт кокыс оз кынмы.

Занавес сайсянь юрсö мыччö «К» шыпас. Сийö сюся кывзö мамсö.

«К» ШЫПАС (*замань*). Кок кывйыс бара жö месянь заводитчö. Мамыс төждысьö, мед Дималөн кокыс оз кынмы. Жаль эськö да, но велöда ме сийöс пыдди пуктыны быд шыпас. Менö тшöтш и.

Котöртö мам дорас. Бара венласьöны. Кусö би. Та кості мамсö ворсысь-лы колö саймовтны шöрт тупыльсö да киö босьтны чорыд сутуга тор. Öйö би. «К» шыпас абу нин. Мамыс кутö киас сутуга.

МАМ (*шензигтыр*). Печки небыд вурун шöрт,
Оз и куснясь — лои көрт.

Петö Дима.

ДИМА (*матыстчö мам дорас*). Мый нö сутуганас вöчан?
МАМ (*жугыля*). Со тай тэныд небыд вурун шöрт печки.
Друг кодкö уськöдчис, да шöртсьыс көрт артмис.

ДИМА (*скöрпырысь*). Ок и шыпас, эм тай сямыс. Дзерöдöма весиг мамöс.

МАМ (*сы выlö видзöгö*). Кутшöм шыпас?

ДИМА (*оз көсьы висьтавын*). Сидз шуа. Бротка вомгорулын.

МАМ (*сутугасö видлалігмоз мунö*). Дивö тай и сöмын. (*Саймовтчö.*)

ДИМА. Дзикöдз тай дурмис шыпасыс.

Мыччысьö «К» шыпас.

«К» ШЫПАС. Он на прöштшатö кор?

ДИМА (*котöртö сылань*). Тэнсьыд? Кыдз суöда да ньöръяла татшöм дурöмсьыд! Дугды шыпасъяссö аснад вежлавны.

«К» ШЫПАС. Кытчöдз прöштша он кор. (*Саймовтчö.*)

ДИМА. Суöда öд. Ме öдйö котрала. (*Тшöтш вошö.*)

Сцена выlö петö чойыс. Киас бидон. Бидонсö позьö вöчны картонысь, а бокас гижны «йöв».

ЧОЙ (*мунігмоз*). Менö чöскыд йöвла мөдöдісны. Воа гортö да пöжа сийöс. Сэсся Димукöс юктöда. Зэв радейтö сийö пöжöм йöвсö.

Мыччысьö «К» шыпас.

«К» ШЫПАС (*лыгдьö*). Й-ö-в. Кутшöм шыпас нö татысь вежны? (*Думыштчö.*) Гөгöрвои. (*Котöртö чойлань. Кутчысьö бидон вугъяс. Венласьöны. Күслö би. «К» шыпас вошöма. Чойыс йöв бидон пыдди кутö көв.*)

ЧОЙ (шензьö). Вая вöлі чöскыд йöв.
Öнi кута бонзьöм көв.

Петö Дима.

ДИМА (матыстчö чойланьыс). Тэнö öд йöвла ыстылісны.
Кöнi сійö?

ЧОЙ (сы выlö вигзöгö). Ачым шензя.
Вая вöлі чöскыд йöв.
Öнi кута бонзьöм көв.

ДИМА (гöгөрвоомөн). Йöв. Көв. Бара сійö дурö.

ЧОЙ (шензьö). Коді дурö?

ДИМА (восьлалö). Ачым тöда. Öнi суöда нин.
Со нин дзерöдöма чойöс,
Кутчысльöма сылы сояс.

ЧОЙ. Коді дзерöдіс? Збыльысь öд кодкö уськөдчыліс. Коді
нö эськö? Тэ он тöд?

ДИМА. Ог. (Саймовтчö.)

ЧОЙ. Вая вöлі чöскыд йöв.
Öнi кута бонзьöм көв.

Саймовтчö көвсö видлалігмоз. Мөдарсянь мыччысьö «К» шыпас. Киöдыс
вайöдö көк маскаа нывкаöс, либö детинкаöс, да тшöктö сылы пырны
чорыд бумагаысь клеитöм көструляö, кодлөн бокас гижöма «нөк».
Сэтчö нывкалөн либö детинкалөн пырöм бöрын «К» шыпас мунö за-
навес сайö да сэсянь кыйöдчö. Мыччысьö Дима.

ДИМА (пуксьылö). Ок и мудзи. Ме öдйö котрала, а сійö ме-
ысь на тэрыб кока. Дзикöдз эбöс бырис. (Чеччö.) Суöда на öд.
Час, нөксö паньышта да. (Кыскö зепсьыс пань. Матыстчö көс-
труля горö. Көсийö сюйны сэтчö паньсö. А сэсянь мыччысьö во-
гзынгжык гзебсьылöм гетинкаыс либö нывкаыс.)

КÖК (гораа). Ку-ку! Ку-ку! Ку-ку! (Бөр гзебсьö.)

ДИМА (паньыс весиг кисьыс усьö).

Көсий панялыштны нөк,
Сы местаын вöлөм көк.

Нөк, Көк. Со öд и «Н» шыпассö нин вежöма аснас.

Челядь, эскö көть ті энöй,
Дзик шемöс босьтіс менö,
Анбур кудйысь вöтлöм шыпас
Вöчö дивöсö сё сикас.

Гашкö, мыйтаöс на вöчас. Да и суödнысö ог вермы. Дзикöдз
мудзи.

«К» ШЫПАС (нетö). Он кө мекöд кут лöсявны, мыйсö на
ог вöч. Пöгибö воан.

ДИМА. Ме пöгибö воа?! Час, ме тэ выlö каньöс, Васюкös,
усьöда. Сійö бара тэнö öдйö кок пöлöдыд кутас. Сыысь он
пышйы!

«К» ШЫПАС. А тэ видлы сійös чуксавны. «К» шыпастöгыс.

ДИМА (чуксалö). Кыс, кыс. Оз и лок. Мый нин бара тэ вö-
чин? Вай каньсö.

«К» ШЫПАС (*лэччө вигзодысьяс горө*). Нөшта өд ошйысьö. Шуа тай, мый некутшөм кань тэнад оз ло. Ме сзтысь «К» шыпассö ог сет.

ДИМА. Каньыс менам, абу тэнад.

«К» ШЫПАС (*вигзодысьяслы*). Ноко, челядь, мый артмас, кань кывсьыс «К» шыпассö мөдөн кө вежны? (*Вигзодысьяс вочавигзöны — пань.*) Дима, тані пань пö, шуöны. Оз ков сійö тэныд көктö панявны?

ДИМА. Ачыл сійöс паняв.

«К» ШЫПАС (*вигзодысьяслы*). Мый нөшта артмас? (*Найö шуöны — чань.*) Дима, чань со вöзйöны челядь. Оз ков сійö кань пыддиыд? Кутан скачөн велöдчыны ветлыны.

ДИМА. Ачыл сы вылын рöдты.

«К» ШЫПАС (*вигзодысьяслы*). Кыдзи нимтіс Димаыс каньсö? (*Вочавигзöны, мый Васюкөн. Дималы.*) Дима, а ме кө Васюксьыс «К»-сö пышйöда, мый лоас? Васюр, Васюш. Босьт, көсьян кө, найöс. Он көсйи? (*Бөр кайö.*)

ДИМА. Сувтлы. Вай бурөн сёрнитчам.

«К» ШЫПАС (*гöзмөмпырысь*). Водзынджык колö вöлі сёрнитнытö. (*Саймовтчö.*)

ДИМА (*вигзодысьяслы*). Гашкө, сійö мыйта на дурас. Суöднысö ог вермы. Гашкө, збыльысь прöштша корны да. Ті кыдзи думайтанныд? (*Вигзодысьяс вочавигзöны.*) Кора, сідзкө, и эм. А то весиг со Васюк каньöс кытчөкө дзебис. Вай öтвылысь чукöс-там. «К» шыпас, пет мян дорö! (*Вигзодысьяс корöны жö. «К» шыпас вашъялігтыр петö.*)

«К» ШЫПАС. Вöлисти гөгөрвоин, мый мекöд сьökыд венласьнытö?

ДИМА (*первойсö көсйö тшанитчыштны*). Суöді жö эськө дыр мысти да. (*Аггзö, мый «К» шыпас бöрыньтчö.*) Эн пышйи. А то дзикöдз вильышман.

«К» ШЫПАС. Сідзкө, прöштша кор да бөр нуöд анбурас. Менö сзтысь тэ вöсна вöтлісны. Ачыл жö и нуöд. Тэнсьыд кывзысьясны.

ДИМА (*заллань*). Нуны али мый? (*Залсянь вочавигзöны.*) Нуа, сідзкө. (*Көсйö босьтны мöгсö киöдыс.*)

Часлы, кутчысьла ме киас,

Алфавитас пырта сійöс.

«К» ШЫПАС (*бöрыньтчыштö*). Энлы. Вай первой думыштылы, кутшөм кывъяс мясянь заводитчöны. Көсья жö, мед вöлі чöскыдөн.

ДИМА (*думыштчö*). Вөлөмаöсь и эм. Кыдзи ме на йылысь водзті эг думыштылы. Со найö. (*Лыгдьöдлө.*) Кампет, көлач. (*Заллань.*) Ноко, ті отсыштöй! Водзö висьтавлöй. (*Залсянь висьтавлöны.*) Со мыйта на вөлөма.

«К» ШЫПАС (*тшанакодь*). А тэ чукыль-мукульöн вöлі нимтан.

ДИМА (*босьтö сійöс киöдыс*). Прöстит менö таысь. (*Нуöдö анбурас.*) Бöрсö босьтанныд он, шыпасъяс? Ме гөгөрвои, мый колана сійö вөлөма. И тیانöс кора прöститны. Ме вöсна зыксинныд да.

ГÖЛÖСЪЯС. Лэдзам. Мед локтö. Сытөг зэв гажтөм. Вильыш-

төгүд овнытө шуштөм жө. («К» шыпаслань анбур сайсянь чургөд-чылөны кияс да кыскөны. Сійө саймовтчө.)

ДИМА (залань). Вильыш и эм «К» шыпасыс. Сідз өд? Вайө видзөдлам, кызди сійөс мукөдыс примитасны. (Мунө.)

Недыр мысти воссьө анбур өдзөсыс. Петөны шыпасъяс. Найө варова сёрнитөны, дурөны «К» шыпаскөд.

«А» ШЫПАС. А ме прөститны кора вөтлөмсьыд.

«Ч» ШЫПАС. И ме кора.

СТАВӨН. И ми тшөтш.

«Ш» ШЫПАС. И ме.

«Й» ШЫПАС. Бур, сяммин Димаыслы петкөдлыны да, мый быд шыпас ас местаын колана. Оз артмы колана кывйыд, абу кө кодкө. Сідз өд?

СТАВӨН. Сідз, сідз. (Дурөны. Сэсся радөн сувталөны. «К» шыпас тшөтш.)

«А» ШЫПАС (водзлань петавлөмөн). Месянь заводитчө асыв.

«К» ШЫПАС (эльтчигмоз). В-сө вежа — лоас асык. (Бөр сувтө местаас.)

«Ч» ШЫПАС (тшөтш воськовтлө). Месянь заводитчө чер.

«К» ШЫПАС (ньюмъялгытыр места вывсянь). Ч-сө вежа — лоас кер.

«Ч» шыпас бөр сувтө ас местаас.

«Г» ШЫПАС (воськовтлө). Месянь заводитчө гөгыль.

«К» ШЫПАС (бара шмонитө). Г-сө вежа — лоас көкыль. («Г» шыпас сувтө местаас.)

«Ш» ШЫПАС (воськовтлө). Месянь заводитчө шөрт.

«К» ШЫПАС. Ш-сө вежа — лоас көрт.

«П» ШЫПАС (воськовтлө). Месянь заводитчө пөч.

«К» ШЫПАС. П-сө вежа — лоас көч.

«Й» ШЫПАС (воськовтлө). Месянь заводитчө йөв.

«К» ШЫПАС. Й-сө вежа — лоас көв.

«Н» ШЫПАС. Месянь заводитчө нөк.

«К» ШЫПАС. Н-сө вежа — лоас көк.

Ставөн ньюмъялөны.

«А» ШЫПАС. Вай өвсьы, вильыш шыпас. Тэ талун ассьыд пай ёна нин дурин. Вай видлам мукөд шыпасъясөн кывъяссө вежлавны.

«Й» ШЫПАС. Видлам и эм. (Залань.) Ог сөмын асыным. Со мыйта сюсь юр тані пукалө. Отсыштанныд өд?

ГӨЛӨСЪЯС. Отсыштам. Отсыштам, дерт.

ШЫПАСЪЯС. Вай босьтчылам. Коді медводз? «А» шыпас, тэ анбурас первойөн сулалан. Тэсянь и заводитам.

«А» ШЫПАС (водзө петөмөн залы). Ме өні шуа кыв. А ті гораа, ставлы кывмөн, сөмын энө өтчукөрөн, вежөй кывсьыс өти шыпас. Медем лоас виль кыв. Дасьөсь? (Думыштчылө.) Турун. (Залын вочавидзөны.)

МУКӖДЫС («А» шыпаслы). Зэв тай сюсь. Тэ ас шыпассянныд заводитчысь кыв босьт.

«А» ШЫПАС. Ме думайтэ эськӧ да. Но эг аддзы. Арбуз кӧ шуа, то кӧть кутшӧм шыпас он веж, мӧд кыв оз артмы. Акань тшӧтш жӧ. (*Заллань.*) Гашкӧ, тиянлы сюрас? (*Виччысьӧ недыр.*) Аддзанныд. Чӧв олӧны.

МУКӖДЫС. Нӧшта ӧд анбурас медводзын сулалан. Ми кӧть тэ бӧрын, а со мыйта выль кыв аддзасны. Ноко, видламӧй.

«Ч» ШЫПАС (*воськовтӧ*). Чаг. (*Вочавигзӧны.*)

«Г» ШЫПАС (*воськовтӧ*). Гӧр. Но сӧмын ӧти шыпас колӧ вежны. Гӧгӧрвоинныд?

«Н» ШЫПАС (*воськовтӧ*). Ныр.

«Й» ШЫПАС (*воськовтӧ*). Йӧг.

«П» ШЫПАС (*воськовтӧ*). Пань.

«Ш» ШЫПАС (*воськовтӧ*). Шар. (*Та дырйи залсянь вочавигзӧны быг кыв выӧ.*)

«К» ШЫПАС (*мукӧдыслы*). Ме тшӧтш кӧсья. Збыльысь, дзик медбӧръяысь. Позьӧ ӧд?

СТАВӖН. Позьӧ, позьӧ.

«К» ШЫПАС (*воськовтӧ*). Кӧв. (*Залын вочавигзӧны.*) Ті тай тӧлка нывкаяс да зонкаяс вӧлӧмныд. Аттьӧ ставныдлы. Став шыпас нимсянь. (*Мукӧдыслы.*) Вайӧ кекӧначасьыштам войтырыслы. (*Кекӧначасьӧны.*) Ми ӧд сзсся бӧр пырам анбурас. Сідзкӧ, выльысь аддзысьлытӧдз. Думаyta, ог дыр кезлӧ янсавлӧй. Ті ӧд ставӧн лыддысьны да гижны нин кужанныд. Регыд мысти бара паныдасям. Эн вунӧдӧй миянӧс. Аддзысьлытӧдз.

МУКӖДЫС. Выльысь аддзысьлытӧдз! Видза колянныд! (*Ӧти бӧрся мӧг саймовтчӧны.*)

П О М .



Татьяна КИРПИЧЕНКО



Мыжаяс

В И С Ъ Т

*«Кулём — тайё юрган кагё лампа
би кусём, но абу шондї кусём».*

(Рабиндранат Тагор.)

*«Йёз водзын яндысьём — бур сьёлёмкылём,
но медбурыс — ас водзаг яндысьём».*

(Л.Толстой.)

*«Кымын унджык мортыс яндысьё, сымын
унджык сы гинё вежавидзёмыс».*

(Б.Шоу.)

Ошиньё асывбыд нойтчис зэр. Гырысь войтъяс гора зурасис-ны стеклõас да сэсса, эбõстõмõсь нин, надзõника визувтисны увлань. Леналы кажитчис, бытъё тайё войтъясыс ловъяõсь, найё пикõ воёмõн зильõны вины асьсõ, стеклõ вылõ уськõдчõмõн ворссъыны некодлы гõгõрвотõм тышын. Лена пуксис вурсян машинка сайё аслыс платтъõ вурны. Войнабõрса грездын паськõ-мыс лавкаясас эз тырмы. Заводитчис машинкалõн лабутнõй, но гора сыланыс, и ем бара пондїс кольны ас бõрсяыс вõtчысь веськыд визь. Лена уджаліс видзõдтõг. Став думъяснас ань вõ-лі ывлаын, туй вылын. Кор энъкаыс нуис Леналысь ичõt писõ матысса сиктса больничаõ, сулаліс шоныд, кос поводдя. А õнї со... ва, нюкырмунõм пуяс; гудралõм няйт да кутшõмкõ лёк ту-налысь, помасьлытõм зэр... Куим лун чõж нин Лена виччысис Митя пиыскõд энъкаыслысь воёмсõ, но некутшõм юõр мунысьяс йылысь век на эз вõв. Леналõн верõсыс да мамыс ёна жõ май-шасисны, но аньлы чайтсис, бытъё гортсаясыс сайласисны сыысь. Гашкõ, сы вõсна, мый эз кõсйыны дõзмõдны, а гашкõ, сыысь, мый эз тõдны, кыдзи отсавны.

Тайё ичõtик грездас Лена олїс сõмын куим во на. Педучили-ще помалõм бõрын ань уджаліс татчõс приютын воспитательõн, локтõм бõрас во мысти петїс верõс сайё да вайõдїс чужанінсьыс мамсõ, кодї батыслõн война вылын вошõм бõрын да челядълõн

верстяммөм бөрын колис өтнас. Мамыс Леналөн ёна нин висис, а во джын сайын, война дырйи дзузгана би улын көмъяс вурөмысь, синтөммис. Но мый вермис, вөчис ачыс, некор эз норасылы да зэв шоча корліс кодөскө отсөг вылө.

Верөсыс Леналөн, Олексей, вөлі агрономөн, «висис» уджнас да гортас ёнасө эз пукавлы, шойччытөг пөртис олөмө юрас помтөг чужысь кутшөмкө думыштөмторъяс. Да и Лена оліс уджнас, приютнас. Шань сьөлөма, жалитіс челядьөс, төждысис на вөсна, кызди йөзыс шулісны, коланасыс на унджык. Медводдза аддзысьлігас челядь кажитчисны Леналы кутшөмкө скөрөсь, ськөд ёртасыны көсйытөмөсь. «Олөмөн эновтөм челядь», — шуліс коркө сирөтаяс йылысь пөрысьджык воспитатель. Но Лена тадзи эз мөвпав. Кызди кагаөс вермө эновтны Олөмыс? Со өд кутшөм мелі шонді сійө козыналө йөзлы, кутшөм мича дзоридзьяс быдтө...

Но мукөд челядьыс и кад кольөм бөрын вөліны зумышөсь, быттьөкө став вылас дузъялісны, и Лена вылө тшөтш, мыйысь ныв ёна шогсис. Дерт, вөліны приютын и мөд пөлөс челядь: мусаникөсь, восьсаөсь, тыдаланаөсь — быттьө ки пьдөс вылын. Ичөтөсь да жебиникөсь, найө быттьөкө некор эз кывлыны лёк йывсьыс. Татшөмъяс понда Лена медъёна поліс. Грездса челядь эз ёна ёртасылыны приютсаяскөд, шуисны горттөмъясөн, өддортісны коньөръясөс да тешитчисны на вылын, тшөкыда вундавлісны приютсаяслысь выль пальтояснысө, шыбитлісны өшиньө шапкаяснысө да кепысьяснысө. Лена некыз эз вермы гөгөрвоны, мыйысь приютсаяс кылісны асьнысө мыжаөн: на вылө видзөм сьөмысь, асланыс слабунысь али сыысь, мый олөны тані, войнабөрсса ичөтик грездын, көні и бать-мамкөд олысь челядь тшыгъялөны да лёка пасьтасьөны, көні найө дзык некодлы озковны. Лена дрөгмунліс, кор мөвпыштлис та йылысь. Сирөтаяс дорө овмөдчөм бөрын Лена көсйыліс вөчны приютсө челядьлы муса керкаөн, тубыртны сирөтаясөс радейтөмнас да төждысьөмнас... Но челядь мыйлакө полісны «чужан керка», «мам», «рөд-вуж», «семья» кывъясысь... Арлыдаджык уджалысьяс тшөктылісны Леналы видзчысьны (медым не дойдны сирөтаясөс) мам да рөдвуж йылысь сёрни-гижөдъясысь. Татшөм кадас этша коді көсьяс да вермас босьтны керкаас нөшта өти вом, кодөскө сирөтаяс пиысь, но надеяыд, кызди тай шуласны, кулө медбөрын...

Лена видзөдліс мичаник лөз дөра вылө да сыркмунліс. Сійө нетшыштис сьөлөмтөм машина пиньясысь матерьесө да косяліс шөрипөв. Сирөтаяслы паськөмыс коланаджык, бурджык налы мыйкө вурыштны... Кор машинкалөн тэрмасьтөм шыладыс муртса эз бөр бергөд Ленаөс казтылөмъясас, чепнас зельөдчиг, пондіс гораа увтны Дружок понныс. Чеп тіныгис кызкө повзьөдана; пемыд кымөръяс тыдавтөм поскөн йитісны мусө да енэжсө, да лэччисны пыр улөджык и улөджык. И пыр сідзи жө, жаль төдтөг, виисны асьнысө гырысь зэр войтъяс.

Дөрасө морөс бердас топөдөмөн Лена петіс пөрччысянінө. Верандаын кылісны гора воськовъяс. Дойөдз төдса шебрасөн киас керкаө пырис Леналөн знькаыс. Шебрас улысь тыдалісны дзоляник, верөснас неважөн на ньөбөм гын көмъяс. «Лэдзисны нин больничасыд?» Лена нюмъөвтис синъяснас да нюжөдчис кагалань. Узьө... Кутшөм жө ёна гажыс бырис сылөн чужуксьыс, бандзибъяссьыс, ставсө гөгөрвоысь турунвиж синъяс-

сьыс... Лена окыштис Митялысь плешсö, кöдзыд... Кöдзыд? Выныштчöмөн нывбаба лэптис синсö. Энькаыслөн чужом вылас вöли гижöма ставсö...

Друг ставыс пондис гартчыны. Öлексей кватитис Лена кийыс кагалысь шойсö. Ленаöс водтöдисны крöвать вылö. Сийö ставнас сотчис, горзис, кевмысис да нöйтис асьсö морöсас. Ань немтор эз кыв да саяс вольтöг сöрис. Кутшöм мичаөн кажитчисны öни сылы керкаыслөн пу стенъясыс! Тешкодь гöрд серъяс лэччисны пöтöлөксянь увань. Серъяс, быдлаын серъяс... А войтъяс нöйтчöны öшиньö, нöйтчöны пыр гораджыка и гораджыка, а стенъясыс пыр мичаджыкöсь... Тайö гöгөрвотöмторъясыс быттöкö тешитчисны мам вылын. Со стенин öшалысь серпассьыс ошпиян* мöдисны чечавны усьöм пуяс выланыс. Лена кылис налысь кага сяма серамнысö, да то бöрдзылис, то нюмунлис.

— Митя,— корис мам,— видзöдды, кызди ошпияныс гажöдчöны! Митя! Мыйла нö он лок?

Керка öшинь саяс кымöръяс пыр, быттöкö яндыситыр, мыччысис кельыд, муртса ловъя шондi югөр, но сийö тырмис, медым югзöдны ичöтик жырсö. Но Лена ас гöгöрсыйс немтор эз аддзы. Сöмын тöждысьтöг котралысь ошпиянöс. Öлексейлөн кийс, кор сийö инмöдчывлис Лена дорö, чайтсис нывбабалы то небыдик төвруөн, то увйөн, кытчö сийö крукасьлис ошпиян бöрся котралгас... Кутшöм жö сьöкыд вöли найöс кутны! Со быттöкö рудовгöрд гöныс и киад нин, но нöшта здук — и ошпи мынтöдчö, дзебсьö, сералиг, кысянькö татчö воом ош-мам саяс, и зверыс оз эргы Лена вылö, оз вöтлы пияныс дорысь, а сэтшöм нор синъясөн видзöдö... видзöдö и нюмгялö, көнкö, медым не тшыкöдны ставсö шымыртысь гажсö. И Лена нöйтчис вольпасяс, да кытыськö ылысь-ылысь кылис энькаыслысь гөлөссö:

— Тырмас, Елена! Эн тэ öтнад кагатö вошты. Миян ставнымлы сьöкыд. Ни овны, ни узыны он сет, ни гуасьны дасьтысьны.

И Лена быттöкö и гöгөрвоис энькасö, гöгөрвоис, мый и энькаыс воштис челядсьö война дырйи, челядыс сылөн тшыгла кувсисны, мамныслөн кияс вылас... И яндысьштны эськö моньлы энька водзын, и прöща корны, но ошпиян кыскöны ас бöрсянныс, сэтшöм вуджана килькъялöны, мый Лена вунöдö и энька йывсьыс, и сылөн кувсьöм челядь йывсьыс да мөвпгяснас бара шыбитчö ошпиян бöрся. Нывсö жалитöмла сыркъялөмөн бöрдны заводитö Леналөн мамыс. Курыд войнаыс гуис мамыслысь синъяссö, и кагасö гуис, Леналысь чоюксö. Тайö öд Лена чойясыскöд эз сяммы видзны кык арöса Светаöс. Нывкаяс котралисны керкаысь ылынокдь, а Света, садьмис да, аддзис, мый гортас некод абу, дай пасьтöгыс котöртис ывлаö. Топ-топ... Леналы чайтсьö, быттöкö сийö аддзö ичöтик чойсö да вöтчö сы бöрся: «Света, виччысьы! Тэ öд висьман да кулан, Света-а-а!» Но ичöt нывка вöлöма верстьö чойсьыс тэрыбджык. Света котöртö... а сэсса сийös, висысьсös нин, вайöдö гортас кутшöмкö нывбаба. Мыжа чойяс йöжгыльтчöмаöсь керка пельöсьяс бердö, полöны мамныслөн скöрлунысь. Лена быттöкö кызкö боксянь аддзö чойясылысь чужöмгяссö да ассьыс ичöтик на чужöмсö. Ставныслөн мыжа синъяс... мыйкö бергалö юрас. «Приютса челядь! И налөн

* И.И.Шишкинлөн «Утро в сосновом бору» серпас.

синъясыс мыжаось, но мян чужомъясным кутшомкө модось... найо пемыдось! Сиротаяс пыр мыйыськө яндысьоны, но пытшкөссяныс найо югзылыны и синваныс налөн сөстөм, а мян чужомъяс выланым ачыс Куломыс кольома съод гыж туйяссө». Съолөмыс Леналөн заводитө яра тпкыны, өвкйөдлыны сідзи, быттьөкө дась чечыштны морөссыс:

— Мамө!— заводитө горзыны Лена.— Мамө! Тайө ме мыжа!— гора сыркъялө Лена. Мамыс кутө нылыслысь кисө. Дерт, мам ставсө гөгөрвоө.— Тайө ме мыжа!— горзө Лена.— Та вөсна Енмыс босьтис менсьым Митяөс! Ме чойөс ви!

— Мый нө тэ сэтшөмсө шуан, Ленук,— вашкөдө мамыс.— Тэныд өд нель арөс сөмын вөлі... мый тэ вермин вөчны... Ланьт...

Кутшомкө весьөпөртан полөм шымыртис керкасө. Быттьөкө мыжыс да дойыс анялөн паськалісны, төбисны, гартісны тані олысь йөзөс. Мамыс тіраліс да бөрдігтыр малаліс Леналысь кисө, энъкаыс вөрзытөг пукаліс өшинь дорын, верөсыс сулаліс жыр шөрын да кутіс киас некодлы ковтөм ва тыра кружка да көтөдөм ки чышкөд. А өд дзик матын, мод жырийын, ставөн радейтана, но өні көдзалөм вир-яя нин дзоляник морт. Куйлө ньөж, сыналөм да мичаа пасьтөдөм. Куйлө да... кылө-ө рөдвужыслысь дойсө? Лена лөньджыка нин мөвпыштө кага йывсьыс. Эз, сійө эз раммы, но казяліс мыйкө сэтшөмтор, мый дорө оз позь велавны, но мый сідзжө и оз позь венны.

А ошпиян чеччалөны стенас, чеччалөны да сералөны. И корөны Ленаөс ас дінаныс, нюжөдөны лапанысө. Но Леналы найө веськодьөсь. Виччылөй, ошпиян... Тіянлы йөзкөд абу места...

Коли кык вежон. Лена пукалө вурсян машинка сайын да емлөн гора, лабутнөй сьылан улын видзөдө өшиньө. Ва гуранъяс абуөсь нин. Пашкыр, вылын юра пуяс вөччөмаось, вунөдөмаось лов сотысь көдзыд йылысь да гажаа, весиг неуна тшапа, нюжөдчөны шонділань. Улича кузя ветлөдлөны йөз. Ветлөдлөны, сёрнитөны ёрта-ёрткөд, нюмъялөны... Йөзөс аддзөм бөрын Лена лыштө кокныдджыка. Зэрыс помасис, и со нин ловзьөм жыр кузя тюръялө-котралө шонді көчиль. Мыччыслас да дзик пыр вошө, быттьө ворсөдчө анькөд. И дум вылас Леналы локтөны казтылөмъяс: челядьдырыс, война помасьөм, сыөн бөръя кадас эновтөм сиротаяс... «Кутны эськө шонді көчильсө да козынавны налы, кутшөма эськө радлісны... да он тай кут»,— нюмъялөмөн мөвпалө Лена, сөсся помалө вурсьыны да нимкодясигмоз видлалө енэж рөма ичөтик платтьө.





Альбина СЕЛИВАНОВА

Лисапета

ВИСЬ Т

Збыльвылас тайӧ нывбабаыслӧн нимыс Елизавета. Дзолядыр-йиыс нывкалысь вӧлі юаласны, кызди пӧ тэнӧ шуӧны. А ичӧт тусюклы сьӧкыда сетчис тайӧ кузькодъ нимыс да век вӧлі шуас: «Лисапета». Тадзи сэсса и сибдіс нывка дорӧ тайӧ нимыс. И сиктын сійӧс сӧмын та серти и тӧдісны ставӧн.

Ыджыд война водзвылас Лисапета петалис верӧс сайӧ. Но шудыс анялӧн лоис дженъйдӧн. Верӧсыс юӧртӧг вошис война вылын. Лисапета дыркодъ на виччысис радейтана мортсӧ, но весышӧрӧ. Кага кӧ сысянь чужтіс, дерт, аныдылы гажаджык вӧлі. Но том гозъялы Енмыс рӧд нуӧдысь питӧ, дай нывтӧ весиг, эз сет. А кадыс муніс водзӧ. Лисапета уджаліс сиктса колхозын, оліс верӧсыскӧд кыпӧдлӧм керкаын. Но ӧткӧн гажтӧм-шуштӧм. Ӧти кадӧ сы ордӧ сӧр рыгыасӧ кутіс пыравлыны Ӧльӧш Вань — олома нин дӧвеч. Лисапеталы сійӧ эз вӧв сьӧлӧм сертиыс, да мый вӧчан? Овмӧдчисны ӧглаын. Но и тайӧ пӧрйӧ Лисапеталӧн шудыс вӧлӧма дженъйдӧн. Ӧльӧш Ваньыс сьӧкыда висымис да регыдӧн и кувсис. Бур на, гозъялӧн чужсьыліс пи. Лисапета сі-йӧс Иванӧн жӧ нимтіс. Вань Вань пӧ менам быдмӧ, пӧрысь вой-лун пыкӧд,— ошйысьліс нывбаба.

Лисапета ичӧтсянныс велалис удж дорад. Ытшкыны кӧть куртны, турун кыскавны кӧть, мӧс лысьтыны да гид-карта весавны — быдлаын сійӧ медводзын. Колхозын зілігӧн некымынысь кер пӧрӧдны ветліс, куимысь кымын кывтліс пурйӧн Мозын кузя Лушуконскӧйӧдз. И кынмалӧмсӧ, и тшыгыалӧмсӧ тӧдліс. Но некодлы эз норасьлы. Век жӧ медся ёна тӧждысис пиыс вӧсна, мед сійӧ эз вӧв тшыг, эз кынмав да эз доймав. Но Ваньыс мый-лакӧ школаын велӧдчис дыша, лыддысьны ни гижны эз радейт. Сӧмын сёйны корис да ывла вылын лунтыръясӧн котрالیс. Мамыс кӧть и видывліс сійӧс, бур кывйӧн и ёрчмӧн, но тӧлк эз ло. Быдмис письыс дыш ӧслӧпан, вина гаг радейтысь. Йӧзыслӧн пияныс коді электрикӧ да трактористӧ, коді киномеханикӧ,

кодї радистö велöдчисны, а Лисапеталöн — дыш пекрыль, весиг уджавны оз кöсйы. Но коркö мöсьяс бöрся дöзьöр кутысьöн индылісны. Сійö юсьöма да стада джынсö пöшти воштöма. Бур на, мöсьясыс сямäсь да асьныс стан дорöдз туйсö аддзöмäсь. Вöтлыны ковмис Вань Ваньöс удж вывсьыс. Индїсны сэсся некытчö туйтöм зонтö дöзьöритны овмöсса град йөр, кöні быдмис капуста, морков да сёркни. Но и сэнї Ваньысь тöлк эз ло. Град йөр дорас гулькöдöма-кымöма быдса водка доз да сэтчö и унмовсьöма. Та кості сиктсаяслöн кöзаясыс колхозса йöрас пырöмäсь да став быдтанторсö таялöмäсь. Медбöрын Лисапеталысь писö индїсны мöсьясöс тöвйöдан картаын куйöд петкöдысьöн. Тöвьяснад тані шоньд. Сöмын тöд ассьыд уджтö. Идрась да отсась лысьтысьысясы. Но и тані Дыш Вань, тадзи зонмöс кутісны нимтыны сиктсаяс, тшöкыда торкавліс уджсö. И видласны сійöс, и пинявласны, овмöсса юрнуöдысь весиг ас дорас корліс. Но нинöм эз отсав. Кор оз ю-кодав, зэв киподтуяöн овлö. Но воас кö вомас сё грамм, вежон чöж оз вермы пальöдчыны. Став сьöмсö вина-водка вылö видзас, дай мамыслысь на няргас-корас. А оз кö сет Лисапетаыд доз вылас, Дыш Ваньыд керкасьыс, мый донadjыкыс эм, гусьöн вузалас дай. Бура уджалöмысь Лисапеталы коркö вöлі козыналöмäсь часі. А Дыш Ваньлöн горшыс ёнакодь тачкис и зонмыд дыр эз мөвпав, мамыслысь дона часісö мöдлапöвса посёлокын водка доз вылö вежис дай...

Пиыс понда вийсьöм-шогсьöм вöснаыс ли, Ыджыд война да войнабöрся сьöкыд кадö тшыг нисьö пöт олöм понда, Лисапета тшöкыда нёрпаліс да кукань видзан удж вывсьыс муніс контораö идрасьны. Быд гожöм-ар вөрö вотöсла котраліс. Чöд, пув, турипув, тшак вотас да ставсö сельпоса контораö сьöм вылö сдайтас. Идралысьыдлöн öд удждоныс абу ыджыд. Порсь на быд во тшөгöдліс да нуліс начкысян пунктö. Öшинь улас картупель вöдитіс. Чöжöм сьöм вылас öти воö ньöбис холодильник, мöд воас — выль телевизор. Мыйöн вотчан кад воас, видзöдан да, Лисапета бара нин вөрö котöртö.

— Лисапета,— юаласны сылысь.— Он мөй мудз öтарö вотчынысö? Öд абу нин том.

— Дак быть öд. Пийöй гортись сöмын нуö-а, со и ковмö аслым кынöмпöт корсьны.

— Тэныд, олöма нин мортлы, абу öмөй сьöкыд таджикöн мырсьынысö?— кодкö бара юалас.

— Дак менам жö кык сьölöм,— вочавидзас Лисапета.— Öтчыд чöд вотігөн öти сьölöмөй сувтіс, да ковмис мыр вылö пуксьыны. Сэсся öти сьölöм весьтасöдыс морöсöс ниралі-ниралі, дак сьölöмөй бара мöдіс уджавны. Неуна шойччышті дай бара вотчышті, ведраöс тырті.

— Он мөй пов öтнад парма-вöртіыс ветлöдліг-вотчигад?— чуймалöны тöдсаясыс.

— Дак меным Енмыс век отсасьö,— ошйысьö Лисапета.— Öти пелям пыр и сетас сигнал. Ти-ти-ти-и! Мун татысь, шуö, пи-пи-пи-и! Матын ош! Ош! Ош! А ме нин велалі тайö сигнальяс дорас. Маузер азбука шусьö. Сэтшöмыс тай миян поштаын на эм. Ме пыр и вешья лёкинсьыс. Мöдлаö муна вотчынысö. Тöдсаясыс шензьöны:

— Абу Маузер, Петровна, а Морзе азбука тайё, өти-кө. Мөд-кө, вай эн сөр нинөм абусө, серам петкөдлысь.

— Ог жө сөр. Төрыт на Сандыр Агнюшкөд өтлаын чөд во-тим да, сійө аддылыс, кызди Енмыс мекөд сөрнитис, бур туй вы-лө индис,— шуис Лисапета.

Төдсаясыд ёна и чуймисны:

— Тэ нө лад вылад-ө, Лисапета? Сандыр Агнюшкөд тэ вөрас некыз эн вермы аддысыны. Сылөн лысьөмыс важөн нин шойна гуын сисмыс.

А Лисапета лунтыръясөн мырсьө-ноксьө, сьом вөчө пөрысь вой-лун кежлас аслыс да аслас дона пиыслы. Өтчөд пув вотчані-нысь гортас воас да пуксяс телевизор видзөдны, и чуймөмысла места вылас кынмас. Ни телевизорыс абу, ни пиыс некөн оз бергав. Коньөр нывбаба пыр и гөгөрвоас, кытчө вошис выль телевизорыс. Лисапета неуна сайкалыштис да петис сарайө, көні пырджык вальмасьлис садьтөм код пиыс. Сидзи и эм. Узьө код-няйтыс сынисады. Ныргөрөн шкоргө. Шог ни печаль мортыслөн абу. Ярмөм нывбаба куранөн эськө и уськөдчылас дзыкөдз вель-мөм пиыс вылө, гойкөдө сійөс:

— Кытчө телевизорсө нуин, адгорш? Чеччы, ноко, сөтөна! Мый вылө и чужтылі тэнө? О-о-о! Адөй, адөй! Кор ме тэысь и мынла!— коньөр нывбаба пуксис сарайө пыртлөм кос турун вылө да гораа бөрддзис.— Кык верөсөс вошті, став сьөкыдсө пыки,— бөрдөмсорөн-сыркъяломөн шуалис Лисапета.— Өти пи и чужтылі, дай сійө меным шуд эз вай! О-о-о! Енмөй, Енмөй! Мый меным вөчны? Код водзын ме мыжа? Некоды лөк эг вөч-лы, а оломөй эз и артмыв.

Но Енмыд чөв оліс, тыдалө, эз кыв Лисапеталысь шогсьөм-бөрдөмсө, эз аддыв ноксьөм-мырсьөмсө. А сиктсаяс кутисны казавны, мый сійө корсюрө абу лад вылын, мукөддырийи нем абусө сөрө. Лавкаө ньөбасыны пырас да шуө, пиөй пө карын велөдчанінысь воис да көть мыйкө чөскыдтор ньөба, либө вись-талас, төрыт пө нук-нучкаясөй карысь воисны да колө көть пө-жавны шаньгаяс да көвдум. Но йөзыс өд төдісны, мый Лисапета-лөн пиыс некор карын эз велөдчыв дай эз и гөтрасьлы весиг. Кодлы татшөм юысьыд да дышыд колө? Сэсся кодкө Лисапета-лөн тьөтөн шуысьыслы, коді оло карын, висьталөма, мый Петров-наыс неуна йөйталө. Тьөтөн шуысьыс волас карсьыд да нуөдас Лисапетаөс аскөдыс, петкөдлас бурдөдысьяслы. Найө видзөдліс-ны нывбабатө да тшөктисны инавны йөйясөс бурдөданінө. Но Лисапета дыр эз и ов... Тьөтөн шуысьыс и дзебис сійөс карса шойнаө.

Лисапеталөн Дыш Вань пиыс мам керкасьыс став эмбурсө вузалис-юис да сидзи и сотчис вина-водкасьыс, вина гагйыс мортсө сөйис.



Н.С.Попова йылысь гижöма нин кык книга

Василий Попов «Авъя велöдысь» статьяын («Войвыв ко-
дзув», 2011 во, 11 номер) Н.С.Тимушева йылысь гижö: «Мый
миян республикаын тöдöны тайö авъя да шань велöдысь йыв-
сьыс? Висьтавны сьöкыд». Но тайö абу дзик сідз. Наталья Се-
мёновна йылысь паськыда гижöма 1940 воын Комигизöн лэдзöм
«Учителя-орденоносцы Коми республики» да менам «На земле
Кöрт Айки» (2002 во) книгагасын. «Учителя-орденоносцы Коми
республики» книгагын Н.С.Тимушева йылысь очеркыс (27 л.б.)
воосьö портретöн. Морöсас — Ленин орден. А öтувъя портрет
вылас Наталья Семёновна — М.И.Калининкöд орччöн (сетöма
журналас — А.П.).

Сійö жö книгаас 28 лист бокын Н.С.Тимушеваöс донъялö
сылöн вöвлöм велöдчысьыс — сэки Коми АССР-са Наркомпро-
сын министр Подорова: *«Велöдысьяс пöвстысь велöдчысьяс медъ-
ёна радейтисны Наталья Семёновнаöс. А торйöн нин найö,
кодъяс олісны тшыг нисьö пöт, кодъяслы нинöм вöлі пасьтавны
школаас. Ме некор ог вунöд, кызди сійö кужис прöстöя да сьö-
лöмсяньыс бурöдны миянöс сьöкыд воясö, кутшöма ми аттьöа-
лім сійöс, кор велöдіс миянöс либö бать-мамнымöс вурны мыйкö
важ көлуйысь, дöмны паськöм либö сетліс мыйкö аслас көлу-
йысь. Сійö вöлі дась вöчны ставсö, мед сöмын вермим велöдчы-
нысö»*.

Водзö Подорова казътылö: *«Кулöмдінса Высшöй начальнöй
училищеын öти велöдчысьöс сиктас немецкöй военнопленнöйяс
ордö пыравлöмысь көсийсны вöтлыны школасьыс»*. Казътышта,
1916 воас быд вöлөсьтö, көні вöліны урадникъяс, вайисны во-
еннопленнöйясöс. Вайöмаöсь найöс и Кулöмдінö. Гөрд крест
пыр налы вичмöдлöмаöсь сёян, паськöм. Та йылысь, дерт, По-
дорова эз тöд. Вöтлыны көсийöмаöсь Кöрткерöсысь Анна Изъяуро-
ваöс. Анналы немецъяс сетлывлöмаöсь шоколад, чай-сакар. Та
йылысь кывсьöма училищеын. Война кадö вөрöгкöд волысьö-
мысь Аннаöс шуöмаöсь вöтлыны училищесьыс. Педсöвет вылын
дасьтöмаöсь шуöм: «За связь с врагами Анну Изъяурову, учени-
цу 2 класса Высш. нач. училища, исключить из училища. Ре-
шение педсовета для утверждения направить в Вологду директо-
ру народных училищ губернии на утверждение». (Вологодск.
обл. архив, ф. 1873, оп. 1, ед. хр. 2978. НА РК, ф. 188—192).

Наталья Семёновна и нöшта öткымынöн сувтöмаöсь талы
паныд. Но школаса директорыс век жö ыстöма шуöмсö Вөлг-
даö. Анна Изъяуроваöс и нöшта кык нылöс вöтлöмаöсь училище-
сьыс. Книгаас гижöма, быттö Тимушева дорйöма нывъяссö и
найöс абу вöтлöмаöсь. Тайö абу сідз. Вöлі кө мöд ногөн, Вөлг-

дадзыд педсөветыдлөн шуöмыс эськө эз во! И документ чукöрас индöм фондас эз вöв!

«На земле Кöрт Айки» книгаын (лэдзли ас тшöт весьтö), Национальнöй архивса 177, 180 документъяс подув вылын, гижли и Н.С.Попова йылысь. Инспектор М.П.Успасский пасйö, мый Наталья помавлöма Вöлөгдаса восьмикласснöй гимназия «отлично» оценкаясөн. Прогимназияын велöдöм йылысь абу гарыштöма. Колö шуны, мый Н.С.Попова веськöдлис учебно-воспитательнöй уджөн, кывкутис нравственнöй воспитаниеысь да тöдöмлунъясысь. Сйö эз вермы весиг торшöдлыны школаса стöрöжсö. Медым чырыштны, Н.С.Поповалы ковмывлis шыась-ны Устьысольскса земскöй Управаö, кодсянь индылисны стöрöжсö, либö училище уджнас веськöдлысь попечитель дорö. 1905—1909 воясас Н.С.Попова велöдис öти класса начальнöй народнöй училищеын, а эз, кызди гижö В.Попов, кык класса училищеын. Народнöй Просвещение министерстволөн кык класса училищеыс воссылöма 1910 вося январын. Н.С.Попова велöдис сэнi естествознание, а Кулöмдiнса шöр школаын — ботаника да зоология. Кöрткерöсын Н.С.Попова уджалis 12 во, а эз 17, кызди гижö В.Попов.

Лои нин пасйöма, мый училище уджнас веськöдлис попечитель, кодöс индылис Вöлөгда губерняса училищнöй Сöвет, и вынсьöдлис аслас шуöмөн Вöлөгда губерняса народнöй училище-яслөн директор. Индылисны попечительнас мортöс, кодi вермис отсавны училищеыс-лы сьöмөн и мукöдторйөн. Татшöмъяснас пырджык вöвлiны купечьяс, тöргуйтысь крестьяна. 1904 восянь Кöрткерöсса начальнöй училищеас попечителялис пароход кутысь, тöргуйтысь крестьянин Яков Алексеевич Казаков, кодлөн кык судтаа керкаыс öнi на сулалö Кöрткерöс шöрын. Училище уджлөн ставпöлöс могъяснас сйö шыась-лывлis инспектор М.П.Успасский дорö. (НА РК, ф. 180).

Со М.П.Успасскийлы попечитель киөн гижöм öти юöртöм: «В Корткеросском училище с начала учебных занятий 15 сентября 1906 г. преподаватели учат всего два часа в день: с 10 до 12 часов, и кажется, будто они не находятся на службе у земства и будто получают пенсию от земства. И сколько же времени надо учить? Корткеросский волстаршина и попечитель училища Я.А.Казаков». (НА РК, ф. 116, л. 73).

Кöрткерöсын Н.С.Попова уджавлис Е.А.Сацредотовакöд, кодi петлис верöс сайö Чирк Митрей (Д.М.Попов) сайö. А Чирк Митрейыс овлис сйö жö керкаас, кöнi и Наталья Семёновна Попова ай-мамыскöд, чой-вокыскöд. 109 № керкаыс сулавлис библиотека водзвылын. Вöли зэв ыджыд. 1965 воö сэнi вöли общежитие. 1967 воö ме пыравли сэтчö. Арталi 12 жыр. Вайöда Кöрткерöс-лысь 1886 вося посемейнöй списоксö, кодöс вöчлöма Андриан Попов — вöлöсьтса писар.

«Дом № 109. Попов Иван Андрианович, 20 лет, 1866 г.р., 18/11. Его дяди: 1) Михаил 33-х лет, 1853 г.р., 1/11; Михаила сыновья: Николай, 8 лет, 1878 г.р., 1/04; Дмитрий Михайлович — 1883 г.р., 14/05. Ивана Андриановича другой дядя: Семён Яковлев Попов, 30 лет, 1856 г.р., 30/06. Семёна сын Иван — 1893 г.р., 28/06. Ивана Андрианова мачеха, Вера Павлова, бывшая Лебедева, сестра Николая Павлова Лебедева,

1856 г.р., вышла замуж за Андриана Якимова Попова в 1865 г. Её дочь Елизавета, 12 лет; Ивана Андрианова жена Анастасия, 21 год. Михаила вторая жена Анна, 23 года: её дочери — Ольга 13 лет, Александра 5 лет. Семёна Яковлева жена Елизавета Африкантовна, 30 лет: его дочери — Ольга 18 лет, Наталья 2-х лет. Ивана дочь Елена, 1891 г.р., 21/05. Семёна дочь Антонина, 1893 г.р. Ивана Андрианова сыновья: Василий, 1887 г.р., 27/12; Николай, 1893 г.р., 2/03». (НА РК, ф. 58, оп. 1, ед. хр. 1).

Дмитрий Михайлович Попов (Чирк Митрей, образ серпасалысь) отлаасьё Екатерина Сацредотовакод Совет власть дырйи нин, 1920 воо, кор уджалё Корткерёсса волисполкомын секретарён. Сэки Н.С.Попова вöлі нин Кулöмдінын. Натальялөн айыс 1886 воын помаліс Вöлöгдаын пельшöръяслысь школа, уджаліс Корткерёсса пельшöр пунктын. 1908 восянь — Корткерёсса больничайн. Öтшöтш бурдöдіс гортса пемöсьясöс. (НА РК, Фн-6, ФР-46).

Гимназиясалы вöзъя пыравны Национальнöй библиотекаö да лыддыны «Учителя-орденоносцы Коми республики» и «На земле Корт Айки» книгаысö (сэні орденöн наградитöм 17 велöдысь). На лыдын и Шойнатыса да Мордінса школаын велöдысьяс. «Знак Почёта» орденöн наградитöма Шойнатыса шöр школаыс завуч Мария Арсентьевна Артееваöс, «За трудовую доблесть» медальöн — Мордінса школаыс Пантелеймон Ильич Сямтомовöс. Ленин орденсö медводз сетöмаöсь Сыктывкарса 2 № шöр школаын велöдысь Анна Викторовна Друговалы, мöдсö — Н.С.Тимушевалы. 1945 воын Ленин орденсö сетöмаöсь Маджаса школаын велöдысь Людмила Степановна Елфимовалы.



ПЫДДИ ПУКТАНА АВТОРЪЯС!

Редакцияö гижöдъяснытö ыстігöн быть колö юртны:

1. Ассыныд ним, вич, ов; кор да көні чужломныд (лун, төлысь, во).
2. Паспорт юръяс: номер, серия, кор да көні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.

Тайöс юрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторыслы найöс оз мöдöд.
Редакция оз век во öти кывйö авторъяскöд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982, ГСП-2, г. Сыктывкар, ул. Карла Маркса, д. 229, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).
E-mail: kodzuv@mail.ru; Сайт: komimu.com

Подписано к печати 14.05.2013. Формат 70х108¹/₁₆. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 795. Заказ № 2857. Регистр. **ПИ № ФС 3 - 0226** от 20.12.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.